

انجيل لوقا

۱

مقدمه

١ تئوفيلوس خان، دا جسّه وِر اُونويسن چيوني كه چمه ديله كا اِتفاق دَلكه
٢ و اِتفاقوني روايت، كه كسوني كه اُولي نه اِشْتَن چمي نه ويندشونه و خدا
كلامي خادِمون واسطه نه بَمون دَسپَرْدشونه، نيويشتشونه. ٣ اَز ني كه اِم
مطلبون اَوّل تا اَخر بَررسي گَرْدَمَه، صَلاح ويندِمَه اِم ماجرا هَتَه به ترتيب،
تئوفيلوس خان، به تِرا بينيويسيم. ٤ تا يقين بَزونه گِرد چيوني كه اَموتَه رونه
درست اِسته.

يحيي پيغمبري دنيا اومه پيشگويي

٥ هيروديس پاتشاه دوراني كا كه يهوديه پاتشاه به، ايله كاهن زندكي بگري كه
چي نوم زكريا به. زكريا، ابيتا گروه شن به كه يهوديون معبدي خادم بيته. زكريا
ژن ني هارون كاهني نَسلي كا به و چي نوم اليزابت به. ٦ اَوْن هَر دِ نَفَر خدا
نَظري كا صالح بينه و خداوندي گرد احكام و دَسْتورون، بيدون كم و گسري
انجام بدايين. ٧ اَمَّا اَوْن خِرْدَنشون نِبَه، چوم اليزابت قِسَر به و هَر دِ پير بينه.
٨ ابي روز كه زكريا گروه خدمتي نوبه به، و آ، خدا حضوري كا به عنوان كاهن
خدمت بگري، ٩ طبق كاهنون دَب قُرعه دَرْفَنْدشونه و قُرعه زكريا نوم بر اومه
كه بشو خداوندي معبدي مقدس جگا ديله و بُوخوَر بوسونه. ١٠ بُوخوري سوتَه
وختي كا، گرد جماعت بروني كا دعا بگريدين ١١ كه ابي دفعه خداوندي ايله
ملائيكه به زكريا آشكار آبه و بُوخوري سوتَه جگا راسته طرفي كا منده. ١٢ زكريا،
ملائيكه وينده كا تشويش آبه و تَرَس چي وجودي گيشه. ١٣ اَمَّا ملائيكه ايينه
وايشه: «زكريا، مَتَرَس! چوم كه اِشْتَه دعا مستجاب بيته. اِشْتَه ژن اليزابت به

تِرا زوئه ای دنیا بوآردی و تِه چِبی نومی یِیحی پِنی.^{۱۴} تِه شاد و خوشحال بَبیش و ور گِسن نی چِبی دنیا اومه کا شاد بَبین،^{۱۵} چوم آ، خِداوندی نظری کا یال بَی. ییحی نَبی هَرگَز شَراو یا عرق لَو بَزَنه. حتی آ موقع نه که اِشْتَن نَنه اِشکمی کا تِه، روح القدسی نه پور بَی،^{۱۶} و ور گسون قوم اِسرائیلی کا خِداوند، چوون خِدا ظرفی را آگار دِنه.^{۱۷} ییحی اِشْتَن خدمتی هَ روح و قدرتی نه انجام بَدای که ایلدای پیغمبر انجام بَدای. آ خِداوندی نارناره بوئی تا دَدَه اون دیلی به خِرْدَنون نَزْدیک آگرِه و یاغیون باموچِه که اِشْتَن دَدَه اون شیوار خِداوندی نه خِش پِون، تا حاضرِه قومی خِداوندی را آمادَه آگرِه.»^{۱۸} زکریا، مَلائیکه کا دَقَر سَشه: «اِمی کیاکا پَزونِم؟ چوم که آز پِره مَرْدِمَه، چِمِن رِن نی پِره.»^{۱۹} مَلائیکه جَواو دوشه: «آز جِبْرئیلیمَه که خِدا حضوری کا بَمَنَدیم. حِسَه ویسا اَبِیْمَه تا به تِنه گف بَزَنم و اِم شادَه خَوَری به تِه اِرساوونم.»^{۲۰} دَیس، تا روزی که اِم اِتْفاقِن دَلکِن تِه لال بَبیش و نِیْمَشای گف بَزَنی، چوم چِمِن گفون که اِشْتَن موقع کا اِتْفاق دَلکِن، باور نِکَرْدَرَه.»^{۲۱} اِم میانه کا، مردم زکریا منتظر بینه و تَعَجِبِشون گَرْدَه که آ، هِنْدی مَعَبْدی مقدس جِگا دیله کا مَنَدَه.^{۲۲} وختی زکریا اومه پِرون، نِیْمَشای اوون نه گف بَزَنی. بَس اُون زوَنَسْتِشونَه که مَعَبْدی مقدس جِگا دیله کا رویایی ویندشه، چوم فقط ایما اِشاره بَگَرْدی و نِیْمَشای گف بَزَنی.^{۲۳} زکریا اِشْتَن خدمتی نوبتی تَمون آگرَدَه پَش آگرَدَسْتَه اِشْتَن کَ.

^{۲۴} آ روزون پَش، زکریا رِن، اِلِیْزَابَت حامیله آبه و پینج مانگ اِشْتَن مَرْدمی کا نین آگرَدَشه.^{۲۵} اِلِیْزَابَت بَوَاتی: «خِداوند به مِرا اِم کاری گَرْدَشه. اِم روزون کا خِداوند به مِن لطف گَرْدَشه، و آ چِبی که مَرْدمی دیله کا چِمِن ننگ به، پَگَتِشه.»

عیسی دنیا اومه پیشگوی

^{۲۶} اِلِیْزَابَتی حامیلیگی شیشمین مانگی کا، جِبْرئیل مَلائیکه خِدا ظرفی نه ویسا آبه شهر ناصره را ولایت جَلیلِی کا،^{۲۷} تا بَشو باکره کِله ای وَر که چِبی نوم مریم به. مریم یوسفی پیوندی به. یوسف داوود پُاتشاه نَسلی کا به.^{۲۸} مَلائیکه شَه مَریمی وَر و واِتْشه: «سلام بَر تِه. اِی تِه که خِدا را عزیز اِستیش، خِداوند به تِره!»^{۲۹} ولی مریم، مَلائیکه گفون دَرَسِه نه وِر تَشویش آبه و اِشْتَن نه فیکر گَرْدَشه که اِم چِنْتَه رَه سلامی یِه.^{۳۰} مَلائیکه یِی نه واِتْشه: «مریم، مَتْرَس! چوم که تِه خِدا را عزیز بَبیش.»^{۳۱} دَیس، تِه حامیله بَبیش، زوئه ای دنیا بوآردیش و چِبی نومی عیسی پِنی.^{۳۲} آ یال مَرْدی بَی و یِی نه خِدای متعالی زوئه بَوَاتین. خِداوند خِدا

چپی جد، داوودی پُتِشاهی یِه تَختی ییی آده. ۳۳ آ تا آبد بر یعقوبی نَسلی، سلطنت بگردی و چپی پُتِشایی هَرگَز تمون آنیب. ۳۴ مریم مَلائیکه کا دَفَرَسْشِه: «ام چننه مُمکینه؟ چوم که از باکره ایمه.» ۳۵ مَلائیکه جَواو دوشه: «روح القدس به تِن نازل بپی و خِداي متعالی قدرت به تِن سا دَرَفنه. اِمی واسی آ خِرْدَنی نه، مقدس و خِدا زوئه بَوَاتین. ۳۶ دَیس، اِشْتِه خویش اِلِیزابت نی اِشْتَن پیری کا حامیله یِه و زوئه اِی اِشْگمی کا هِسْتِشِه. ها، اَکسی که اِشْتَن قِسر بییه واسی مردمی زوونی سَر دَلکه به، حِسّه شیش مانگه حامیله یِه. ۳۷ چوم خِدا را هیچ کاری محال نییه!» ۳۸ مریم واتشه: «آز خِداوندی خاتکیمه. هَر چپی دربارِه چِمِن واتره، هَتّه ببو.» اَ موقع مَلائیکه چپی وری نه شه.

مریمی دیدار اِلِیزابتی کا

۳۹ آ روزن کا، مریم پرشته و تاویستّه شه شَهْری را که یهودیه کوعاتی کا اِستبه. ۴۰ مریم شه زکریا کَ دِیله و اِلِیزابتی را سلام گردشه. ۴۱ وختی اِلِیزابت، مریمی سلامی دَرَسْشِه، خِرْدَن چپی اِشْگمی کا تَکان هَرْدِشِه و اِلِیزابت روح القدسی کا پور آبه، ۴۲ و پَلنده سَسی نه واتشه: «تِه ژُنکون دِیله کا مُتوارک اِستیش و اَ خِرْدَنی که اِشْتِه اِشْگمی کا یِه نی مُتوارک اِسته! ۴۳ آز کِیمه که چِمِن سَرورِی ننه با چِمِن وَر؟ ۴۴ چوم وختی که اِشْتِه سلامی سَس چِمِن گوش آرسته، خِرْدَن شادی کا چِمِن اِشْگمی کا تَکان هَرْدِشِه. ۴۵ حَسّه ببو اَ ژنی که باور گردشه اَ چپی که خِداوندی طرفی نه ییی نه واتّه بییه، اَنجام بپی.»

مریم خِداوندی ستایش بگردی

۴۶ مریم واتشه:

«چِمِن جان، خِداوندی عظمتی ستایش بگردی
 ۴۷ و چِمِن روح چِمِن نجات دهنده کا که خِدا اِسته، شادی بگردی،
 ۴۸ چوم که آ، اِشْتَن خاتکی، ناچیز بییه نظر دَرَفَنْدِشِه.
 چمی پَش، گرد نَسِلن مِنه حَسّه بخت بَوَاتین،
 ۴۹ چوم اَ که قادر اِسته به مِرا یال کارونی گردشه،
 چپی نوم قدوس اِسته.
 ۵۰ چپی رحمت، پِشت دَر پِشت،
 گسونی را ییی که ییی حُرمت بگردین.
 ۵۱ خِداوند اِشْتَن بازو نه، قدرتمنده کارون گردشه

و کسونی که اِشْتَن دِلی فیکرون کا مُتِکِبری نه، وِلا آگرَدشه؛
^{۵۲} قُدِرتَمندون چوون پاتشاپی یه تختی کا جیر وِرَدشه
 و فروتَنون سَر بِلند آگرَدشه؛
^{۵۳} وِشیون چاک چییون نه سیر آگرَدشه
 ولی ثیروتمندون تیه دَس ویسا آگرَدشه.
^{۵۴} اِشْتَن، رَحمتی ویر وِرَدشه،
 و اِشْتَن بَنده، قوم یهودی کمک گرَدشه،
^{۵۵} هته که چَمه اجداد، یعنی اِبراهیم پیغمبر و چِبی نسلی،
 وعده دو عَش به که تا اَبَد اِنته بَگره.
^{۵۶} مریم تقریباً سه مانگ الیزابتی وری کا منده و دومله آگرَدسته اِشْتَن ک.

یحیی دنیا اومه

^{۵۷} اِلیزابتی زایمانی وخت آرسته و زوئه ای دنیا وِرَدشه. ^{۵۸} وختی چِبی
 خَمسوعه اِن و چِبی خویشِن دَرَسِشونه که خِداوند چه یال رَحمتی به اِلیزابت
 گرَدشه، اِبی نه شادی گرَدشونه. ^{۵۹} هشتمین روزی کا، اومینه خِرَدنی خَتنه بَگرن
 و پیستِشونه خِرَدنی دده نومی که زکریا به، خِرَدنی کا پَن. ^{۶۰} اَمّا خِرَدنی ننه
 واتشه: «نه! چِبی نوم بَسی یحیی بَبو.» ^{۶۱} اَوْن واتشونه: «اِشْتِه قوم و
 خویشون دیله کا هیچکس اِنته ره نومی نیشه.» ^{۶۲} بَس ایما اشاره نه، خِرَدنی
 دده کا دَفَرَسِشونه که پیستِشه چِبی نومی چه پنه. ^{۶۳} زکریا تخته ای پیستِشه و
 نیویشتشه: «چِبی نوم یحیی اِسته!» گِرَد تعجب گرَدشونه. ^{۶۴} دَر دَم زکریا زوون
 آبه و خِدا حَمد و ثنا گرَدشه. ^{۶۵} گِرَد چوون خَمسوعه اَوْن جانی کا ترس دَلکه.
 یهودیه کوعاتی سرتاسری کا، مردم دربارَه گِرَد اِم چییون گف زُنین. ^{۶۶} هَر کسی اِم
 گفون دَرسی، اِشْتَن نه فیکر بَگردی که: «اِم خِرَدن آینده کا چه بَی؟» چوم
 خِداوندی دَس چِبی همراه به.

زکریا نبوت

^{۶۷} اِم موقع خِرَدنی دده، زکریا، روح القدسی نه پور آبه و اِنته نبوت گرَدشه:
 «^{۶۸} مُتوارک بَبو اِسرائیلی خِداوند خِدا.
 چوم اِشْتَن قومی کمکی را اومه و چوون آزادی خِرِیشَه.
^{۶۹} اِشْتَن نوکر، داوود پاتشاه نسلی کا،
 قدرتمنده نجات دهنده ای اَمه را ویسا آگرَدشه.

۷۰ درست هتہ کہ قدیمی کا
 اِشْتَن مقدّس پیغمبرون زوونی کا وعدہ دوغش بہ کہ
 ۷۱ آمہ، چّمہ دِشمنون
 و گرد گسونی دسی کا کہ آمہ کا بیزاری نہ نجات پدہ،
 ۷۲ تا آرحمتی کہ چّمہ آجدادی وعدہ دوغش بہ، انجام پدہ
 و اِشْتَن مقدّس عہدی ویر بوآرہ؛
 ۷۳ و ہ قسّمی بہ جا بوآرہ کہ
 چّمہ جد ابراہیمی را ہر دّشہ،
 ۷۴ کہ آمہ چّمہ دِشمنون دسی کا آزاد آگرہ،
 تا آمہ بیدون ہیچ واہیمہ ای، آبی عبادت بگرم،
 ۷۵ چّی حضوری کا،
 قدوسیت و صالحی نہ، تا عُمرمون استہ.
 ۷۶ و تہ نہ، ای خردن، خدای متعالی پیغمبر بواتین؛
 چوم خدانندی نارنارہ بَشیش تا چّی راہ حاضر آگری،
 ۷۷ و چّی قومی خوردار بگری
 کہ چوون گناہ اون بَخیشتہ بیہ نہ، اون نجات پیدا بگردین.
 ۷۸ چوم چّمہ خدا رحمتی واسی استہ کہ،
 صِب آفتاو عرش برینی کا آمہ را پرا
 ۷۹ تا گسونی را دتاوہ کہ تاریکی کا و مرگی سا دیلہ کا نِشتینہ،
 و چّمہ قدمون صلح و سلامتی یہ راہ را ہدایت بگرہ.
 ۸۰ و اما آخردن یال آبی و روح کا قوی بی و تا روزی کہ بہ قوم اسرائیل آشکارا
 ظاہر آبو، ویاوونی کا بَمندی.

۲

عیسی دنیا اوّمہ

۱ روزون کا، آگوستوس کہ رومی امپراطور بہ، فرمان دوشہ کہ رومی
 امپراطوری گردی کا سر شماری بگرن. ۲ ام اولین سر شماری بہ و آزمانی کہ
 کورینیوس سوریه فرماندار بہ انجام بی. ۳ بس، ہر کسی شہ اِشْتَن شہری را تا
 نوم نویسی بگرہ. ۴ یوسف نی ناصرہ شہری نہ کہ جلیلی ولایتی کا بہ اوّمہ
 یہودیہ ولایت، بیت لحمی شہر کہ داوود پاتشاہ زادگاہ بہ. چوم یوسف،

داوودی نسل و خاندانی کا بہ۔^۵ یوسف شہ او آتا اِشْتَن پِیَوندی نہ، مریمی نہ کہ حامیلہ بہ، نوم نویسی بگرہ۔^۱ وختی کہ او آکا بینہ، مریمی زایمانی وخت آرستہ^۷ و مریم اِشْتَن اَوّلین خِرَدنی کہ زوئہ بہ دنیا وِرْدِشہ۔ آبی قِنْدَاقی کا دِپِیچِیستِشہ و آخوری کا خِساوونْدِشہ، چوم مِهمونخونہ کا اوون را جِگا نہ۔

شونہ ان و ملائیکہ ان

۸^ا منطقه کا، شونہ اِنی مند بینہ کہ صحرا کا بَمَنَدین و شو اِشْتَن رَمہ کا نگہبانی بگردین۔^۹ اِپی دفعہ خِداوندی ایلہ ملائیکہ اوون را ظاہر آہ، و خِداوندی شکوہ و جلالی نور چوون اَطرافی کا دتاویستہ۔ شونہ اِن بَرک تَرسینہ۔^{۱۰} ملائیکہ اوون نہ وائشہ: «مترسہ، چوم کہ از شَمہ را شادہ خَوری ہِسْتِمہ، بَرک شادہ خَوری کہ اِم قومی گِرْدِ مردمی را اِستہ:»^{۱۱} چوم اوری داوود پائشاه شہری کا نجات دہندہ ای شَمہ را دنیا اومہ کہ مَسِیح و خِداوند اِستہ۔^{۱۲} چِپی نیشونہ شَمہ را اِمہ کہ ایلہ خِرَدنی قِنْدَاقی کا دِپِیچِیستہ و آخوری کا خِتہ بَویندیرون۔»^{۱۳} اِپی دَفَعہ اِپی لشکر اَسْمونی یہ ملائیکہ، اِ ملائیکہ نہ ظاہر آیینہ کہ خِدا ستایش بگردین و بواتین:

«^{۱۴} عَرش بَرینی کا بَر خِدا جلال بپو،

و زمینی کا مردمی را کہ خِدا اوون کا راضیہ صلح و سقی بپو.»

۱۵^ا وختی ملائیکہ اِن چوون وری نہ شینہ بہ اَسْمون، شونہ اِن یندی نہ وائشونہ: «باین بَشَم بیت لِحمی شہری را و اِم اِتْفَاقی کہ دَلگہ و خِداوند، اِمہ آبی کا خَوَر دار گردشہ، بویتم.»^{۱۶} بَس تاویستہ شینہ و مریم و یوسف و آ خِرَدنی کہ آخوری کا خِتہ بہ تَلْفَتِشونہ۔^{۱۷} وختی خِرَدنی ویندِشونہ، گفی کہ دربارہ آ خِرَدن اوون نہ وائہ بیہ بہ، پخش آگردشونہ۔^{۱۸} ہر کسی کہ دَرَسی، شونہ اون گفی کا تعجب بگردی۔^{۱۹} ولی مریم گِرْدِ اِم چیبون اِشْتَن خاطرہ کا غَم ہرِیستہ و دربارہ چوون اِشْتَن دِلی کا فیکر بگردی۔^{۲۰} شونہ اِن آگردینہ و گِرْدِ چیبونی و اسی کہ دَرَسہ و ویندِشون بہ خِدا حمد و ستایش بگردین، چوم گِرْدِ چیبونی کہ اوون نہ وائہ بیہ بہ اِتْفَاق دَلگہ بہ۔

عیسی بواردین معبد

۲۱^ا ہشتمین روزی آخری کا، وختی خِرَدنی خِتتہ وخت آرستہ، چِپی نومی عیسی، پَنوشونہ۔ عیسی ہ نومی بہ کہ مریمی حامیلہ بیہ پیش، ملائیکہ مریمی نہ وائش بہ۔

۲۲ وختی آ موقع آرسته که مطابق موسی شریعت، تطهیر بییه مراسمی انجام بدن، یوسف و مریم، عیسی و ردشونه اورشلیم، تا تقدیم خداوند بگرن. ۲۳ هته که خداوندی شریعتی کا نیویشته بییه: «هر اولین زوئه ای که دنیا با خداوندی را وقف بیی.» ۲۴ و هته که خداوندی شریعتی کا واته بییه قربونی بگرن یعنی: «ای جفت قمری یا دیکه گفته کیجه.»

۲۵ آزمانی کا، اورشلیمی شهری کا مردی زندگی بگردی که چپی نوم شمعون به. اصالح و خدا ترس به و ا کسی منتظر به که قوم اسرائیلی آزاد آگره. شمعون روح القدسی کا پور به. ۲۶ روح القدس بیی آشکار آگردش به که تا خداوندی مسیح موینه، نیره. ۲۷ بس شمعون روح القدسی هدایتی نه اومه یهودیون معبدی دیله و وختی عیسی دده ننه خردنی و ردشونه تا شریعتی دبی ای را انجام بدن، ۲۸ شمعون خردنی گشه آگتسه و خدا ستایش گردشه و واتشه:

« ۲۹ حسه ای خداوند، هته که وعده دواره،

اشته نوکری آرامشی نه دنیا کا ببه.

۳۰ چوم چمن، چمن اشته نجاتی ویندشونه،

۳۱ هه نجاتی که گرد آدمون چمی پیشی کا آماده آگردزه،

۳۲ هه نوری که حقیقتی، اجنبیون را آشکار آگره

و اشته قوم، اسرائیلی عزت احترامی باعث بیی.»

۳۳ عیسی دده ننه، گفونی کا که درباره چپی واته به، حیرون بینه. ۳۴ دومله

شمعون آوون را خیره دعا گردشه و مریمی نه، عیسی ننه نه واتشه: «دیس، ام

خردن انتخاب بییه تا قوم اسرائیلی دیله کا ور گسون برگنسته و پرشته باعث

ببو. ام خردن ایله نیشونه ای بیی که، ایی نه ضدیت بگردین. ۳۵ اشته دیلی کا

نی قمه ای دشو تا انته ور گسون دیلی فیکرن آشکار آبون.»

۳۶ اوآکا، ژنی زندگی بگردی که پیغمبر به و چپی نوم حنا به. حنا فنوئیلی کله

آشیری قبيله کا استبه که ور پیر به. حنا ازدواج کرده پش هفت سال اشن شو

نه زندگی گردشه و دومله چپی شو مرده، ۳۷ و تا هشتاد و چار سالگی ویوه مند

به. آ هرگز معبدی کا برون نیمشی، بلگم شو آنده روز دعا و روزه نه خدا

پرستش بگردی. ۳۸ حنا نی هه موقع اومه نار و خدا شکور گردشه، گرد گسونی را

که اورشلیمی آزادی چم به راه بینه، درباره عیسی گف زندشه.

۳۹ وختی که یوسف و مریم مطابق خداوندی شریعت گرد کارون انجام

دوشونه، آگردینه اشن شهر ناصره را، که جلیلی ولایتی کا استبه. ۴۰ آ خردن یال

آبی و قوی بی. اِحکمتی نه پور به و خدا را عزیز به.

نو پرسته عیسی یهودیون معبدی کا

۴۱ عیسی دده ننه هر سال پسخ عیدی را بشین به شهر اورشلیم. ۴۲ وختی عیسی دوزه ساله به، اون همیشه دبی شیوار عیدی را شینه به اورشلیم. ۴۳ وختی عیدی روزن تمون آینه، اون راه دلکینه که آگردن اشن شهر ولی نو پرسته عیسی اورشلیمی کا منده. عیسی دده ننه امی نیمزنین، ۴۴ بلگم چوم فیکر بگردین عیسی کاروونی دیله کا استه، اپی روز کامل اشن سفری ادامه دوشونه. آخرسر، دمندینه اشن خویشون و آشنایون دیله کا عیسی دومله گردینه. ۴۵ وختی نیشاستشونه عیسی بتلفین، آگردینه اورشلیم تا چپی دومله بگردن. ۴۶ سه روزه پش، عیسی معبدی کا تلفتشونه. معلمون دیله کا نشتبه و چوون گفون گوش بدای و اوون کا سوالونی دفرسی. ۴۷ هر کسی چپی گفون درسی، چپی فهمی کا و جواوونی کا که بدای، تعجب بگردی. ۴۸ وختی عیسی دده ننه آبی اوآکا ویندشونه، مات آینه. عیسی ننه آبی نه وایشه: «چمن زوئه، چیرا امه نه انته بگردیش؟ دپس اشته دده و از وره تشویشی نه اشته دومله گردیمون.» ۴۹ عیسی وایشه: «چیرا چمن دومله گرده؟ مگم نیمزنیرون که از بسی چمن دده ک کا بوم؟» ۵۰ اما اون چپی ام گفی معنی نزنویشونه. ۵۱ عیسی اوون نه راه دلکه و شه ناصره شهری را و چوون مطیع به. چپی ننه گرد ام چیبون اشن دیلی کا غم هری. ۵۲ عیسی حکمت و قامتی کا، کارا یال آبی و هم خدا وری کا عزیز به، هم مردمی وری کا.

۳

یحیی تعمید دهندہ، مسیح موعودی راه آمادہ آگرہ

۱ تیرپوسی امپراطری پونزدہمین سال حکومتی کا، وختی پنتیوس پیلاٹس یهودیہ فرماندار به، ہیرودیس جلیلی ولایتی حاکم به. چپی برا فیلیپس ایتوریہ و تراخونیتسی ولایتون حاکم به، و لیسانیوس آبیلینی ولایتی حاکم به. ۲ ه موقعی کہ حنا و قیفا کهنون اعظم بینہ، خدا کلام ویاوونی کا بہ یحیی، کہ زکریا زوئه به، نازل به. ۳ یحیی اردن رواری دور و اطرافی گرد نواحی را بشی و اعلام بگردی کہ مردم اشن گناہ اون بخشستہ را توبہ بگرن و غسل تعمید بگرن. ۴ دربارہ

إم، اِشْعِيَايِ پيغمبري گفون کيتايي کا نيويشته بييه که:
«اي نفر وياووني کا بلنده سسي نه بواتي:
”خداوندي راه حاضير آگره!»

چي اومه را دوز آگره!
°گرد دَرَه اِن پور آبون، و گرد کوه اِن و کولن صاف آبون،
گچه راه اِن، راست آبون و ناهمواره راه اِن هموار آبون.
ا و گرد آدَمِن خِدا نِجَاتِي بُويندين.“»

۷يحيي، ا جماعتي نه که غسل تعميد گتِه را بومين چي وَر، بواتي: «اي آفي کتِه اِن، کي شِمَه هشدار دوعشه تا غَضْبِي کا که کارا بومي دَوَرَه؟^۸ شِمَه اعمالي نه نيشون بدييه که توبه رون گرده و اِشْتَن نه مواجِه که: ”آمه ابراهيم پيغمبري نَسلي کا ايمونه.“ چوم که شِمَه نه بواتيم خِدا قَادِرَه اِم سِنگون کا ابراهيمي را خِرْدَنوني خَلق بَگَرِه.^۹ حتى حِسَه تَبَرِي تيشه، آرسته دارون بِن و بِنَجَقِي کا. هَر داري که چاک ميوه مَدَه، دَوِرِن و آتشي ديله کا دَرْفَنِن.“»

۱۰جماعت يحيي کا دَفَرَسشونه: «بَس اَمَه چه بَگَرِم؟»^{۱۱} يحيي جَواو دوشه: «گسي که دِ گِلَه خَلا هِسْتِشَه، ايله آدَه ا کسي که نيشه، و کسي که خوراک هِسْتِشَه ني، هِنْتَه بَگَرِه.»^{۱۲} باجگيرن ني اومينه تا غسل تعميد بَگَرِن. اُون يحيي کا دَفَرَسشونه: «اُستاد، اَمَه چه بَگَرِم؟»^{۱۳} يحيي اوون نه واتيشه: «اُاندازه اي کا که مُقَرر بييه وِرْتَر خَرَاج مَوِيگَرِه.»^{۱۴} سَرِيازَن ني آي کا دَفَرَسشونه: «آمه چه بَگَرِم؟» يحيي اوون نه واتيشه: «گسي کا زوري نه پول مَوِيگَرِه، هيچکسي بُخْتون مَرَنَه و شِمَه مُزدي نه قانع بِيِيَه.»

۱۵مردم چم به راه بينه و گرد اِشْتَن نه فيکر بَگَردين که آيا مُمکنه يحيي هَه مسيح موعود ببو يا نه؟^{۱۶} يحيي جَواو گرد اوون را اِم به: «اَز شِمَه آوي نه تعميد بَدَايم، ولي گسي که به مَن کا فُدرتمندتره کارا بومي. هَه کسي که اَز لايق نيَمَه چي گفشون بَندون آگَرِم. ا شِمَه روح القدس و آتشي نه غسل تعميد بَدَاي.^{۱۷} ا اِشْتَن چَنگکي دَسِي کا دَارَه تا اِشْتَن خَرْمِي تَميز آگره و گنِدمي اِشْتَن اَنباري کا جَمع آگرِه، اَمَّا کِلْشي، آتشي ديله کا سونه که دَكِشْتَه نييب.»

۱۸بَس يحيي وَرَه نصيحتون و تشويقون نه مردمي را شاده خَوَرِي اِعلام بَگَردي.^{۱۹} اَمَّا يحيي، هيروديس حاکمي سَرزنش بَگَردي. چوم هيروديس اِشْتَن بَرَا رِنِي، هيروديا بَرْدَش به و وِر دِيير بَدَه کاروني گردش به.^{۲۰} هيروديس، يحيي دَرْفَنِدِشَه زَنَدَانِي کا و اِنْتَه اِشْتَن بَدَه کارون سَرِي کا اِمِي ني اِضافَه آگرِدِشَه.

عیسی غسل تعمید گیتہ

۲۱ وختی کہ مردم گرد غسل تعمید بگتین و عیسی نی غسل تعمید گتیش بہ و کارا دعا بگردی، آسیمون آبینہ ۲۲ و روح القدس جسمی کا، ایله گفتری شیوار اومہ جیر چپی سر و سسی آسیمونی نہ اومہ کہ: «تہ چمن عزیزگرامیہ زوئہ ایش، و آرتہ کا راضیمہ.»

عیسی شجرہ نومجہ

۲۳ عیسی تقریباً سی سالہ بہ کہ ایشن خدمتی شروع کردشه. مردم خیال بگردین عیسی، یوسفی زوئہ بہ، و یوسف ہلی زوئہ، ۲۴ ہلی متاتی زوئہ بہ، متات لای زوئہ، لای ملکی زوئہ، ملکی یٹا زوئہ و یٹا یوسفی زوئہ استبہ، ۲۵ یوسف متاتیا زوئہ بہ، متاتیا عاموسی زوئہ، عاموس ناحومی زوئہ، ناحوم جسیلی زوئہ و جسیلی نجی زوئہ استبہ، ۲۶ نجی معتی زوئہ بہ، معت متاتیا زوئہ، متاتیا سمعینی زوئہ، سمعین یسکی زوئہ و یسک یھودا زوئہ استبہ، ۲۷ یھودا یوحنانی زوئہ بہ، یوحنان ريسا زوئہ، ريسا زروبابل زوئہ، زروبابل شئلتییلی زوئہ و شئلتییل نیری زوئہ استبہ، ۲۸ نیری ملکی زوئہ بہ، ملکی آدی زوئہ، آدی قوصامی زوئہ، قوصام المادامی زوئہ و المادام عیری زوئہ استبہ، ۲۹ عیر یوشع زوئہ بہ، یوشع العازاری زوئہ، العازار یوریمی زوئہ، یوریم متاتی زوئہ و متات لای زوئہ استبہ، ۳۰ لای شمعون زوئہ بہ، شمعون یھودا زوئہ، یھودا یوسفی زوئہ، یوسف یونامی زوئہ و یونام الیاقیمی زوئہ استبہ، ۳۱ الیاقیم ملیا زوئہ بہ، ملیا متا زوئہ، متاتا ناتانی زوئہ و ناتان داوود پاتشا زوئہ استبہ، ۳۲ داوود یسا زوئہ بہ، یسا عوبیدی زوئہ، عوبید بوغزی زوئہ، بوغز سلمونی زوئہ و سلمون نحشونی زوئہ استبہ، ۳۳ نحشون عمینادابی زوئہ بہ، عمیناداب رامی زوئہ، رام حصرونی زوئہ، حصرون فریسی زوئہ و فریص یھودا زوئہ استبہ، ۳۴ یھودا یعقوبی زوئہ بہ، یعقوب اسحاقی زوئہ، اسحاق ابراہیمی زوئہ، ابراہیم تارچی زوئہ و تارح ناحوری زوئہ استبہ، ۳۵ ناحور سروجی زوئہ بہ، سروج رعوی زوئہ، رعوی فلیجی زوئہ، فلیج عیری زوئہ و عیر شلخی زوئہ استبہ، ۳۶ شلخ قینانی زوئہ بہ، قینان آرفکشادی زوئہ، آرفکشاد سامی زوئہ، سام نوحی زوئہ و نوح لیمکی زوئہ استبہ، ۳۷ لیمک متوشالچی زوئہ بہ، متوشالچ خنوخ زوئہ، خنوخ یاردی زوئہ، یارد مہللئیلی زوئہ و مہللئیل قینانی زوئہ استبہ، ۳۸ قینان آنوشی زوئہ بہ، آنوش شیثی زوئہ، شیث آدمی زوئہ و آدم خدا زوئہ استبہ.

عیسی آزمایشون کا

۱ عیسی روح القدسی کا پور، اُردن رِواری نہ آگرَدَہ و خِدا روح، آبی ویاوونی کا ہدایت بگرَدی۔ ۲ او آکا چل روز اِبلیس آبی و سوسہ گرَدِشہ۔ عیسی آ روزون کا چپی نیپرَدشہ، و امدتی آخِری کا، و شیش بہ۔ ۳ اِبلیس عیسی نہ و اِشہ: «اگم تہ خِدا زوئہ ایش، اِم سِنگی دستور بَدہ کہ نون آبو.» ۴ عیسی جَواو دوشہ: «توراتی کا نیویشتہ بیہ کہ ”انسان فقط نونی نہ زندہ نیہ.“» ۵ دوملہ اِبلیس، عیسی بَرَدشہ بَلنَدہ جگاپی و اپی لَحظہ کا گِرد دنیا پاتشاپی اون آبی نیشون دوشہ ۶ و و اِشہ: «از گِرد اِم قدرت و تمون چپی شکوہ و جلالی آدَم بہ تِن، چوم بہ مَن دَسپَرَدہ بیہ و آز آبی بہ ہر کسی کہ پیستِمہ آدَم. ۷ بَس اگم مَن پرستش بگری، اِمَن گِرد اِشتہ شِن بَبین.» ۸ عیسی جَواو دوشہ: «توراتی کا نیویشتہ بیہ کہ،

”خداوند، اِشتہ خِدا پرستش بگہ

و فقط آبی عبادت بگہ.“»

۹ دوملہ اِبلیس، عیسی بَرَدشہ اورشلیمی شہری را و آبی معبدی بومی تکی سَری کا نوشہ و و اِشہ: «اگم تہ خِدا زوئہ ایش، اِشتن اییا کا فِرآدہ جیری را، ۱۰ چوم داوودی زبوری کا نیویشتہ بیہ:

”آ، اِشتن ملائیکہ اون دربارہ تہ دستور بَدای

تا تہ کا محافظت بگرن.“

۱۱

”اون تہ اِشتن دَسون سَری کا بَرَدین،

نبا اِشتہ پا سِنگی کا بَرُنی.“»

۱۲ عیسی یی جَواو دوشہ: «توراتی کا نیویشتہ بیہ کہ، ”خداوند، اِشتہ خِدا اِمتحان مگہ.“» ۱۳ وختی اِبلیس گِرد اِم و سوسہ اون تَمون آگرَدِشہ، تا ایلہ فرصت دیتَر عیسی ول آگرَدِشہ.

عیسی خدمتی شروع بیہ جلیلی کا

۱۴ عیسی روح القدسی قدرتی نہ آگرَدَہ جلیلی ولایتی را و چپی خَوَر گِرد آ نواحی کا دَپِچِیستہ. ۱۵ عیسی یہودیون عبادتگاہ اون کا دَرس بَدای، و گِرد

مردم آبی کا تعریف بگردین.

۱۶ عیسی شہ ناصرہ را، ہ شہری کہ اوآ کا یال آتہ بہ. آ ہمیشہ شیوار، یہودیون مقدس شنبہ روزی کا شہ عبادتگاہ و پرشتہ تا خدا کلامی بوخونہ. ۱۷ اشعیای پیغمبری طوماری آدوشونہ بی. عیسی طوماری آگردشہ و ہ جگابی پیدا گردشہ کہ نیویشتہ بییہ:

« ۱۸ خداوندی روح بر من استہ،

چوم کہ من انتخاب گردشہ

تا فقیرون را شادہ خوری اعلام بگرم،

و من ویسا آگردشہ کہ آسیرون را، آزادی اعلام بگرم،

و کورون را، بینایی اعلام بگرم،

و ستمدیده اون، آزاد آگرم،

۱۹ و خداوندی لطفی سالی اعلام بگرم.»

۲۰ دوملہ عیسی طوماری ذبیحیستشہ و آدوشہ عبادتگاہ خادمی و نشتہ. عبادتگاہ کا گرد مردم زول ژندشون بہ، بہ عیسی. ۲۱ عیسی دمنده گف ژندہ و واتشہ: «اوری وختی ام نیویشتہ درسیرون، بہ انجام آرتہ.» ۲۲ گرد عیسی چاکی بواتین و چپی پور لطفہ گفونی کا کہ چپی گ کا برون بومی خیرون بینہ و بواتین: «بگم ام یوسفی زونہ نییہ؟» ۲۳ عیسی آوون نہ واتشہ: «بیدون شک دربارہ چمن ام مٹلی بواتیرون کہ ”ای طبیب اشن شفا بدہ! آ چیونی کہ دَرَسْمونہ تہ گفرناحومی شہری کا انجام دوارہ، اییا ایشہ شہری کا نی انجام بدہ.» ۲۴ دوملہ عیسی واتشہ: «حقیقتاً شمہ نہ بواتیم کہ ہیچ پیغمبری، اشن شہری کا قبول نییب. ۲۵ یقین بزونہ کہ ایلای پیغمبری دورانی کا، وختی کہ آسمونن سہ سال و نیم دوستہ بینہ و برک قحطی آ سرزمینی سرتاسری گتیشہ، وزہ ویوہ ژنکونی اسرائیلی کا بینہ. ۲۶ اما ایلایا چوون ہیچ گلہ ور ویسا آتہ، مگم آ ویوہ ژنی ور کہ صرفہ شہری کا، صیدونی منطقہ کا بہ. ۲۷ ایشع پیغمبری دورانی کا نی، وزہ جذامیونی اسرائیلی کا بینہ، ولی اون ہیچ گلہ شفا نکتشونہ، سوریه ای یہ نَعْمانی غیراز.» ۲۸ گرد کسونی کہ عبادتگاہ کا بینہ، ام گفون دَرَسہ نہ برک عصبانی بینہ ۲۹ و پرشتینہ، عیسی بردشونہ شہری کا برون و بردشونہ ہ کوهی لوی سر کہ شہر چپی سری کا بینا بییہ بہ، تا اوآنہ آبی فرآدن جیر. ۳۰ اما عیسی چوون دیلہ کا دویردہ و شہ.

تور و دیوونہ مردی شفا

۳۱ دومله عیسی اومه به گفرناحوم که جلیلی ولایتی ایله شهرون کا استبه. و مقدس شنبه روزی کا مردمی تعلیم دوشه. ۳۲ مردم چپی تعلیمون کا مات آبه بینه، چوم اقتداری نه گف رنی. ۳۳ عبادتگاه کا تور و دیوونه مردی به که پلیده روحش استبه. ا مرد پلنده سسی نه خلیع ژنده که: ۳۴ «ای عیسی ناصری، اومه نه چه کارر استه؟ آیا اومیش اومه نابود پگری؟ بزنیم ته کیش؛ ته هه قدوس، خدا استیش!» ۳۵ ولی عیسی آپی را زره گیشه و واتشه: «ساکیت ببش ویی کا برون برا!» ا موقع دیو، گردی پیشی کا ا مردی زمین ژنده و بیدون ام که یی آسیی بزنه، آپی کا برشه. ۳۶ مردم گرد خیرون بینه و یندی نه بوتاین: «ام چننه ره گفی استه؟ ا، اقتدار و قدرتی نه پلیده روح اون دستور بدای و اون آدمون کا برشون!» ۳۷ انته عیسی کارون خور گرد انواحی کا دپیچیسته.

پطرسی ژن ننه شفا و ور کسون دیری شفا

۳۸ عیسی پرشته عبادتگاه نه اومه برون و شه شمعوئی ک. شمعوئی ژن ننه برک توی دارسته. اون عیسی متت گردشونه که آرئی کمک پگره. ۳۹ عیسی آرئی گفای نه سری کا منده و توی را زره گیشه، چپی تو قطع آبه. آرئی البخل پرشته و دمنده اوون کا پذیرایی کرده. ۴۰ مغریب دم، گرد کسونی که، مریضونی دارین که جور به جوره درد و مریضون استبه، وردشونه عیسی ور و عیسی ایشن دسی گله گله چوون سری کا پنوشه و اوون شفا دوشه. ۴۱ دیون نی ور کسون کا برون اومینه و خلیع ژنین بوتاین: «ته خدا زوئه ایش!» اما عیسی اوون را زره گری و اجازه نیمدای گف بزنین، چوم اون بزنین که عیسی هه مسیح موعود استه.

عیسی عبادتگاه کا تعلیم بدای

۴۲ صباپی نه روز صبی زو، عیسی شه دور افتاده چگای را. مردم عیسی دومله گردین و وختی آرستینه به چگای که اوآکا به، ثقلا گردشونه که مرزن بشو. ۴۳ اما عیسی واتشه: «آز بسی خدا پائشاپی شاده خوری دیر شهرون را نی اعلام پگرم، چوم که ویسا آبییمه هم کاری انجام بدم.» ۴۴ و عیسی یهودیه ولایتی عبادتگاه اون کا تعلیم بدای.

۱۱) ای روز که عیسی چنیسارتی دریاچه وری کا مندَه به و مردم هر طرفی نه یی هجوم بوآردین تا خدا کلامی دَرَسِن، ۲ عیسی دریاچه گناری کا دِ گِلَه لوتکا ویندِشه که صیادِن آوون کا ویرمه بینه و کارا اِشْتَن ماشکون شورین. ۳ عیسی ایله آ لوتکا اون کا دَنِشته که شَمعوئی شِن به و یی کا پیستِشه که لوتکا تلی ساحلی کا دور آگرِه. دومله نِشته و لوتکا دیله نه آدمی تعلیم دوشه. ۴ وختی عیسی گفن تَمون آبینه، شَمعوئی نه واتِشه: «لوتکا ببه دریاچه عمیق چگا را و شَمَه ماشکون مایِ گِته را آوی دیله کا دَرَفَنه.» ۵ شَمعون جَواو دوشه: «اُستاد، امه تَمون شو بَرک زحمت گَشْمونه و اصلا هیچی گِتمون نییه. اما حِسَه چوم تِه بَواتیش، ماشکون دَرَفَنَم آوی دیله.» ۱ وختی اُون اِنْتَه گَرْدِشونه، هِندی مایِ گِشونه که چوون ماشکِن کارا پَله بَبین! ۷ بَس اُون اِشْتَن هَمکارون را، که آ ایله لوتکا کا مَند بینه اِشاره گَرْدِشونه که چوون کمکی را بان. اُون اومینه و هر دِ گِلَه لوتکا هِندی مایِ نه پور آگرْدِشونه که نزدیک به آوی دیله کا ویشون. ۸ وختی شَمعون پطرس امی ویندِشه، عیسی پا دَلکه و واتِشه: «ای خدِاوند، به مَن کا دور آبو، چوم از مَرْدی گناه کاریمه!» ۹ شَمعون و گِرد چپی هَمراه اِن مایِ اون گِته ماجرا کا مات و مَبهوت بینه. ۱۰ یعقوب و یوحنا، زبیدی زوئه اِن، نی که شَمعوئی هَمکار بینه، هَ حالی دارین. عیسی شَمعوئی نه واتِشه: «مَتْرَس، چمی پَش آدمون صید بگرْدیش.» ۱۱ وختی اُون اِشْتَن لوتکا اون وَرْدِشونه ساحل، همه چی ول آگرْدِشونه، شینه عیسی دومله.

ایله جُذامی یه مَرْدی شفا

۱۲) وختی که عیسی ایله شَهرون کا به، مَرْدی اومه که جُذام چپی جانی گِردی گِتش به. وختی آ جُذامی عیسی ویندِشه، چپی پا دَلکه و مِتت گَرْدِشه، واتِشه: «آقا، اگم تِه پپیش بَشای مَن شفا بَدی.» ۱۳ عیسی اِشْتَن دَسی دراز آگرْدِشه و آبی دَس آسوشه و واتِشه: «بیسْتِمَه، شفا بَگه!» ۱۴ اَلْبَحَل ا مَرْد جُذامی کا شفا گِتشه. ۱۴ دومله عیسی آبی سفارش گَرْدِشه که اِم ماجرا هیچکسی نه مواجه ولی آبی نه واتِشه که: «بَش و اِشْتَن، کاهنی نیشون بَدَه و قِرْبونی ایی بَکه که مخصوص شفا اِسته، هَ قِرْبونی که موسی پیغمبر حُکم گَرْدِشه، تا آوون را ثابت بَبو که تِه شفا گِتره.» ۱۵ ولی با اِم حال عیسی کارون خَوَر وِرْتَر پَخش آبی، و یال جماعتونی جمع آیین تا چپی گُفون دَرَسِن و اِشْتَن درد و مَرَضون کا شفا بَگرن. ۱۶ ولی عیسی بَشی دور افتاده چگا اون را و دعا بَگَرْدی.

ایفلیجِ مردی شفا

^{۱۷} ایله آ روزون کا، وختی کہ عیسیٰ تعلیم بدای فریسی فرقه علما و توراتی معلمین نی گِردہ جلیل و یہودیہ ولایتون کا و اورشلیمی شہری کا اومہ بینہ و اوآکا نِشت بینہ. خِداوندی قدرت عیسیٰ نہ بہ تا مریضون شفا بدہ. ^{۱۸} اپی دفعہ چن گِله مرد اومینہ کہ ایله اِفلِجی چِپی دوشکی نہ کارا بوآردین. اُون تَقْلا بگردین آپی بَبرین ک دیلہ و عیسیٰ پیشی کا بَن. ^{۱۹} اما چوم جماعتی وِر بییہ واسی نِشاستِشونہ آ ایفلیجی بَبرن ک دیلہ، پشینہ بومی سَر و سَقفی سَفالون میانہ کا آ ایفلیجی چِپی دوشکی نہ ویسا آگردِشونہ جیر و جماعتی وسطی کا نوشونہ عیسیٰ پیشی کا. ^{۲۰} عیسیٰ وختی چوون ایمانی ویندِشہ و اِتِشہ: «ای مرد، اِشْتہ گناہ اِن بَخِشْتہ بینہ!» ^{۲۱} توراتی معلمین و فریسیین اِشْتن نہ فیکر بگردین کہ: «ام کیہ کہ کُفر بَواتی؟ خِدا غِیراز کی بَشای گناہ اُون بَخِشہ؟» ^{۲۲} عیسیٰ کہ چوون فیکری بَرنی دَقْرَسْشہ: «چیرا شَمہ دیلون کا اِنْتہ رہ فیکرون بگردیرون؟» ^{۲۳} گمیلہ گفی و اِتہ راحتَر اِستہ: «اِشْتہ گناہ اِن بَخِشْتہ بینہ» یا اِم کہ «پرز و راه بَش»؟ ^{۲۴} اما اِمی واسی کہ بَرونہ اِنسانی زونہ، زمینی کا اِختیارِش اِستہ گناہ اُون بَخِشْہ» آ اِفلِجِ مردی نہ و اِتِشہ: «تِہ بَوَاتیم، پرز، اِشْتہ دوشکی پگہ و بَش ک!» ^{۲۵} آ مِرد اَلْبَحْل، چوون چمی پیشی کا پَرشْتہ، آ دوشکی کہ چپی سَری کا خِتہ بہ پِگتِشہ و خِدا شُکر گردہ گردہ، شہ ک. ^{۲۶} گرد اُون اِم ماجرا کا حَیرون بینہ، خِدا ستایش گردِشونہ و تَرس چوون جانی کا دَلکہ بہ، و بَوَاتین: «اوری چنْتہ رہ عَجیب چییون ویندِمونہ.»

لاوی دعوت

^{۲۷} دوملہ عیسیٰ آ ک کا اومہ برون و ایله باجگیری ویندِشہ کہ باج ویگتہ دگہ کا نِشت بہ. چپی نوم لاوی بہ. عیسیٰ آیینہ و اِتِشہ: «چمین دوملہ بری.» ^{۲۸} لاوی پَرشْتہ، ہمہ چی اوآکا نوشہ و عیسیٰ دوملہ شہ. ^{۲۹} لاوی عیسیٰ را اِشْتن ک کا یال مِهمونی دوشہ. وِرہ جماعتی، باجگیری و دِیتر مِهمونون کا آوون نہ سِفرہ سَری کا نِشتینہ. ^{۳۰} فریسی فرقه علما و اپی گروه توراتی معلمون کا کہ چوون فرقه کا بینہ، عیسیٰ شاگردون را غُرْغُر بگردین و بَوَاتین: «چیرا شَمہ باجگیری و گناہ کارون نہ ہرہ و ہنچہ؟» ^{۳۱} عیسیٰ چوون جواوی کا و اِتِشہ: «مِریضین طَبیب پیستِشونہ، نہ سَالِمین. ^{۳۲} آز اومِیَمہ گناہ کارون دعوت بَگِرم توبہ بَگِرن نہ کسونی کہ صَالِحی نہ.»

سوال دَفْرَسِه دربارہ روزہ گیتہ

۳۳ اون عیسیٰ نہ واتشونہ: «یحییٰ شاگردن معمولا روزہ گرن و دعا گرن، فریسیون شاگردن نی ہتہ گرن، اما اِشْتِه شاگردن ہرن و ہنچن.» ۳۴ عیسیٰ جواو دوشہ: «بگم بی عروسی میہمونون مَجبور بگرہ، تا وختی کہ زما اوون نہ استہ، روزہ بگرن؟» ۳۵ روزونی بومین کہ زما اوون کا ویگتہ بی. آ روزون کا، اون نی روزہ گرن.» ۳۶ عیسیٰ اوون را اِم مَثَلیٰ نی وَرْدِشہ: «ہیچکس ایلہ تازہ خَلایٰ کا کہ آو دَشہ نییہ ای تیکہ نِدَوْرہ کہ آیینہ گنہ خَلَا پینہ بگرہ. اگم اِنْتہ بگرہ، ہم آ تازہ خَلَا پلہ بی و ہم تازہ تیکہ پارچہ، گنہ خَلَا را ناجورہ وصلہ استہ. ۳۷ ہیچکس نی تازہ شَراوی گنہ مَشکون کا نِدَگرہ. اگم دَگرہ، چوم تازہ شَراو خَلَا گازش استہ مَشکِن پِزِرِن، شَراو ویو و مَشکِن آز پین بَشین. ۳۸ بَلگم تازہ شَراوی بَسی تازہ مَشکون کا دَگرم. ۳۹ ہیچکس نی گنہ شَراوی ہنْتہ پِش، تازہ شَراو نِپِستِشہ، چوم بواتی: ”گنہ شَراو چاکتَرہ.“»

۶

کارگردہ شنبہ روزی کا

۱ یہودیون ایلہ مقدس شنبہ روزی کا، ہتہ کہ عیسیٰ گندِمہ جارون دیلہ نہ کارا دَوپیری، چپی شاگردن گندِمی خوشہ اون سَری چینین و اِشْتِن دَسون تونی کا دَسونین و ہرین. ۲ اما فریسیون فرقہ علما کا بعضی اِن واتشونہ: «چیرا شِمہ کاری بگردیرون کہ مقدس شنبہ روزی کا جایز نییہ؟» ۳ عیسیٰ جواو دوشہ: «مگم خندہ رون نی وختی کہ داوود پاتشاہ و چپی یارن وِشی بیئہ، داوود چہ گردشہ؟ ۴ چنتہ داوود دَشہ خِدا ک دیلہ، تقدیس بییہ نونی پِگتِشہ، ہرْدِشہ و اِشْتِن یارون نی آدوشہ، اَنونی کہ چپی ہرْدہ معبدی کاهنون غِیراز، ہیچکسی را جایز نِبہ.» ۵ عیسیٰ اوون نہ واتشہ: «انسانی زونہ، مقدس شنبہ روزی صاحب اختیار استہ.»

علیلِ مِردی شَفَا

۱ ایلہ دِیتر شنبہ روزی کا، عیسیٰ شہ عبادتگاہ دیلہ و دَمندہ تعلیم دوعہ. مِردی اوآکا اِستبہ کہ چپی راست دَس خِشک آبہ بہ. ۷ توراتی معلِم و فریسی فرقہ علما، عیسیٰ زیر نظر دارین کہ بویِنن آیا شنبہ روزی کا کسی شفا بدای یا نہ، تا بشان بھونہ ای بَتَلْفِن کہ عیسیٰ بُوختون بَرِنن. ۸ اما عیسیٰ کہ چوون

فیکری بزنی، اَ مردی نه که چپی دَس خِشک آبه به واتشه: «پرز و اییکا پا بومون.» اَ مرد پرشته و اوآکا پا مندَه. ^۹ عیسی آون نه واتشه: «شَمَه کا سوالی هِسْتِمَه، مقدّس شنبه روزی کا چاکی گرده جایز استه یا بدی گرده؟ کسی جانی نجات دوعه یا نابود گرده؟» ^{۱۰} بَس عیسی گرد کسونی که چپی دور و وری کا بینه دیشته و دومله اَ مردی نه واتشه: «اِشته دسی دراز آکه.» اَ مرد اِشْتَن دسی دراز آگردشه و چپی دَس سالم آبه. ^{۱۱} اَما فریسیین و توراتی معلِمِن بَرک خشمگین بینه و یندی نه مشورت گِردشونه که عیسی نه چه بگرن.

دوزه گله خواری انتخاب

^{۱۲} ایله آروزون کا، عیسی دعا گرده را شه ایله کوهی و تَمون شو خِدا حضوری کا دعا گرده. ^{۱۳} صبی سَر اِشْتَن شاگردون سَس گرده و چوون دیله کا، دوزه نفر انتخاب گرده و چوون نومی خواریون نوشه. ^{۱۴} شَمعون که چپی نومی پطرس نوشه و آندریاس شَمعونی برا، یعقوب و یوحنا، فیلیپس و برتولما، ^{۱۵} مَتی و توما، یعقوب خَلفای زوئه و شَمعون که آینه و طن پرست بواتین، ^{۱۶} یهودا یعقوبی زوئه، و یهودا آسخریوط که به عیسی خیانت گرده.

'خَسَه شِمَه بَبو'

^{۱۷} عیسی آون نه کوه کا اومه جیر و همواره زَمینی کا مندَه. وِره جماعتی چپی شاگردون کا و وِره مردمی، گرد یهودیه ولایت، اورشلمی شهر و شهرن ساحلی صور و صیدونی کا، اوآکا مندَه بینه. ^{۱۸} اُون اومه بینه که عیسی گفون دَرَسِن و اِشْتَن درد و مَرَضون کا شفا بگرن؛ کسونی که پلیده روح اِن، آون عذاب بداین نی شفا گِشونه. ^{۱۹} گرده جماعت تَقَّلا بگردین عیسی دَس آسونین، چوم قدرتی عیسی کا برای که گردی شفا بدای.

^{۲۰} دومله عیسی اِشْتَن شاگردون دیشته و واتشه:

«خَسَه شِمَه بَبو که فقیررونه،

چوم خِدا پاتشایی شِمَه شِن استه.

^{۲۱} خَسَه شِمَه بَبو که حِسَه و شیرونه،

چوم شِمَه سیر ببیرون.

خَسَه شِمَه بَبو که حِسَه داد بگردیرون،

چوم شِمَه خورسته دیم ببیرون.

«^{۲۲} خَسَه شِمَه بَبو، وختی که مردم، انسانی زوئه و اسی شِمَه کا بیزار بَبون و

شِمَه اِشْتَن دِيلَه كَا پَرُون بَرگَرِن و شِمَه فَش بَدَن و شِمَه بَدَنوم بَگَرِن. ^{۲۳} هَ رُوژِي
 كَا، شَاد بِيِيَتِه و شَادِي كَا وِشْتَن بَگَرِه، چوم شِمَه پَادَاش اَسِمُونِي كَا يَالَه. چوم كَه
 چَوون جَدَن نِي، پِيغَمبرون نَه اِنْتَه گَرَدَشونَه.
 « ^{۲۴} اَمَا وَاي بَر شِمَه كَه ثِيروَتَمَنديرونَه،
 چوم شِمَه، شِمَه دِيل خوشِي وِيگَترونَه.
^{۲۵} وَاي بَر شِمَه كَه حِسَه سِير اِسْتِيرونَه،
 چوم شِمَه وِشِي بَبِيرون.
 وَاي بَر شِمَه كَه حِسَه كَارَا خورِستِيرون،
 چوم كَه شِمَه مَاتَم بَگَتِيرون و دَاد بَگَرديرون.
 « ^{۲۶} وَاي بَر شِمَه وختِي كَه گِرْد مَرْدَم شِمَه كَا تَعْرِيف بَگَرِن؛ چوم چَوون جَدَن
 نِي، دُورِوَعَه پِيغَمبرون نَه اِنْتَه گَرَدَشونَه.

دِشْمَنون مَحَبَت گَرْدِه

« ^{۲۷} اَمَا شِمَه نَه كَه چِمِن گَفِي دَرَسَه بَوَاتِيْم: شِمَه دِشْمَنون نَه مَحَبَت بَگَرِه، و
 كَسُونِي رَا كَه شِمَه كَا بِيزارِي نَه، چَاكِي بَگَرِه. ^{۲۸} كَسُونِي رَا كَه شِمَه نِيغَرِن
 بَگَرْدِين بَرَكْت طَلَب بَگَرِه، و كَسُونِي رَا كَه شِمَه اَذِيَت اَزَار بَگَرْدِين خِيَرَه دَعَا
 بَگَرِه. ^{۲۹} كَسِي كَه اِشْتَه دِيْمِي سِيلَه رَنَه، اِشْتَه دِيْمِي اَوْرِي نِي چِيِي طَرَف اِگَارْدِن.
 كَسِي كَه اِشْتَه اَبَا بَه تِكا وِيگَرِه، اِشْتَه بَشِي نِي يِي اَدَه. ^{۳۰} كَسِي كَه چِيِي تَه كَا
 پِيستِشَه يِي اَدَه، و كَسِي كَه اِشْتَه مَال و اَمَوَالِي وِيگَرِه، دِ اِي كَا مَپِي كَه تَه پَس
 اَدَه. ^{۳۱} خَلَكِي نَه هَتَه رَفْتَار بَگَرِه كَه پِيستِرونَه اَوْن شِمَه نَه رَفْتَار بَگَرِن.
 « ^{۳۲} اَكَم فَقط كَسُونِي رَا مَحَبَت بَگَرِه كَه شِمَه مَحَبَت بَگَرْدِين، شِمَه رَا چَه
 فَايدَه هِسْتِشَه؟ چوم حَتِي گَنَاه كَارِن نِي اَكَسُونِي رَا كَه اَوون نَه خِشِينَه، مَحَبَت
 بَگَرْدِين. ^{۳۳} اَكَم فَقط كَسُونِي رَا كَه شِمَه رَا چَاكِي بَگَرْدِين چَاكِي بَگَرِه، شِمَه رَا چَه
 فَايدَه هِسْتِشَه؟ چوم حَتِي گَنَاه كَارِن نِي اِنْتَه بَگَرْدِين. ^{۳۴} و اَكَم فَقط كَسُونِي
 قَرَض اَدِيِيَه كَه بَشَاين شِمَه پَس اَدَن، دِ شِمَه رَا چَه فَايدَه هِسْتِشَه؟ حَتِي گَنَاه
 كَارِن نِي، گَنَاه كَارون قَرَض اَدَن تَا گِرْدِه اِشْتَن قَرَضِي اَوون كَا پَس وِيگَرِن. ^{۳۵} اَمَا
 شِمَه، شِمَه دِشْمَنون نَه مَحَبَت بَگَرِه و اَوون رَا چَاكِي بَگَرِه و بِيدون تَوَقَع پَس
 وِيگَتَه، اَوون قَرَض اَدِيِيَه، كَه شِمَه پَادَاش يَال يِي و خِدَاي مَتَعَالِي خِرْدَنون
 بَبِيرون، چوم خِدَا، نَاشَكرون و بَدكارون نَه مِيهروون اِسْتَه. ^{۳۶} بَس رَحِيم بِيِيَتِه،
 هَتَه كَه شِمَه اَسِمُونِي يَه دَدَه رَحِيم اِسْتَه.

خلکی محکوم گرده

«^{۳۷} قضاوت مگره که قضاوت مبییه. محکوم مگره که محکوم مبییه. بېخسه که بېخشسته ببيیه. ^{۳۸} آديیه که شمه آدوغه ببو. چاک پيمونه ای نه شمه دومنی کا ویگرده بی که فشار دوعه و تکان دوعه و سرشیهه استه! چوم هر پيمونه ای نه که آديیه هر پيمونه نه به شمه آدوغه بی.»

^{۳۹} عیسی آوون را ام مثلی نی وردشه و واتشه: «ایله کور بشای ایله دیتر کوری راه بلد ببو؟ بگم هر د نفر چاه دیله کا ندلکن؟ ^{۴۰} شاگرد اشن اُستادی کا گفاتر نییه، اما هر کسی که اشن تعلیم تربیتی تمام کمال گتش ببو، اشن اُستادی شیوار بی.»

«^{۴۱} چیرا پوشه ای که اشته برا چمی دیله کا دریهه بویندیش، ولی دازه گنده ای که اشته چمی دیله کا دریهه نوینی؟ ^{۴۲} چنته بشای اشته برانه بوآجی: ”براه، بدا آ پوشه اشته چمی کا برورم“، وختی که ته اشن آ دازه گنده ای که اشته چمی دیله کا اشته نوینی؟ ای د دیم، اول داره گنده اشته چمی کا برون بروره؛ چمی پش چاک بشای وینده پوشه ای که اشته برا چمی دیله کا دریهه بروری.»

داری آزونسته

«^{۴۳} هیچ چاک داری بده میوه نده و هیچ آفتی یه داری نی چاک میوه نده. ^{۴۴} هر داری چمی میوه کا بی آزونسته. چوم که نه بره بنه کا بی انجیل چینده و نه خندل بنه کا، آنگر! ^{۴۵} چاک انسان اشن دیلی چاک خزانه کا چاک به بار بوآردی، و بده انسان اشن دیلی بده خزانه کا بدی به بار بوآردی. چوم زوون چمی کا گف رنه که دیل آبی کا لبریز استه.»

دیگله ک

«^{۴۶} چنته یه که منه خداوندا، خداوندا، بواتیرون، ولی آ چمی که شمه نه بواتیم انجام ندییه؟ ^{۴۷} آ کسی که بومی چمن ور و چمن گفون درسه و آوون انجام بدای، شمه نیشون بدایم چیکی شیوار استه. ^{۴۸} آ، کسی شیوار استه که ک وچ آگرده راه، زمینی عمیق گندشه و ک پاکاری بینا سنیگی سری کا نوشه. وختی سیل اوومه، سیل آو، آ ک هجوم وردشه و نباشتسه آ ک تکان بده چوم که آ ک محکم وچ آبه به. ^{۴۹} اما کسی که چمن گفون درسه و آوون انجام نده، کسی شیوار استه که ایله ک بیدون پاکار، زمینی سری کا وچ آگرده. وختی که

سیل آو، اک هجوم وړدشه، اک البخل وپه و چي خراوگی برک ور به.»

۷

رومیه نظامی ایمان

۱ وختی عیسی گرد اِشْتَن گفون مردمی نه وايشه، شه به شهر گفرناحوم.
۲ او آکا ايله رومی يه افسری استبه که ايله نوگریشی استبه که آيبرا ور عزیز به. آ نوگر مریض به و نزدیک به پمري. ۳ وختی آ نظامی دربارہ ی عیسی دَرِسْشه، یهودی شیخون کا چن نفر ویسا آگردشه عیسی ور که یی کا خواهیشت بگرن با و چي نوگری شفا بده. ۴ اون اومینه عیسی ور و وره منتی نه آبی نه وايشونه: «ام مرد لایق استه یی را ام لطفی بگری، ۵ چوم چمه میلتی نه خشه و ام مرد ه کسی استه که امه را عبادتگاه وچ آگردشه.» ۶ بس عیسی اوون نه شه. وختی ک نزدیکي آرسته، آ نظامی چن گله اِشْتَن رَفْقون کا، ام پیغومی نه ویسا آگردشه عیسی ور که: «آقا، اِشْتَن زحمت مده، چوم آز لایق نیمه که ته بای چمن ک سَقفی جیر. ۷ امی واسی، حتی اِشْتَن لایق نزونیمه که بام اشته ور. ولی ته فقط ای کلمه بواج، که چمن نوگر شفا بگتی. ۸ چوم آز نی چمن گفاتر فرمانده هستمه و چمن زیر دسی کا نی سربازونی هستمه و ايله نه بواتیم، "بش"، بشی؛ و ايله نه بواتیم، "به"، بومی و چمن نوگری نه بواتیم، "فلون کاری بکه"، انجام بدای.» ۹ وختی عیسی امی دَرِسْشه، آبی کا حیرون به و آگردسته آجماعتی طرفی را که چي دومله کارا بومین و وايشه: «شمه نه بواتیم، آز حتی اسرائیلی دیله کا نی اِنته ره ایمانی وینده نیمه.» ۱۰ وختی قاصدن آگردستینه ک، آنوگری سق و سلامت ویندشونه.

ایله وپوه ژنی زوئه زنده آگرده

۱۱ تلی پش، عیسی، اِشْتَن شاگردون و وره جماعتی همراه، شه شهری را که چي نوم نائین به. ۱۲ هِنْتَه که شهری دروازه نزدیکي آرسته، ویندشه ايله میپتی کارا ببردین که ايله وپوه ژنی تنخا زوئه به. وره جماعتی شهری مردمی کا اژنی همراه بینه. ۱۳ وختی عیسی خِداوند اژنی ویندشه، دلیلش آبی را سیسته و وايشه: «داد مگه!» ۱۴ دومله عیسی شه نار و تابوتی دس آسوشه. کسونی که تابوتی ببردین، مندینه. عیسی وايشه: «ای جوون، به تنه بواتیم، پرز!» ۱۵ آ مرده، راست نشته و دمنده گف زنده! عیسی، آبی دسپردشه چي تنه. ۱۶ گردی

جانی کا ترس دلگہ و ہتہ کہ خدا ستایش بگردین، بواتین: «یال پیغمبری چمہ دیلہ کا ظہور گردشہ.» و «خدا اِشْتَن قومی کمکی را اومہ.»^{۱۷} عیسیٰ اِم کاری خور گرد یہودیہ ولایتی کا و تَمون آ دور و اطرافِی نواحی کا دپیچستہ.

یحییٰ دربارہ عیسیٰ شُک بگردی

^{۱۸} یحییٰ شاگردِی گرد اِم چیون یحییٰ را خور دوشونہ. بس یحییٰ،^{۱۹} دِ نفر اِشْتَن شاگردون کا سس گردشہ و اوون اِم پیغومی نہ ویسا آگردشہ عیسیٰ خِداوندی وَر کہ: «آیا تہ ہ کسی اِستیش کہ بسی با، یا دیری منتظر ببییم؟»^{۲۰} وختی آ دِ نفر اومینہ عیسیٰ وَر واِتِشونہ: «یحییٰ تعمید دہندہ اَمہ ویسا آگردشہ اِشْتہ وَر تا تہ کا دَفَرَسَم آیا تہ ہ کسی اِستیش کہ بسی با، یا دیری منتظر ببییم؟»^{۲۱} ہ ساعتی کا عیسیٰ وَر گسون، مریضیون کا، دردون کا و پلیدہ روح اون کا شفا دوشہ و وِرہ کورہ آدمون چمون سو دَرَفَنَدِشہ.^{۲۲} دوملہ عیسیٰ آ قاصدون جَوَوی کا واِتِشہ: «بِشہ و ہر چی کہ ویندہ و دَرَسرونہ یحییٰ را بوآجہ، کہ چنتہ کورن بَویندین، شِلن مِچن، جُذامی اِن شفا بگتین، گرن دَرَسن، مَرده اِن زندہ آبون و فقیرون شادہ خور آرسْتہ.^{۲۳} خَسہ ببو آ کسی کہ بہ مَن شُک مگرہ.»

^{۲۴} وختی یحییٰ قاصدین شینہ، عیسیٰ، دربارہ ی یحییٰ دَمَنَدہ مردمی نہ گف زَندہ و واِتِشہ: «چیکی ویندہ را شہ ایرونہ بہ ویباوون؟ مردی ویندہ را کہ لکہ ایی شیوارہ، کہ وختی وا وِرہ ہر وری را تکان بردی؟^{۲۵} بس چہ چی ویندہ را شہ ایرونہ برون؟ مردی ویندہ را کہ گرون و نرم خَلا دگرَدشہ؟ گسونی کہ گرون و نرم خَلا دگرن و تَجَمَلاتی یہ زندگی ہستِشونہ پأتشا اون قَصرون دیلہ کا زندگی بگردین.^{۲۶} بس چہ چی ویندہ را شہ ایرونہ برون؟ ایلہ پیغمبری ویندہ را؟ ہا، شَمہ نہ بواتیم کہ یحییٰ ایلہ پیغمبری کا نی گفآرہ.^{۲۷} یحییٰ ہ کسی اِستہ کہ دربارہ چیی، مَلَکی پیغمبری کیتابی کا نیویشْتہ بیئہ:

«حَسہ چِمِن قاصدی اِشْتہ نارنارہ ویسا آگرم،

تا اِشْتہ راہ اِشْتہ پیشی کا حاضر آگرہ.»

^{۲۸} شَمہ نہ بواتیم، کہ کسی یحییٰ کا یالتر دنیا اومہ نیئہ؛ با اِم حال روکترین شَخْصی کہ خِدا پأتشایی کا اِستہ، یحییٰ کا یالترہ.»

^{۲۹} گرد مردم و حتی باجگیرن نی وختی عیسیٰ گفون دَرَسشونہ، اِعلام گردشونہ کہ خِدا عادل اِستہ، چوم یحییٰ کا غسل تعمید گتِشون بہ.^{۳۰} اَمَّا

فریسیون فرقه علما و شریعتی قاضی ین کہ یحیی کا غسل تعمید گتَشون نِبہ،
ہدنی کہ خدا آوون را داری، رد گردِشونہ.

۳۱ عیسی واٹشہ: «بَس، اِم نَسلی مردمی چہ چی بَشایم تشبیه بَکَرِم؟ اَوَن چہ
چی موِن؟» ۳۲ اَوَن خِرَدَنونی شیوار اِستینہ کہ کوچہ بازارون کا نِشَن و یَندی
دَخونِن و بَوَاتین:

”شَمہ را لَکَّہ ژَندمونہ، دوش نَگردِرونہ؛
نوحہ خَندمونہ، داد نَگردِرونہ.“

۳۳ چوم یحیی تعمید دهنده اومہ کہ نہ نون ہَریستہ و نہ شَراو ہِنجی؛ شَمہ
واِترونہ، ”دیوش اِستہ.“ ۳۴ اِنسانی زونہ اومہ کہ ہم ہَرہ و ہم ہِنجہ؛ شَمہ
بَوَاتیرون، ”دیسہ، ایلہ وَرہ ہَر و عرق ہَرہ آدَمہ، باجگیرون و گناہ کارون رَفقہ.“
۳۵ شَمہ اَعمال ثابت بَگردی کہ عقل و حکمت نیرونہ.»

شَمعون فریسی ک کا

۳۶ اِپی روز ایلہ فریسیون فرقه علما کا عیسی غَذا ہَرِدہ را دَعوت گردِشہ.
عیسی شہ افریسی ک و سِفرہ سَری کا نِشَتہ. ۳۷ اَشہری کا، گناہ کارہ ژنی زندگی
بَگردی کہ وختی دَرَسشہ عیسی افریسی ک کا سِفرہ سَری کا نِشَتہ، ایلہ مَرَمَری
یہ قَبی، عطری نہ پور، اِشَتَن نہ وَرَدِشہ ۳۸ و عیسی پِشتی کا، چَپی پا اَوَن وری کا
مَنَدہ و داد بَگردی. اَ موقع اِسَرگ چَلہ اَوَن نہ دَمَنَدہ عیسی پا اَوَن شوشتہ و
اِشَتَن گیسہ اَوَن نہ اَوون خِشک آگَرَدِشہ. دوملہ عیسی پا اَوَن ماچ گردِشہ و
عطر ژَنَدِشہ. ۳۹ وختی افریسی کہ عیسی دعوت گردِش بہ اِمی ویندِشہ، اِشَتَن
دیلی کا واٹشہ: «اَگم اِم مَرَد واقعا پیغمبر یی، بَزنی اِم ژنی کہ اِپی دَس آسا کییہ
و چنتہ رَہ ژنی اِستہ؛ چوم کہ ایلہ گناہ کارہ ژن اِستہ.» ۴۰ عیسی یی نہ واٹشہ:
»شَمعون، پیستَمہ چپی بہ تِنہ بواچِم.» شَمعون واٹشہ: «بفرما، اُستاد!»
۴۱ عیسی واٹشہ: «شخصی، دِ نَفَری کا طلبِش اِستبہ، اِپی نَفَری کا پونصد دینار
و ایلہ کا پینجاہ دینار. ۴۲ وختی کہ اَدِ نَفَر نِیمَشاين چپی قرضی آدین، طلبکار
ہَر دِ نَفَری قرضی بَخِشِستِشہ. حِسہ اِشَتہ نظر گمیلہ اَدِ نَفَری کا اِپی نہ وِرَتَر
خِش یی؟» ۴۳ شَمعون جَواو دوشہ: «گمون بَکَرِم اَکسی کہ وِرَتَر قرضدار بہ و
بَخِشِستہ بہ.» عیسی واٹشہ: «دَرست حُکم گردِزہ.» ۴۴ و دوملہ آگَرَدِستہ اَرِنی
طرفی را و شَمعون نہ واٹشہ: «اِم ژنی بَویندیش؟ اَز اومیمہ اِشَتہ ک، تہ چِمَن
پاِیون شوشتہ را اَو نَوِرَدِزہ، اما اِم ژن چِمَن پا اَوَن اِشَتَن چِمی اِسَرگی نہ شوشتِشہ

وَ اِشْتَنَ گيسه اُون نه خِشک آگرْدشه! ^{٤٥} تِه مِین ماچ نِگرْدره، اَمّا اَوْختی نه که اومِیمه اِم رُن چِمِین پا اُون ماچ گرْدِه کا دَس پِگْتِه نیشه. ^{٤٦} تِه چِمِین سَری روعِن نِزْنِدره، اَمّا اِم رُن چِمِین پا اُون عطر رُنْدِشه. ^{٤٧} اِمی واسی که ا رُن وِر محبت گرْدشه بَه تِنه بَوَاتیم چِی گناه اِن که وِر نی اِستینه، بَخِشِسته بیینه. اَمّا کسِی که کم بَخِشِسته بَبو، کم نی محبت بَگرْدی. ^{٤٨} عیسی آ رُنِی نه واِتِشه: «اِشْتِه گناه اِن بَخِشِسته بیینه.» ^{٤٩} کسونی که عیسی نه سفره سَری کا نِشت بیینه یَنْدی نه بَوَاتین: «اِم کِیْتِه که حَتی گناه اُون نی بَخِشِستی؟» ^{٥٠} عیسی آ رُنِی نه واِتِشه: «اِشْتِه ایمان، تِه نجات دوعِشه، سَلامتی نه بَش!»

۸

گشاوَرزِی مَثَل

١ دومله، عیسی شَهْر بَه شَهْر وِ ده بَه ده گرْدی و خِدا پَاتشاپی شَادَه خَوَری اِعلام بَگرْدی. اَدونزه گِلَه شاگرْد نی آبی نه بیینه، ^٢ چِن گِلَه رُن که پَلیده روح اُون و مریضیون کا شَفا گِشْتون بَه نی عیسی همراه بیینه. مریم که آیینَه مَجْدَلِیه بَوَاتین و یِی کا هف گِلَه دیو برون اومَه بَه، ^٣ خوزا رُن یوآنا، خوزا هیرودیسی حاکمی مِتر بَه، سوسن و وِر رُنکون دِیتر. اِم رُنکِن اِشْتَن مال و اموالی کا عیسی و چِی شاگرْدون را تدارک بَویندین.

٤ وختی وِرَه جماعتی جمع آبه بیینه و مردم وِرَه شهرن کا عیسی ویندِه را اومینه، عیسی اِم مَثَلی رُنْدِشه واِتِشه: ^٥ «اِبی روز ایلَه گشاوَرز دونه پِشَنده را شَه مزرعه. وختی دونه پِشونی، بعضی گِلَه دونه اِن راه کا وِیینه و پا جیرون کا مَندینه و پرنده اِن آوون هَرْدِشونه. ^٦ بعضی گِلَه دونه اِن سِنگی یَه زمینی کا وِیینه، وختی پَرسینه، چوم زمین نِمَش نِبَه خِشک آیینَه. ^٧ بعضی گِلَه دونه اِن نی بَرُون دیلَه کا وِیینه و پَرِن نی آوون نه پَرسینه و تومون خَفَه گرْدِشونه. ^٨ اَمّا بعضی دونه اِن چاک خاکی کا وِیینه و پَرسینه و صَد برابر بار وِرْدِشونه.» وختی عیسی اِم گفون واِتِشه، بَلَنده سَسی نه واِتِشه: «هَر کسِی دَرَسَه گوش هِسْتِشه، دَرَسَه!»

٩ وختی عیسی شاگرْدن اِم مَثَلی معنی آبی کا دَفَرِشونه، ^{١٠} عیسی واِتِشه: «خِدا پَاتشاپی سِرُون دَرک گرْدِه شِمَه آدوعَه بییه، اَمّا خَلکی نه مَثَلون نه گَف رُنَم، تا:

”دَیسِن اَمّا چِی مَوینین؛“

دَرَسِن اَما چِي مَفَهَمِن.

«^{۱۱} اِم مَتْلِي مَعْنِي اِمَه: دونه، خِدا كِلام اِسْتِه. ^{۱۲} دونه اِنِي كه راه كا وِيبينه، گسُونِي اِسْتينه كه خِدا كِلامِي دَرَسِن، اَما اِبليس بومِي و كِلامِي چَوون دِيلِي كا دِرْذِه، تا مَشان ايمان بُوآرن و نجات پيدا بَگَرِن. ^{۱۳} دونه اِنِي كه سِنْگِي يَه زميني كا وِيون گسُونِي اِسْتينه كه وختي خِدا كِلامِي دَرَسِن، اِي شادي نه قبول بَگَرْدِن، اَما اَوْن بِنه نِزْنِن. اِمْن تَلِي ايمان دارِن، اَما آزمايشون موقع، اِشْتَن ايماني اَز دَس بَدَاين. ^{۱۴} دونه اِنِي كه بَزُون دِيله كا وِيبينه، گسُونِي اِسْتينه كه خِدا كِلامِي دَرَسِن، اَما هِنْتِه كه پيش بَشِين، نِگَرانِي اِن، مال ثروت و زِنْدَگِي لِدْتِن كِلامِي چَوون دِيلِي كا خَفَه بَگَرْدِي و ثمر نَوْرِن. ^{۱۵} اَما دونه اِنِي كه چَاك خَاكِي كا وِيبينه گسُونِي اِسْتينه كه خِدا كِلامِي دَرَسِن و صاف و چَاك قَلْبِي نه محكم اِي دَچِيكِن و صَبْرِي نه ثمر بُوآردِن.

چِرا مَتْل

«^{۱۶} هِيچكس چِرا روشون اَنِگَرِه كه چِي سَرِي كا سَرپوش بِنَه يا اِي بِنه تَخْتِي جِيرِي كا! بَلْگَم چِرا بَناي چِرا پوعَه سَرِي كا تا هر كَسِي كه دَشُو دِيله، روشوني بُوِينِه. ^{۱۷} چوم هِيچ سَرپوش پِنوعَه چِي نِي كه اَشكار اَمبو و هِيچ نِيئِكِي يَه چِي نِي كه معلوم و عَلْنِي مَبُو. ^{۱۸} بَس وِيرا بَبِيئِه كه چِنْتِه دَرَسَه؛ چوم كَسِي كه هِسْتِشِه يِي وِرْتَر اَدوعَه بِي، و اَكَسِي كه نِيشَه حَتِي اَچِي نِي كه خِيال بَگَرْدِي هِسْتِشِه، اَبِيكا وِگْتِه بِي.»

عِيسِي نَنه و پِرا اِن

^{۱۹} اَدومله عِيسِي نَنه و پِرا اِن اومينه چِي وَر، اَما جَماعت اِنْتِه وِر بَه كه نِشاستشونه اِي نِزْدِيك اَبُون. ^{۲۰} بَس عِيسِي را خَوَر وِرْدَشونه كه: «اِشْتِه نَنه و پِرا اِن بَرُونِي كا مَندينه و پِيسْتِشونه تَه بُوِينِن.» ^{۲۱} وَلِي عِيسِي جَواو دوشه: «چِمِن نَنه و پِرا اِن كَسُونِي اِسْتينه كه خِدا كِلامِي دَرَسِن و اِي اَنجام بَدَاين.»

عِيسِي دريا كِلاکِي اَرُوم اَگَرِه

^{۲۲} اَبِي رُوز، عِيسِي اِشْتَن شاگَرْدون نه ايله لوتکا دَنبِشْتِه و اَوون نه واِشِه: «بِشَم درياچه اَ طرفِي را.» بَس اَوْن راه دَلْکِينِه. ^{۲۳} هَتَه كه کارا بَشِين، عِيسِي خَواو اَشَه. اِي دَفْعَه تِنْدِه وَاي درياچه كا وَرَه، اِنْتِه كه لوتکا آوِي نه پور اَبَه و چَوون جان بَرَك خَطْرِي كا دَلْکِه. ^{۲۴} شاگَرْدن شينه عِيسِي وَر و اِي خَواوِي كا

پگردشونه و واتشونه: «أستاذ، أستاذ، أمه کارا هلاک آبییم!» عیسی پرشته و وا و کلاکینه موجون را زره گیتشه. کلاک آنشته و گرد جگا آروم آبه. ^{۲۵} عیسی آوون نه واتشه: «شمه ایمان کییازه؟» شاگردن ترسه بینه و حیرون بینه و یندی کا دفرسین: «ام مرد کییه که حتی وا و آوی فرمان بدای و اون آپی کا اطاعت بگردین؟»

ایله تور و دیوونه ای شفا

^{۲۶} دومله آرتستینه جراسیونی منطقه که آوی طرفی کا، جلیلی ولایتی روبه رو کا به. ^{۲۷} هنته که عیسی ایشن پا نوشه ساحلی کا، ایله تور و دیوونه مردی نه دیمادیس به که آشهری شن استبه. ورزمان به که آمرد نه خلا دگردش به و نه گی کا زندگی گردش به، بلگم قبرستونی کا بماندی. ^{۲۸} هنته که آمرد، عیسی ویندشه، خلیع ژندشه و چپی پا دلکه بلنده سسی نه واتشه: «ای عیسی، خدای متعالی زوئه، ته به منه چه کارر استه؟ ته میت بگردیم من عذاب مدی!» ^{۲۹} چوم عیسی، آپلیده روح فرمان دوغش به که آمردی کا برون برا. آ روح چندی گره آپی ویختش به و با ام که چپی دس و پا زنجیری نه دوسین و آپی کا نگهبانی بداین، اما هر دفعه زنجیرون پله بگردی و آ دیو آپی ویپاوونی را بتردی. ^{۳۰} عیسی آپی کا دفرسشه: «ایشه نوم چه؟» جواو دوشه: «فُشون،» چوم که آپی کافله دیو دشه بینه چپی جانی دیله کا. ^{۳۱} دیون عیسی التماس گردشونه که آوون دستور مده بشون جهندمی دیله. ^{۳۲} اوآکا، یال خوغه رمه ای استبه که کوه کا، کارا غذا بردین. دیون عیسی التماس گردشونه که اجازه بده دشون خو اون دیله. بس عیسی آوون اجازه دوشه. ^{۳۳} دومله دیون آمردی کا برون اومینه و خو اون دیله دشینه، و آ خوغه رمه کوه سرازیری نه هجوم بردشونه دریاچه ظرف و آوی دیله کا غرق آینه.

^{۳۴} وختی خوغه وونین ویندشونه چه اتفاق دلکه، دوشتینه و شهر و ده کا ام ماجرا واتشونه. ^{۳۵} بس مردم اومینه برون که بوینن چه اتفاق دلکه. وختی آرتستینه عیسی ور، آمردی که دیون آپی کا برشه بیینه، ویندشونه که خلا دگردشه و عاقل نشته عیسی پا وری کا، اون ترسینه. ^{۳۶} کسونی که ام ماجرا ایشن چمی نه ویندشون به، آوون را واتشونه که آ تور و دیوونه مرد چنته شفا گتشه. ^{۳۷} دومله جراسیونی منطقه مردم گرد، عیسی کا پیستشونه که چوون وری نه بشو، چوم برک ترسه بینه. عیسی نی لوتکا دنشته و آگرده. ^{۳۸} مردی که

دیون آبی کا برّشہ بینہ، عیسیٰ مِنتِ گردِشہ کہ ہداریہ چپی ہمراہ ببو، اما عیسیٰ آبی راپی گردِشہ و واتِشہ: ^{۳۹} «آگردِ اِشْتِہ کَ و آ چپی کہ خِدا بہ تِرا اَنجام دوعِشہ، بوآج.» اَمِرْد شَہ و شہری اِم سَر تا اَسری کا اِعلام گردِشہ کہ عیسیٰ آبی را چہ گردِشہ.

ایلہ ژنی شفا و یایروسی کلہ زندہ آگردہ

^{۴۰} وختی عیسیٰ آگردہ، جماعت آبی کا اِستقبالِ گردِشونہ، چوم گردِ آبی را چم بہ راہ بینہ. ^{۴۱} اِم موقع، مِردی کہ چپی نوم یایروس بہ و یهودیون عبادتگاہ رئیس بہ، اومہ. اے عیسیٰ دَس و پا دَلکہ، مِنتِ گردِشہ بِشو چپی کَ، ^{۴۲} چوم چپی ایلہ کلہ کہ تقریباً دوزہ سالِش اِستبہ، کارا مِریستہ.

وختی کہ عیسیٰ راہ کا بہ، مردم ہر طرفی نہ آبی فِشار بوآردین. ^{۴۳} مردمی دیلہ کا، ایلہ ژنی اِستبہ کہ دوزہ سال خونریزی اِستبہ. با اِم کہ آ ژن اِشْتن داراپی گردِ آدوعِش بہ طیبیون، ولی ہیچکس نشا اِستبہ آبی علاج بگرہ. ^{۴۴} اِم ژن عیسیٰ پِشتی نہ اومہ و چپی آبا پَرہ دَس آسوشہ. اَلْبَحَل چپی خونریزی بند اومہ. ^{۴۵} عیسیٰ دَقْرِسشہ: «کی من دَس ژنِدِشہ؟» وختی گردِ ہاشا گردِشونہ، پطرس واتِشہ: «اُستاد، مَرْدَم تہ دور آگردِشونہ و تہ فِشار بوآردین!» ^{۴۶} اما عیسیٰ واتِشہ: «اپی نَفر مِن دَس ژنِدِشہ! چوم زونِستَمہ قوتی بہ مِن کا بَرّشہ!» ^{۴۷} آ ژن وختی ویندِشہ نیمشا نین بومونہ، تَرَس لَرزی نہ اومہ نار و عیسیٰ پا دَلکہ و گردِ مردمی پِیشی کا اِعلام گردِشہ کہ چیرا آبی دَس آسوعِشہ و چنتہ اَلْبَحَل شفا گِٹشہ. ^{۴۸} عیسیٰ آیینہ واتِشہ: «کلہ، اِشْتِہ ایمان، تہ شفا دوعِشہ؛ سلامتی نہ پِش.»

^{۴۹} حَلا عیسیٰ کارا گف ژنی کہ عبادتگاہ رئیس کَ کا، اپی نَفر اومہ و واتِشہ: «اِشْتِہ کلہ مَرْدہ، دِ اُستادی زحمت مَدہ.» ^{۵۰} اما وختی عیسیٰ اِمی دَرَسشہ، یایروسی نہ واتِشہ: «مَتَرَس! فقط ایمان ہد! اِشْتِہ کلہ شفا بگتی.» ^{۵۱} وختی عیسیٰ آرسْتہ یایروسی کَ، اِجازہ نِدوشہ کسی پطرس و یوحنا و یعقوب و آ خَرْدَنی دَدہ نَنہ غِیراز، آیینہ دَشون دیلہ. ^{۵۲} گردِ اِکلہ را داد و شیون بگردین. ولی عیسیٰ واتِشہ: «داد مَکَرہ، چوم کلہ مَرْدہ نییہ بَلگم خِٹہ.» ^{۵۳} اَوْن عیسیٰ ریشخند گردِشونہ، چوم کہ بَزین اِکلہ مَرْدہ. ^{۵۴} اما عیسیٰ اِکلہ دَسی گِٹشہ و واتِشہ: «خَرْدَن، پَرز!» ^{۵۵} اِکلہ روح آگردِستہ و کلہ اَلْبَحَل اِشْتن جگا کا پَرشْتہ. عیسیٰ واتِشہ غذا آدَن اِکلہ بَرہ. ^{۵۶} اِکلہ، دَدہ نَنہ مات و مبہوت بینہ، اما

دونزه گله خواری مأموریت

۱ عیسی اِشْتَن دونزه گله شاگردی دَخونْدِشَه اِشْتَن وَر و آوون قدرت و اِقتدار دوشه که گرد دیوون مردمی کا بَرگَرِن و درد و مَرَضون شفا بَدَن؛^۲ و آوون ویسا آگَرْدِشَه تا خِدا پاتشایی اِعلام بَگَرِن و مریضون شفا بَدَن. ^۳ آوون نه واِتْشَه: «سَفَری را هیچ چپی مَبِگِرَه، نِه دَسَه چو، نِه کوله بار، نِه نون، نِه پول و نِه اِضافه بَشِی. ^۴ هَر کَ اِی دیله دَشیرونه، تا وختی اَمَلَه کا اِستِرونه، اَکَ کا بومونه. ^۵ هَر جِگَایِی که مردم شِمَه قبول نِگَرْدِشونَه، وختی چوون شهری کا بَشیرون، او آخاکی شِمَه پا کا تکان بَدِییه تا چوون ضِد ایلَه شهادت ببو.» ^۶ بَس اَوَن راه دَلکینَه، دِه به دِه گردین و گرد جِگاکا، خِدا پاتشایی شادَه خَوَری اِعلام بَگَرْدین و مریضون شفا بَداین.

۷ گرد اِم اِتْفاقون خَوَر هیرودیسِ حاکمی گوش آرستَه. هیرودیسِ خیرون و سَرگَرْدون بَه، چوم بعضی بَواتین عیسی هَ یحیی اِسته که مَرْدَه پَش زنده آبه. ^۸ بعضی بَواتین که ایلای پیغمبر ظهور گَرْدِشَه، و بعضی نی بَواتین ایلَه قَدِیمیه پیغمبرون کا زنده آبه. ^۹ هیرودیسِ حاکِم واِتْشَه: «اَز اِشْتَن دَسْتور دوعَمه یحیی سَر آیرِن؛ بَس اِم کِییه که درباره چپی اِم چپیون دَرَسَم؟» و تَقْلا بَگَرْدی که عیسی بوینی.

پینج هزار نفری غذا دوعه

۱۰ وختی خَواریون آگَرْدستینه، هَر کاری گَرْدِشون بَه عیسی را واِتْشونه. عیسی آوون اِشْتَن نه بَرْدِشَه شهری را که چپی نوم بَیت صیدا بَه تا اوآکا تنخا بَیون. ^{۱۱} وختی مردم خَوَر دار بینَه، چوون دومله راه دَلکینَه. عیسی نی آوون قبول گَرْدِشَه و چوون را درباره ی خِدا پاتشایی گَف زَنْدِشَه و کسونی که نیازمند شفا بینَه، شفا دوشه. ^{۱۲} مَغْرِب دَم، آدونزه گله شاگرد اومینه عیسی وَر و واِتْشونه: «اِم جماعتی ویسا آگَه که دور و اطرافِی دِه و مزرعه اون را بَشون و اِشْتَه را سَرپناه و غذا بَتَلْفِن، چوم که اییا دور افتاده جِگَایِی اِسته.» ^{۱۳} اَمّا عیسی آوون نه واِتْشَه: «شِمَه اِشْتَن آوون غذا آدییه که بَرِن.» شاگردِن واِتْشونه: «اَمَه پینج گله نون و دِگله ماپی غِیراز چپی نیمونه، مَگَم اِم که بَشَم و اِم جَماعتی گَرْدی را غذا

ویگرم.»^{۱۴} او آکا تقریباً پنج هزار گله مرد بینه. عیسی، اِشْتَن شاگردون نه واِشَه: «مردمی پینجا نفری یه دَسته اون کا بِنشونه.»^{۱۵} شاگردن اِم کاری اَنجام دوشونه و گردی نِشوندِشونه.^{۱۶} عیسی پینج گله نون و دِ گله مایِ پِگتِشه، اَسْمونی دِیِشته، خِدا شُکور گردِشه. دومله نونون پَله گردِشه و آدوشَه شاگردون که جماعتی ناری کا بِن. ^{۱۷} بَس گردِ هَرْدِشونه و سیر آیینَه و اَنون و مایِ تیکه خورده اون کا که مَنده بَه، دونزه گله سَبد جمع اَگردِشونه.

پطرسی شاهادتی درباره عیسی

^{۱۸} اِی روز عیسی تنخا دعا بَگردی و فقط شاگردن چِی همراه بینه. اوون کا دَفرَسَه: «مردم بواتین از کییمه؟»^{۱۹} اُون جَواو دوشونه: «بعضی بواتین تِه یحیی تعمید دَهنده ایش، بعضی نی بواتین تِه ایلای پیغمبر ایش و بعضی نی بواتین که ایله قَدیمی یه پیغمبرون کا ایش که زنده آبه.»^{۲۰} عیسی اوون کا دَفرَسَه: «ولی شِمَه بواتیرون از کییمه؟» پطرس جَواو دوشه: «تِه مسیح خِدا اِستیش.»

^{۲۱} عیسی اوون اَکیداً قَدغن گردِشه و دَستور دوشه که اِی گسی را مَواجِن،^{۲۲} و واِشَه: «لازمه که اِنسانی زوئه بَرَک رَنج و عذابِ بَگشَه و شیخِن، سَران کاهِن و توراتی معلِم اِی رَد اَگرن و اَکِشته بَبو و سَومِن روزی کا زنده آبو.»^{۲۳} عیسی گردی نه واِشَه: «اَگم کسی پیستِشه چِمِن پیرو بَبو، بَسی اِشْتَن کا دَس پَگرَه و هَر روز اِشْتَن عذاب و مرگی صلیبی پَگرَه و چِمِن دومله با.»^{۲۴} چوم هَر کسی پیستِشه اِشْتَن جانی نجات بَدَه، اِی از دَس بَدای؛ اَمّا هَر کسی چِمِن واسی اِشْتَن جانی از دَس بَدَه اِی نجات بَدای.^{۲۵} آدَمی را چَه فایده هِستِشه که گرد دنیا بَداره، اَمّا اِشْتَن جانی از دَس بَدَه یا اِی اَسیب بَزَنه؟^{۲۶} چوم هَر کسی که مَن کا و چِمِن گفون کا عار بَداره، اِنسانی زوئه نی وختی اِشْتَن جلال و اَسْمونی یه دَدَه جلال و مقدس مَلائیکه اون نه با، اِی کا عارش اِسته.^{۲۷} ولی حقیقتاً شِمَه نه بواتیم، بعضی اِن اییا کا مَندینه که تا خِدا پَاتشایِ مَویِن، نِیَمِن.»

شاگردن عیسی جلالی بَویندن

^{۲۸} تقریباً هشت روز اِم گفون پَش، عیسی، پطرس، یوحنا و یعقوبی پِگتِشه و دعا گردَه را شَه ایله کوهی کفا.^{۲۹} هته که دعا بَگردی، چِی دیمی ظاهر تغییر گردِشه و چِی خَلا جوری ایسی آبه که شَفق ژَندِشه.^{۳۰} دِ گله مرد عیسی نه

کارا گف زُئین. آدِ نفر موسی پیغمبر و ایلیای پیغمبر بینہ. ^{۳۱} آون شکوہ و جلالی نہ ظاہر آبینہ و دربارہ ی عیسی مَرِدہ گف زُئین، یعنی آ چپی کہ بسی اورشلیمی شہری کا ہم زودیون اِتفاق دَلکہ. ^{۳۲} پطرس و چپی ہمراہ اِن وِر خواو آلو بینہ، اما وختی کہ خواو چوون سَری کا پَریستہ، عیسی جلالی و آدِ گلہ مَرِدی کہ چپی وری کا مَند بینہ، ویندِشونہ. ^{۳۳} وختی کہ آدِ نفر عیسی وری نہ بَشین، پطرس بی اِم کہ بزونہ چہ بواتی عیسی نہ وائشہ: «اُستاد، چہ چاک اَمہ اییکا اِستیمونہ! پدا سہ گلہ سایہ وون وِج اَکَرَم، ایلہ تَرا، ایلہ موسی را و ایلہ نی ایلیا را.» ^{۳۴} پطرسی گف حَلا تمون آبہ نِبہ کہ ایلہ خِر اوَمہ و چوون سَری کا سا دَرَفَندِشہ. وختی آون دَشین خِری دیلہ، شاگِردن تَرسینہ. ^{۳۵} آ موقع خِری کا سَسی اوَمہ کہ بواتی: «اِم چِمِن زوئہ اِستہ کہ از آپی اِنتخاب گِردَمہ؛ چپی گفون گوش بَدییہ.» ^{۳۶} وختی آ سَس قطع آبہ، آون عیسی تَنخا ویندِشونہ. شاگِردن اِم ماجرا اِشتن دیلی کا غم ہَرِدِشونہ، و آ روزون کا کسی نہ نِوائِشونہ کہ چہ ویندِشونہ.

تور و دیوونہ زوئہ شفا

^{۳۷} صَبابی نہ روز، وختی کوہ کا بومِین جیر، وِزہ جماعتی اومینہ عیسی پیشواز. ^{۳۸} اِپی دفعہ ایلہ مَرِدی جماعتی دیلہ کا خِلیع زُندِشہ، وائشہ: «اُستاد، تہ مِنت بگِردیم چِمِن زوئہ نظر لطفی دَرَفن، چوم چِمِن تَنخا خِرَدن اِستہ. ^{۳۹} ایلہ روح آپی گِرہ و آ اِپی دفعہ نازہ زُئہ، اِنتہ تَشَنج دَلکہ کہ، چپی گ گف بگِردی. روح آپی مجروح بگِردی و بَرک سَختی نہ آپی وِل آگرہ. ^{۴۰} اِشْتہ شاگِردون مِنت گِردَمہ کہ آ روح چِمِن زوئہ کا بَرگرن، اما نِشاستِشونہ.» ^{۴۱} عیسی جَواو دوشہ: «ای بی ایمان و منحرف نسل، تا گینی بسی شَمہ نہ بوم و شَمہ تاو بوآرم؟ اِشْتہ زوئہ بوغہ اییا.» ^{۴۲} ہتہ کہ آ زوئہ بوئی، دیو آپی زَمین زُندِشہ و تَشَنج دَرَفَندِشہ. اما عیسی آ پَلیدہ روح را زَرہ گِٹشہ و آ زوئہ شفا دوشہ و آپی آگار دِنِیشہ چپی دَدہ. ^{۴۳} مردم گِرد خِدا یال بییہ کا مات بینہ.

ہنتہ کہ گِرد مردم عیسی کارون کا خِیرون مَند بینہ، عیسی اِشتن شاگِردون نہ وائشہ: ^{۴۴} «چِمِن اِم گفون دَقتی نہ گوش آگرہ: اِنسانی زوئہ، مردمی دَسی نہ تسلیم بیی.» ^{۴۵} اما آون عیسی منظوری نِزونیشونہ؛ بَلگم آوون کا نین مَندہ تا دَرک مَکرن؛ و تَرسین دربارہ چپی، عیسی کا سوالی دَفَرسن.

کی گِردی کا یالترہ؟

٤٦ شاگردون دیله کا بحث دلکه که چوون دیله کا گمیله گردی کا یالتره. ٤٧ اما عیسی که چوون فیکری بزنی، ایله خردنی بگتسه و ایشن کناری کا نوشه، ٤٨ و اوون نه واتشه: «هر کسی ام خردنی چمن نومی نه قبول بگره، من قبول گردشه؛ و هر کسی من قبول بگره؛ ا کسی قبول بگردی که من ویسا آگردشه. چوم شمه دیله کا آکسی یالتره که گردی کا روکتر ببو.»

٤٩ یوحنا واتشه: «أستاذ، امه شخصی ویندمونه که اشته نومی وردیه نه دیوون، آدمون کا برگری، تَقلاً گردمونه چپی پیشی بگرم چوم که امه کا نیه.»

٥٠ ولی عیسی واتشه: «چی پیشی مگره، چوم هر کسی شمه ضد مبو شمه نه استه.»

سامره ده اهالی نامیهروونی

٥١ وختی ا موقعی نزدیک آبه که عیسی برده ببو آسمونی را، عیسی راه دلکه اورشلیمی ظرفی را. ٥٢ عیسی ایشن نارناره قاصدونی ویسا آگردشه. ا قاصدین راه دلکینه شینه سامره ایله ده اون را تا عیسی را تدارک بوینن. ٥٣ اما ا ده مردم آپی قبول نگردهشونه، چوم عیسی کارا بشی اورشلیم. ٥٤ وختی چپی شاگردن، یعقوب و یوحنا، ام ماجرا ویندشونه، واتشونه: «آقا، پیستزه بوآجم آسمونی نه آتشی پواره و اوون گردی نابود بگره، هته که ایلیا گردشه؟» ٥٥ اما عیسی آگرده و اوون را زره گتسه. و واتشه: «شمه نیمزنه گمیله روح کا استیرونه! ٥٦ چوم انسانی زوئه اومه نییه تا مردمی جانی هلاک بگره بلگم اومه تا نجات بده.» دومله اون شینه دییر دهی را.

عیسی کا پیروی کرده بها

٥٧ هته که کارا بشین اپی نفر عیسی نه واتشه: «هر جگا بشی از اشته دومله بومیم.» ٥٨ عیسی جواو دوشه: «رباطن لونه هستشونه و پزنده ان خومه هستشونه، اما انسانی زوئه سر پنوعه را جگپی نیشه.» ٥٩ عیسی ایله دییر شخصی نه واتشه: «چمن دومله بری.» اما ا شخص جواو دوشه: «آقا، اول پدا از بشوم تا موقعی که چمن دده مرده، آپی دفن بگرم، دومله بومیم.»

٦٠ عیسی جواو دوشه: «پدا مرده ان، ایشن مرده اون دفن بگرن؛ ته بش و خدا پأتشایی اعلام بکه.» ٦١ دییر کسی واتشه: «آقا، از اشته دومله بومیم، اما اجازه بده اول چمن خانواده نه وداع بگرم.» ٦٢ عیسی آیینه واتشه: «کسی که شوم ژنده شروع بگردی و ایشن پستی دپسه، خدا پأتشایی لایق نییه.»

هفتاد گله شاگردی ماموریت

۱ چپی پش، عیسای خدایوند هفتاد نفر دیتیر تعیین گردشه و اوون د نفر د نفر ایشتن نازناره ویسا آگردشه شهر و چگا اوونی را که قرار به پشو اوآ. ۲ عیسی اوون نه واتشه: «مَحصول وَرَه اَمّا کاریگر گمه. بس، مَحصولی صاحبی کا درخواست بگره ایشتن مَحصولی جمع آگرده را کاریگرون ویسا آگره.» ۳ بَشَه! از شِمَه وَرَه اون شیوار ویسا آگرم وِرگون دیله. ۴ پول کیسه یا کوله بار یا کفش ایشتن نه مپیگره، و راه دیله کا هیچکسی را سلام مگره. ۵ هَر کَ اِی دیله دَشَه، اوّل بوآجه: "سلام بَر اِم کَ." ۶ اگم اوآکا کسی اهل صلح و سلامتی ببو، شِمَه سلامی بَرکت اِی نه بَمندی؛ اگم نه، شِمَه سلامی بَرکت آگرده به شِمَه. ۷ هَر کَ کا بومونه و هر چپی که شِمَه ناری کا بناین، بَره و بِنجه، چوم کاریگری مَزِد چپی حق اِسته. کَ به کَ مگرده. ۸ هَر وخت شهری دیله دَشیرونه و شِمَه قَبول گردشونه، هَر چپی که شِمَه ناری کا بناین، بَره. ۹ اوآ مریضون شفا بَدیته و اوون نه بوآجه: "خِدا پاتشاپی به شِمَه نَزْدیک آبه." ۱۰ اَمّا هَر وخت ایله شهری دیله دَشیرونه و شِمَه قَبول نِگَرْدشونه، اَشهری کوچه اون را بَشَه و بوآجه: ۱۱ "اَمَه حتی شِمَه شهری خاکی که چَمَه پا کا دَچیکه، شِمَه ضِد تکان بَدایمون. وِلی اِمی بَزونه که خِدا پاتشاپی نَزْدیک آبه." ۱۲ شِمَه نه بوایتیم که داواری یه روزی کا، مجازاتی تاو وَرِدَه سُدومی شهری مردمی را راحتَر بَی، تا اَشهری مردمی را.»

وای بر شهرونی که چپی مردم توبه نِگرن

۱۳ «وای بر شِمَه اِی خورزینی اهالی! وای بر شِمَه اِی بیت صیدا اهالی! چوم اگم معجزه اونی که شِمَه دیله کا انجام به صور و صیدونی کا انجام بی، اوآ مردم خِیلی زمان پیش کیل دگرین و خاکیستری کا نِشین و توبه گرین. ۱۴ اَمّا داواری یه روزی کا، مجازاتی تاو وَرِدَه صور و صیدونی مردمی را راحتَر بَی تا شِمَه را. ۱۵ و شِمَه اِی گفَرناحومی شهری اهالی، شِمَه پیسترونه سَر به اَسْمون بگَشَه؟ هرگز، بَلگم تا جهندی تون سرنگون ببیرون.

۱۶ «هَر کسی شِمَه گفون گوش بَدَه، چِمَن گفی گوش دوَعشه؛ و هَر کسی شِمَه قَبول مگره، مَن قَبول گردَه نیشَه؛ و هَر کسی مَن قَبول مگره، کسی که مَن ویسا آگردشه، قَبول گردَه نیشَه.»

۱۷ آ هفتاد گله شاگرد، شادی نه آگردستینه و واتشونه: «ای آقا، اشته نومی و رده نه حتی دیون نی آمه کا اطاعت بگردین.» ۱۸ عیسی آوون نه واتشه: «ویندیمه شیطان برقی شیوار آسمونی کا بلکه. ۱۹ ديسه از، شمه قدرت و اختیار بدایم تا ثلثیون، عقربون و تمون دشمنی قدرتی، پا جیری کا له آگره و هیچ جی شمه آسپی نزنه. ۲۰ ولی امی واسی که روحن شمه کا اطاعت بگردین شادی مگره، بلکم شمه شادی امی واسی ببو که شمه نوم آسمونی کا نیویشته بییه.» ۲۱ ه لحظه عیسی روح القدسی کا شادی گردشه و واتشه: «ای دده، ای آسمون و زمینی خداوند، ته شکر بواتیم که ام چیون، دانایه آدمون و عاقل آدمون کا نین آگردزه و روک خردنون را آشکار آگردزه. ها، ای دده، اشته پور لطفه اراده ام به. ۲۲ چمن آسمونی یه دده گرد چیون به من دسپاردشه. هیچکس نیمزنه زوئه کیته دده غیراز، و هیچکسی نی نیمزنه دده کیته زوئه غیراز، و آکسونی غیراز که زوئه انتخاب بگردی تا آسمونی یه دده آوون را آشکار آگره.»

۲۳ دومله عیسی اشتهن شاگردون دیبشته و خلوتکی آوون نه واتشه: «خسه ببو آچمونی که آچی که شمه بویندیرون، بویندین. ۲۴ چوم شمه نه بواتیم، وره پیغمبرن و پاتشان آرزو دارین آچی که شمه بویندیرون، بوینن، اما نویندشونه، و آچی که شمه درسه درسن، اما ندرسشونه.»

چاک سامیری مثل

۲۵ ابی روز شریعتی قاضیون کا اینفر پرشته تا عیسی امتحان بگره، آ واتشه: «استاد، چه بکرم که آبدی یه زندگی وارث ببوم؟» ۲۶ عیسی جواو دوشه: «توراتی کا چه نیویشته بییه؟ آبی کا چه فهمی؟» ۲۷ آ قاضی جواو دوشه: «خداوند اشته خدا نه، تمون اشته دیل، تمون اشته جان، تمون اشته قوت و تمون اشته فیکری نه خیش ببش.» و «اشته خمسوعه نه اشته جانی شیوار خیش ببش.» ۲۸ عیسی واتشه: «درست جواو دوزه. ام کاری بکه که زندگی هستره.» ۲۹ اما اشتهن توجیح کرده را عیسی کا دفرسشه: «چمن خمسوعه کیته؟» ۳۰ عیسی انته جواو دوشه: «ایله مردی اورشلمی شهری نه کارا بشی آریحا شهری را. راه کا دزدون دس دلکه. دزدن آبی لخت آگردشونه، لس زندشونه، و نیمه جان ول آگردشونه و شینه. ۳۱ اتفاقی ایله کاهن هه راه نه کارا دوپتری. اما وختی امردی ویندشه، جاده آ طرفی نه شه. ۳۲ هنته نی ایله لاوی

که معبدی خادمون کا بہ اوآنہ کارا دویپری. اُنی وختی آرستہ اوآ و اُ مردی ویندِشہ، جادہ اُ طرفی نہ شہ. ۳۳ اما ایلہ سامری یہ مسافر آرستہ اُ جگاپی کہ اُ مردِ استبہ. وختی اُ مردی ویندِشہ، دیلش اُپی را سیستہ. ۳۴ بس شہ چپی وُر و چپی رُخمون سَری کا سُراو ویکردِشہ و روغن دَسوشہ و اوون دَوَسِشہ. دوملہ اُپی پِگتِشہ اِشَن الاغی سَری کا نِشوندِشہ و مِهمون خونہ ای را بَرِدِشہ و اُپی کا پَرستاری گَرِدِشہ. ۳۵ صَبایِی نہ روز، دِ دینار اُدوشہ مِهمون خونہ صاحیبی و واِتِشہ: «اُمِ مردی کا پَرستاری بَگہ و ہر چہ اِمی کا وِرثَر خَرَج گَرِدِزہ، وختی اُگَرِدِستیمہ بہ تہ اَدَم.» ۳۶ حِسہ اِشْتہ نَظَر اِم سِہ نفری کا گمیلہ، اُ مردی خَمسوعہ بہ کہ راہزَنون دَس دَلکَہ بہ؟» ۳۷ اُ قاضی جَواو دوشہ: «اُ کسی کہ یی رَحَم گَرِدِشہ.» عیسی اُپی نہ واِتِشہ: «بِش و تِی ہتہ بَگہ.»

مریم و مارتا ک کا

۳۸ ہنتہ کہ عیسی و چپی شاگردن اِشَن سَفری اِدامہ بَداین، دَشینہ ایلہ دِہی دیلہ. اُ دِہ کا ایلہ ژنی کہ چپی نوم مارتا بہ عیسی دعوت گَرِدِشہ اِشَن ک. ۳۹ مارتا ایلہ خالاش اِستبہ کہ چپی نوم مریم بہ. مریم عیسی اُخداوندی پاون وُری کا نِشت بہ و چپی تعلیمون گوش بَدای. ۴۰ وُلی مارتا کہ بَرک مشغول پذیرایِی بہ، اومہ عیسی وُر و واِتِشہ: «اُقا، ہیچ اَہمیت نِدی کہ چِمَن خالا مَن ول اُگَرِدِشہ تا تنخا مِهمونون کا پذیرایِی بَگرم؟ اِیینہ بوآج مِنه کَمک بَگرہ!» ۴۱ اما عیسی اُخداوند جَواو دوشہ: «مارتا! مارتا! وِر چِی اِن تہ نِگران و تَشویش بَگردین، ۴۲ اما فَقط اُپی چِی لازِمہ؛ مریم اُ چاک چِی اِنْتخاب گَرِدِشہ، کہ اِییکا وِیگتہ نِیب.»

۱۱

دعا اُموتہ

اُپی روز عیسی جِگاپی کا دعا بَگردی. وختی چپی دعا تَمون آبہ، ایلہ چپی شاگردون کا اِیینہ واِتِشہ: «اُقا، دعا گَرِدہ اَمہ باموج، ہتہ کہ یحیی اِشَن شاگردون اُموتِشہ.» ۱ عیسی اوون نہ واِتِشہ: «ہر وخت دعا بَگردیرون، بوآجہ:

«ای اَسْمونی یہ دَدہ،

اِشْتہ نوم مقدس بَبو،

اِشْتِه پَاتشاپي با،
 ۳ چَمَه روزونه نوني هَر روز بَمون آدَه.
 ۴ چَمَه گناه اون بَبخَش،
 چوم امَه ني گِرْد کسوني که بَمون قرضداري نه بَبخَشِستيمون.
 و امَه اِمْتَحاني کا مَدَرَن. «

دومله آوون نه وايشه: «شَمَه ديله کا کسی اِسته که ايله رَفِقي بَداره، و نِصَب شَو بَشو چِي وَر و بَوَاچَه: «اي رَفِقي، سِه گِلَه نون بَه مِین قَرَض آدَه، ۶ چوم ايله چِمِن رَفِقون کا سَفَرِي نه اوَمَه، و چِي نيمَه که چِي ناري کا بَنَم،» ۷ و چِي رَفِقي ک ديله نه جَواو بَدَه: «چِمِن مِزاحم مَبَش. حِسَه دِ بَر قِفْلَه، و چِمِن خِرْدَنون نه جِگا دَشَه ايمونه. نيمَشام پِرِزَم و چِي بَه تِن آدَم.» ۸ شَمَه نه بَوَاتيم، که حَتِي اگم رَفاقتي واسي پِرِزَه که چِي يِي آدَه، چِي وَايخ بِييه واسي پِرِزَه و هَر چِي که لازم داره يِي آدَه.

۹ «شَمَه نه بَوَاتيم، بِيِيه که شَمَه آدَوَعَه يِي؛ بَگِرْدَه که تَلَفَه؛ بُوکُوِيه که بَر شَمَه ديمي کا آبو. ۱۰ چوم هَر کسی پيِسْتِشَه، اِي آدَوَعَه يِي؛ و هَر کسی بَگِرْدَه، تَلَفَه؛ و هَر کسی بُوکُوِيه، بَر چِي ديمي کا آبو. ۱۱ کَميله نَفَر شَمَه دَدَه اون کا، اگم چِي زوئَه اِي کا مَایِ پيِسْتِشَه مَایِ عَوْض، اِي نَلْتِي آدَه؟ ۱۲ يا اگم اگِلَه پيِسْتِشَه، ايله عَقْرَب يِي آدَه؟ ۱۳ بَس اگم شَمَه که بَدَه آدَموني اِسْتِروَنه بَزِنِرون چِنْتَه چَاک هَدِيه اون شَمَه خِرْدَنون آدِيِيه، چِنْدِي وِرْتَر اَسْموني يَه دَدَه، رُوح القُدسي آدَه بَه کسوني که اِي کا پيِسْتِشَوَنه.»

عيسي و بَعْلِزَبول

۱۴ عيسي ايله ديوي که لال بَه، اِي نَفَرِي کا بَرُون بَرِگَرِي. وختي ديو بَرُون اوَمَه، لال مَرْد گَف زُنْدِشَه و مَرْدَم حِيرون بينه. ۱۵ اَمَّا بَعْضِي آوون کا وايشونه: «عيسي، بَعْلِزَبولي کَمکِي نه، که ديوون رَئِيس اِسته، ديوون بَرِگَرِه.» ۱۶ بَعْضِي دِيْتَر ني چِي اِمْتَحان گِرْدَه رَا، هِنْتَه هِي اِي کا ايله اَسْموني يَه نيشونه اِي پيِسْتِشَوَنه. ۱۷ ولي عيسي که چَوون فِیکَرِي بَزِنِي آوون نه وايشه: «هَر مَمْلِیکَتِي که اِي کا دِ دَسْتَه اِي دَلِکَه از بِن بَشِي، و هَر ک اِي که اِي کا دِ دَسْتَه اِي بُو خِرَاوَه آبو. ۱۸ اگم شيطان ني اِشْتَن ضِد دِ دَسْتَه اِي دَرَفَنَه، چِي سُلْطَنت چِنْتَه پا بَرِجَا بَمَنْدِي؟ چوم شَمَه بَوَاتِرون که آز، بَعْلِزَبولي کَمکِي نه ديوون بَرِگَرِم. ۱۹ اگم آز بَعْلِزَبولي کَمکِي نه ديوون بَرِگَرِم، شَمَه شَاگِرِدِن چِيکِي کَمکِي نه آوون

بَرگَرِن؟ بَس شِمَه هَه شاگَرِدِن، شِمَه داوَرِي بَگَرِدِن. ۲۰ اَمّا اگم از خِدا قدرتی نه دیوون بَرگَرِم، بَس خِدا پَأتشایِ شِمَه آرستَه. ۲۱ وختی ایله قدرتمندَه مِردی که کاملاً مسلَح اِسته اِشْتَن کَ کا نِگهبانی بَگَرِه، چِی مال و اموال دَر امان بَی. ۲۲ اَمّا وختی گسی آبی کا قدرتمندتر آبی حمله بَگَرِه و پیروز بَبو، چِی اَسلحه اونی که اوون توکل گَرَدشه آبی کا ویگَرِه و چِی مال و اموالی تاراج بَگَردی. ۲۳ هَر کسی مِنه نیبَه چِمِن ضِد اِسته، و هَر کسی مِنه جمع اَمگَرِه، وِلا اگَرِه.

« ۲۴ وختی پلیده روح کسی کا برون بوقی، بَثی خِشک و بی او و علف جِگا اون را تا جِگایی اِستراحت گَرِدِه را بَتلَفِه. اَمّا وختی جِگایی نِتلَفِه بَواتی: ”اگَرِدِم چِمِن هَه کَ اِی که آبی کا اومیمه.“ ۲۵ و وختی آرستَه اوآ، اَ کَ آروفته و تَر تمیز بَویندی. ۲۶ اَ موقع بَثی و هفت گِله روح اِشْتَن کا شَریرتر بَوآردی و اُون دَشون دیله اوآکا جاگیر بَیِن. اَ آدمی اِخرعاقِبَت چِی اَولی کا نی بَدتر بَی.»

۲۷ وختی که عیسی اِم چِیون بَواتی، ایله ژنی جماعتی دیله کا پَلنده سَسی نه وائِشه: «خَسَه بَبو اَنه اِی که تِه زَندشه و تِه شِت دوشه.» ۲۸ اَمّا عیسی جِواو دوشه: «خَسَه بَبو اگسونی که خِدا کلامی دَرَسِن و اِی عَمَل بَگَرِدِن.»

یونسی نیشونه

۲۹ وختی جماعت کارا اِضافه بَیِن، عیسی وائِشه: «اِم نَسَل، شَرورَه نَسلی اِستینه. اُون ایله نیشونه ای پِیستِشونه! اَمّا نیشونه ای اوون آدوَعَه نیب، یونس پیغمبری نیشونه غیراز. ۳۰ چوم هَهته که یونس، نینوا مردمی را نیشونه ای بَه، اِنسانی زوئَه نی اِم نَسلی مردمی را نیشونه ای بَی. ۳۱ داوَری یَه روزی کا سَبا مَملیکتی مَلکه اِم نَسلی مردمی نه زنده آبو و اوون محکوم بَگَردی، چوم آ، دنیا اَ سَری کا اومَه تا سلیمان پَأتشاه حِکمتی دَرَسِه، و حِسه دَیسه، گسی که اییا کا مَندَه سلیمانی کا یالتر اِسته. ۳۲ نینوا مردم داوَری یَه روزی کا اِم نَسلی مردمی نه زنده آبون و اوون محکوم بَگَرِدِن. چوم نینوا مردم یونس پیغمبری گفی واسی توبه گَرَدشونه. و حِسه، دَیسه اگسی که اییا کا مَندَه یونسی کا یالتر اِسته.»

بَدنی چِرا

« ۳۳ هیچکس چِرا روشن اَنگَرِه که اِی نِین اگَرِه یا چِی سَری کا سَرپوش پَنه، بَلگم اِی چِرا پوَعَه سَری کا بَنای تا هَر کسی که دَشو دیله نوری بَوینه. ۳۴ اِشْتِه بَدنی چِرا اِشْتِه چَمَه. وختی اِشْتِه چِم سالیم بَبو، اِشْتِه بَدن گَرِد نوری نه پور بَی. اَمّا وختی تِه بَد چِم بَی، اِشْتِه بَدن تاریکی نه پور بَی. ۳۵ بَس هوشیار بَبش

نَبادا نوری که اشته وجودی کا اِسته، تاریکی ببو. ^{۳۶} بس اگم اِستِه بَدَن گِرد، نوری نه پور ببو و هیچ جگای بیی کا تاریکی کا مَبو، ا موقِع، زمانی شیوار که چرا نور به تِه کا دَتاوه، کامل روشونی کا ببیش.»

وای بر فریسیون و شریعتی قاضیون

^{۳۷} وختی عیسی اِشْتَن گفی تَمون آگَرْدِشه، ایله فریسیون فرقه عُلما آبی عَذا هَرِدِه را دَعوت گَرْدِشه. عیسی نی شَه چپی کَ و سَفَرِه سَری کا نِشته. ^{۳۸} وختی آ فریسی ویندِشه که عیسی عَذا هَرِدِه پیش، اَوّل اِشْتَن دَسون نِشوشِشه، مات آبه. ^{۳۹} عیسیای خِداوند آبی نه واِشَه: «شِمَه فریسیِن، قَدَرَه و دووری برونی تمیز آگرَه، اَمّا شِمَه باطن، حِرص و عاز و شِرارتی نه پور اِسته. ^{۴۰} ای نادونِن، بگم آ کسی که برونی وَج آگَرْدِشه، دیله نی وَج آگَرْدَه نِشَه؟ ^{۴۱} اَمّا شِمَه صدقه اون آ چیونی کا آدیته که شِمَه وجودی دیله کا اِسته، ا موقِع لازم بیی که شِمَه وجود پاک ببو.

«^{۴۲} وای بر شِمَه ای فریسیون فرقه عُلما! چوم شِمَه توراتی ده یک آدیته حُکمی حتی نَعنا خالواش و هر جورِه سبزی را اَنجام بَدایرون، اَمّا عَدالتی نادیده گِرَه و خِدا محبتی کا غاْفیلِرونه. اِمون بسی اَنجام بَدیته و آوون کا نی غفلت مَکَرَه. ^{۴۳} وای بر شِمَه ای فریسیِن! چوم شِمَه خِشِرونه عبادتگاه اون کا چاکترین جگا اون کا بِنِشه و مردم کوچِه بازاری کا شِمَه را سلام بَگرن. ^{۴۴} وای بر شِمَه! چوم شِمَه قَبرونی شیوار اِستِرونه که معلوم نینه و مردم بی اِم که بزونِن چوون سَری نه مِچن.»

^{۴۵} ایله شریعتی قاضی اون کا عیسی جَواوی کا واِشَه: «اُستاد، تِه اِم گفون نه بَمون نی توهین بَگَرْدِش.» ^{۴۶} عیسی جَواو دوشه: «ای شریعتی قاضی اِن، وای بر شِمَه نی، چوم بَرک سَنگِبِن بَارون مردمی دوشی کا پَنیَه و اِشْتَن، کَمک گَرِدِه را ایله اَنگِشت نی آ باری نَزْنه. ^{۴۷} وای بر شِمَه، چوم که شِمَه آ پیغمبرونی را مَقَبَرَه وَج آگرَه که شِمَه اجداد آوون کِشْتَشونَه! ^{۴۸} اِنته شِمَه، شِمَه اجدادی کارون شاهدِرونه و چوون کارون مهر تائید بَزَیرون. چوم آون پیغمبرون کِشْتَشونَه و شِمَه چوون مَقَبَرَه وَج آگرَه. ^{۴۹} اِمی واسی خِدا حِکْمَت بَواتی: ”از آوون را پیغمبرون و رسولون ویسا آگَرِم. اَمّا اَوْن بَعْضی آوون کا کِشْن و بَعْضیون نی اذیت آزار بَگَرْدِین.“ ^{۵۰} بس گِرد پیغمبرونی خون که دنیا اوّل بُنیادی نه وِیبه، اِم نسلی گَرْدَن بیی- ^{۵۱} هایبلی خونی کا گِته تا زکریا خون که قِربونگاه و معبدی

مقدس چگا میانه کا کِشته به. ها، شِمه نه بواتیم که ام نسل، گرد ام چيون را حساب پس آدن. ^{۵۲} وای بر شِمه ای شریعتی قاضی ان! چوم شِمه آبری آچری پگترونه که خدا آزونسته را ابو. اِشتن که دیله نشییه و نییرزه نی کسونی که پیستشونه دَشون دیله.»

^{۵۳} وختی عیسی او آکا شه برون، توراتی معلیم و فریسی فرقه علما آبی ور فشار و ردشونه و تقلا گردشونه آبی جوکو بژن که ور چيون دربارہ گف بژنه ^{۵۴} و فرصتی دومله گردین که عیسی، چپی اِشتن گفون نه تله کا دَرَفَن.

۱۲

دِ دیمی کا پرزِ گرده

ام موقع، هزارون نفر جمع آبینہ، انته که یندی سَری کا پا پَنین. عیسی، اوّل اِشتن شاگردون نه دَمندہ گف رُندہ و واتشه: «فریسیون علما حَمیره مایہ کا، که دِ دیمی اِسته، دوری بگرہ. ^۲ هیچ سَروپوش پنوعه چپی نی که آشکار آمبو و هیچ نینکی یه چپی نی که علنی مبو. ^۳ بس گفونی که تاریکی کا واٹرونہ، روشونی کا دَرسہ بی و آچی که دَوستہ برون پِشتی کا، گوشون کا یواشی نه واٹرونہ کومون سَری کا اِعلام بی.

«^۴ چمن رَفَن، شِمه نه بواتیم کسونی کا مَترسہ که جسمی کِشن و چپی پَش امی کا ورتَر کاری چوون دَسی کا نَبرا. ^۵ اما شِمه نه بواتیم که کی کا بسی بَترسہ: آ کسی کا بَترسہ که کِشته پَش، قدرت و اِختیار هِسِتِشہ شِمه جَهَندمی کا دَرَفَنہ. ها، شِمه نه بواتیم آبی کا بَترسہ. ^۶ مگم پینج گله کیجہ قِیمت دِ قِران نییہ؟ با ام حال، خدا چوون ایله نی ویر بَترگرہ. ^۷ حتی شِمه سَری موین گرد ایشمرده بیینه بس مَترسہ؛ چوم شِمه اِرش هزارون گله کیجہ اون کا ورتَر اِسته.

^۸ شِمه نه بواتیم، هر کسی مردمی وری کا اِشتن زوونی نه بوآجہ که چمن شن اِسته، انسانی زوئه نی خدا ملائیکه اون وری کا اِشتن زوونی نه بواتی که، آ آدم چپی شن اِسته. ^۹ اما کسی که مردمی پیشی کا من هاشا بگرہ، خدا ملائیکه اون پیشی کا هاشا بی. ^{۱۰} هر کسی انسانی زوئه ضد گفی بژنه، بَخِشِسته بی، اما کسی که روح القدس نه گفور بوآجہ بَخِشِسته نییب. ^{۱۱} وختی مُحاکمه کرده را شِمه بَتردین به عبادنگاه اون و بَتردین حاکمون و فرماندارون وَر، نگران مَبییه که چنته اِشتن کا دِفاع بگرہ یا چه بوآجہ، ^{۱۲} چوم هه ساعتی کا، روح القدس شِمه آموچہ که بسی چه بوآجہ.»

نادون آرباپي مٿل

۱۳ ابي دفعه ابي نفر جماعتی دیله کا عیسیٰ نه وايشه: «أستاد، چمن پرا نه بواج که چمه دده ارثی منه تقسیم بگره.» ۱۴ اما عیسیٰ جواو دوشه: «ای مرد، کی من شمه میانه کا قاضی و ارث تقسیمه گر، گردشه؟» ۱۵ دومله مردمی نه وايشه: «شمه هواسی جمع آگره. هر جوره حرص و عازی کا دوری بگره، چوم انسانی زندگی، چپی وره نیروتی را نییه.» ۱۶ دومله عیسیٰ اوون را ام مٿلی وردشه و وايشه: «ایله ثروتمنده مردی ایشن زمینی کا ور محصول به دس وردشه. ۱۷ آ مرد ایشن نه فیکر گردشه که «چه بگرم؟ چوم جگام نییه که چمن محصولی انبار بگرم.» ۱۸ دومله وايشه: «ها، زونستمه چه بگرم! چمن انبارون خراو آگرم و یالتره انبارونی وچ آگرم. چمن گرد گندی و چمن گرد أموالی اوآکا ذخیره بگردیم. ۱۹ چپی پش ایشن نه بواتیم: «ای چمن جان، ته چندی سالون را وره أموالی جمع آگردره؛ حسه آسوده زندگی بگه؛ به و پنج و کیف بگه.» ۲۰ اما خدا آیینه وايشه: «ای نادون! هم شنار اشته جانی ویگرم. بس آ چیونی که جمع آگردره چی کی شن بی؟» ۲۱ ام، آ کسی آخرعاقبت اشته که اشته را ثروت جمع آگره، ولی خدا وری کا تیبه دس اشته.»

نگران مبییه

۲۲ عیسیٰ ایشن شاگردون نه وايشه: «بس شمه نه بواتیم، شمه زندگی را نگران مبییه که چه بره و نه شمه بدنی را نگران مبییه که چه دگره. ۲۳ چوم زندگی غذا کا مهمتر و بدن خلا کا مهمتر اشته. ۲۴ کلاچون دپسه: نه کارن و نه درو گرن، نه کاهدون هستشونه و نه انبار؛ ولی خدا چوون روزی آده. شمه، پرنده اون کا چندی با ارنشتر استیرونه! ۲۵ گمیله شمه کا نگران بییه نه بشای اپی ساعت ایشن عمری اضافه آگره؟ ۲۶ بس آگم نیمشایه اشته ره روک کاری انجام بدییه، چیرا بقیه چییون را نگرانیرونه؟ ۲۷ میشینه گون دپسه که چنته پرسن؛ اون نه زحمت بگشیدن و نه ریس وچن. ولی شمه نه بواتیم، که حتی سلیمان پاتشاه نی ایشن گرد شکوه و جلالی نه چوون ایله شیوار بزک نبه. ۲۸ بس آگم خدا، صحرا واشی که اوری اشته و صبا درفن تنوری کا، اشته بزک بگردی، چندی ورتر ای کم ایمان شمه بزک بگردی! ۲۹ چمی دومله مبییه که بسی چه بره یا چه پنجه؛ چمون نگران مبییه. ۳۰ چوم ام دنیا دیتر قومن، ام چییون دومله گردن، اما شمه اسمونی یه دده بزنی که شمه ام چییون احتیاج

داره. ^{۳۱} بلگم شِمه خدا پاتشاپی دومله بیییه؛ که ام چپی ان نی شِمه آدوعه بیی. « ای روک رَمه، مَترسه، چوم شِمه آسمونی یه دَده شادی امه که ا پاتشاپی شِمه آده. ^{۳۲} آ چپی که هِسترونه بخرشه و آدیته فقیرون؛ شِمه را کیسه اوئی تهیه بگره که پوسته نیب، و آسمونی کا گنجی ذخیره بگره که تمون آنیب، جگاپی که نه دزد بوئی و نه پت ژنه. ^{۳۳} چوم شِمه گنج هر جگا کا ببو، شِمه دیل نی اوآکا بیی.

حاضره خادمین

« ^{۳۴} شِمه گمرون دَوَنده و خِدمتی را حاضر بیییه و شِمه چراون روشن غم بَره. ^{۳۵} کسونی شیوار بیییه که منتظری نه چوون آریاب عروسی نه آگرده ک، تا وختی راه نه آرسَته و بَر بژنه، اَلبَحَل بَری آپی را آگرِن. ^{۳۶} خَسه ببو نوگرونی که وختی چوون آریاب بوئی، آوون آگا بوینه. حقیقتا شِمه نه بواتیم، چوون خِدمت گرده را گمر دَوَسه؛ آوون سفره سَری کا نشونه و بوئی و آوون کا پذیرایی بگردی. ^{۳۷} خَسه ببو آ نوگرونی که وختی چوون آریاب بوئی بوینه که اون آگا ایینه، چه نیمه شو ببو و چه صبی سر.

« ^{۳۸} اما ای بزونه اگم ک صاحب بزنی که دزد چه ساعتی کا بوئی، نییرزی دزد چپی ک کا دزدی بگره. ^{۳۹} شِمه نی بسی حاضر بیییه، چوم انسانی زونه، آ ساعتی بوئی که شِمه انتظار نِداره.»

^{۴۰} پطرس واتشه: « آقا، آیا ام متلی امه را بواتیش یا گردی را؟ »

^{۴۱} عیسی خِداوند واتشه: « بس آ وفادار و عقلمنده مِتر کییه که چپی آریاب آپی اِشتن ک نوگرون سرپرست بگره تا چوون غذا سهمی موقع نه آوون آده؟ ^{۴۲} خَسه ببو آ نوگری که وختی چپی آریاب بوئی، هته که آریاب واتشه آپی مشغول به کار بوینه. ^{۴۳} حقیقتا شِمه نه بواتیم که چپی آریاب، اِشتن گرد دارایی چپی دَس آده. ^{۴۴} اما اگم آ نوگر اِشتن نه بوآچه: ” چمن آریاب عری آگرده شه، ” و نوگرون و خاتکون بژنه، و بره و بِنجه و مستی بگره، ^{۴۵} ای روز که چپی اِنتظاری نیسه و آ ساعتی که نیمزنه، آ نوگری آریاب بوئی و آئی تیکه تیکه بگردی، و آپی خیانت کارون نه دَرَفنه ای جگا دیله.

« ^{۴۶} نوگری که اِشتن آریابی خواسته بزنی ولی اِشتن آماده اِنگره یا اِشتن آریابی خواسته انجام نده، بَرک لسی بَردی. ^{۴۷} اما کسی که اِشتن آریابی خواسته کا بیخبره و کاری بگردی که لس هرده سزاوار اِسته، گمتر لس بَردی. هر کسی که

ور آدوَعه ِبِو، یِی کا ور طلب ِبِی؛ و هر کسی وِرتر دَسپارده ِبِو، آبی کا وِرتر طلب ِبِی.

«^{۴۹} از اوَمیمه زَمینی کا آتشی روشن آگرم، و گشکی تا حَسَه روشن آبی! ^{۵۰} از ایله تعمیدی هِسْتَمَه که بسی آبی بَگرم و تا چِی انجام دوَعه موقع ور پَریشونیمَه! ^{۵۱} بَگم حَیال بَگردیرون از اوَمیمه زَمینی کا صلح بوآرم؟ نِه، بَلگم شَمَه نِه بوَاتیم اوَمیمه تا جدایی دَرَقَنم. ^{۵۲} چوم چمی پَش، پینج نفر ایله ک آدَمون دیله کا تفرقه دَلکه؛ سِه نفر دِ نفری ضد و دِ نفر سِه نفری ضد بَبین. ^{۵۳} چوون دیله کا تفرقه دَلکه. دده ضد زوئه و زوئه ضد دده، ننه ضد کله و کله ضد ننه، خسرگ ضد ویو و ویو ضد خسرگ.»

زمانون آزونستَه

«^{۵۴} هِنته نی عیسی مَردمی نه واتشه: «شَمَه وختی بویندیرون که مَغربی نه خِر پَیدا ِبِی، اَلبَحَل بوَاتیرون: “وارش بوآستی،” و وارِش نی بوآستی. ^{۵۵} و وختی بویندیرون جنوبی نه وا وَزه، بوَاتیرون: “بَرک گرمشی ِبِی،” و هِنته ِبِی. ^{۵۶} ای دِ دِیمن! شَمَه چاک بَزنیرون چننه زَمین و آسَمونی وضعیتی تعبیر بَگره، اما چرا نِیَمَزَنه چننه اِم زَمانی تعبیر بَگره؟

«^{۵۷} چیرا آ چپی که درست اِسْتَه شَمَه را نَشخیص نِدییه؟ ^{۵۸} وختی که اِشته شاکِی نه بَشیش حاکمی ور، تَقْلا بَگه راه کا آبی نه آشتی بَگری، نَبادا اِشته شاکِی تِه بَبره قاضی ور و قاضی تِه آدَه افسری دَس، و افسر تِه زندانی کا دَرَقَنه. ^{۵۹} حقیقتاً بَه تِه نه بوَاتیم، تا آخِرین قِرونی آمَدی، زندانی کا برون نای.»

۱۳

دعوت گرده به توبه

۱ ه وختی کا، چن نفر اوآکا بینه و عیسی نه دربارہ جلیلونی گف ژندشونه که قِربونی گرده وختی کا، پِیلاُتس اِنْتَه اوون کِشْتِشَه که چوون خون چوون قِربونیون خونی نه قاطی به. ^۲ عیسی جَواو دوشه: «آیا حَیال بَگردیرون اِم جلیلونی که اِنْتَه عذاب گِششونه بَقیه ی جلیلون کا گناہکارتر بینه؟ ^۳ شَمَه نِه بوَاتیم که اِنْتَه نییَه! اما اگم توبه مَکره، شَمَه نی گرد چوون شیوار نابود بَبیرون. ^۴ و یا ا هیجده نفری که سیلوآمی بُرج ویتَه و اوون کِشْتِشَه، حَیال بَگردیرون بَقیه آدَمونی کا که اورشلیمی کا زندگی بَگردین گناہکارتر بینه؟ ^۵ شَمَه نِه بوَاتیم

که اینته نییه! اما اگم توبه مگره، شمه نی گرد چوون شیوار نابود بیرون.»
 ۱ دومه عیسی ام مئی واتشه: «ایله مردی اشن انگره باغی کا انجیل داری کاشته. وختی پیستشه چیی میوه بچینه، آ داری کا چیی نویندشه. ۷ بس باغوونی نه واتشه: ”دیس حسه سه سال که از بومیم ام انجیل داری کا میوه بچینیم ولی چیی نوینم. آی دور. چیرا بیخودی زمینی هدر بده.“ ۸ آ باغوون جوو دوشه: ”آقا، بدا ام دار ای سال نی بومونه. تا از چیی دوری بکنم و کود ویکرم. ۹ اگم سال دیگه میوه وردشه که چه چاکتر؛ اگم نوردشه آ موقع آی دور.“»

علیل ژنی شفا شنبه

۱۰ یهودییون ایله مقدس شنبه روزی کا، عیسی ایله عبادتگایی کا تعلیم بدای. ۱۱ اوآکا ایله ژنی استبه که ایله روحی هیجده سال آی علیل گردش به. چیی پشت قات به و اصلا نیمشای صاف بومونی. ۱۲ وختی عیسی آی ویندشه، آی دخوندشه اشن ور و واتشه: «ای ژن، اشته علیل بییه کا خلاص بیشه!» ۱۳ و ژنی سر دس پنوشه و آ ژن البخل صاف منده و خدا ستایش گردشه. ۱۴ اما عبادتگاه رئیس امی واسی که عیسی شنبه روزی کا شفا دوعش به ور عصبانی آبه و مردمی نه واتشه: «شیش روز کار کرده را تعیین بییه. آ روزون کا بایه و شفا بگره، نه مقدس شنبه روزی کا.» ۱۵ عیسای خداوند چیی جووی کا واتشه: «ای دیمین! بگم کسی شمه دیله کا استه که شنبه روزی اشن گایا الاغی طوله کا آمگره و آو دوعه را مبره برون؟ ۱۶ بس آیا نبی ام ژنی که ابراهیم پیغمبری نسلی کایه و هجده سال شیطان آی اسیر گردش به، شنبه روزی کا ام اسارتی کا آزاد آبو؟» ۱۷ وختی عیسی امی واتشه، چیی مخالفین گرد خجالت بینه، اما گرد مردم، گرد عجیب کارونی کا که عیسی انجام بدای شاد بینه.

خردل دونه و خمیره مایه مثل

۱۸ آ موقع عیسی واتشه: «خدا پاتشایی چه چی شیوار استه؟ آی به چه چی تشبیه بگرم؟ ۱۹ آ، خردل دونه ای شیوار استه که مردی آی پگتسه و اشن باغی کا کاشته. آ دونه پرسه و داری آبه، اینته که پرنده ان چیی لایه اون میانه کا خومه وچ آگردشونه.»

۲۰ هنی عیسی واتشه: «خدا پاتشایی به چه چی تشبیه بگرم؟ ۲۱ آ، خمیره مایه ای شیوار استه که ایله ژنی آی پگتسه و سه کیسه آردی نه قاطی گردشه تا

خَمیرِ گردِ آرستِه.»

تَنگَ بَر

۲۲ عیسی اورشلمی راه کا، شہرون و دہ اون را بَشی و تعلیم بَدای. ۲۳ اِی نفر عیسی کا دَفَرِ سِشہ: «ای آقا، آیا فقط گم کسونی نجات پیدا بگردین؟» عیسی آوون نہ وائشہ: ۲۴ «بَرک تَقْلا بَکْرَه تا تَنگَ بَری نہ بايہ دیلہ، چوم شَمہ نہ بَوَاتیم، وِر گَسَن تَقْلا بَکَرْدین تا دیلہ دَشون، اَمّا نِیَمَشان. ۲۵ وختی کَ صاحبِ پَرزہ و بَری دَوَسہ، شَمہ پِرونی کا بَمَنَدیرون، بَری کویہ و بَوَاتیرون: ”آقا، بَری اَمہ را آگہ!“ اَمّا آ جَواو بَدای: ”از شَمہ آیزونِم؛ نِیَمَزِنِم کِیا کا اومِرونہ.“ ۲۶ ا موقع شَمہ بَوَاتیرون: ”اَمہ تَنہ هَرَدَمونہ و هِنْتَمونہ و تہ چَمہ کوچہ اون کا تعلیم بَدایش.“ ۲۷ اَمّا ا شَمہ نہ بَوَاتی: ”از شَمہ آیزونِم؛ نِیَمَزِنِم کِیا کا اومِرونہ. چِمِن چمی پِیشی کا دور آبِیہ، ای بَدکارن!“ ۲۸ وختی کہ اِبْرَاهیم و اِسْحاق و یَعقوب و پیغمبرون گِردی خِدا پَأتشاپی کا بَویندِیرون، وِلی بَوینہ شَمہ پِرونی کا مَنده ایرونہ، ا موقع اوآکا داد بَکَرْدیرون و دَندون، دَندونِ سَری کا فِشار بَدایرون. ۲۹ مردم مشرق و مغرب و شمال و جنوبی کا بومِین و خِدا پَأتشاپی سِفرہ سَری کا نِشَن. ۳۰ ہا، بَعْضی کہ آخِرین اِستینہ، اَوّلین بَین و بَعْضی کہ اَوّلین اِستینہ، آخِرین بَین.»

عیسی غم اورشلمی را

۳۱ ا موقع چَن نفر فریسیون فرقہ عُلما کا اومینہ عیسی وِر و وائشونہ: «اییا نہ دَوَز، چوم ہیرودیسی حاکم پیستِشہ تہ بَکِشہ.» ۳۲ عیسی جَواو دوشہ: «بِشہ و ارباطی نہ بَوآجہ: ”اوری و صبا از دیوون مردمی کا بَرگِرم و مردمی شَفا بَدایم، و سَوَمِین روزی کا چِمِن کاری کَامِل بَکَرْدیم. ۳۳ اَمّا اوری و صبا و پِشرا بَسی چِمِن راه اِدامہ بَدَم، چوم ممکن نِیہ ایلہ پیغمبر اورشلمی غِیراز دِیَر جِگاپی کا کِشْتہ پِبو.“ ۳۴ ای اورشلم، ای اورشلم، ای شہری کہ پیغمبرون کِشی و رسولونی کہ اِشْتہ وِر ویسا آبون سِنگَسار بَکَرْدیش! چَن گَرہ پیستِمہ گُشگنی شیوار کہ اِشْتَن کِیجہ اون اِشْتَن پَر و بالون جِیری کا جمع آگرہ، اِشْتہ خِرَدَنون اِی جِگاکا جَمع آگرِم، اَمّا تہ نِیِیَسْتِرہ! ۳۵ حَسہ شَمہ کَ بَر، تِی و متروکہ مَنده. شَمہ نہ بَوَاتیم کہ دِ مَن نَوینہ تا ا زَمانی کہ بَوآجہ: ”مُتَوَارک اِستہ ا کِسی کہ خِداوندی نومی نہ بَوَی.“»

عیسی فریسی کا

۱ یہودیوں ایلہ مقدس شنبہ روزی کا کہ عیسیٰ عَزَّوَجَلَّ را شہ ایلہ فریسیون رُہبرون ک، اُون دَقْتی نہ عیسیٰ تحت نظر دارین. ۲ اوآکا ایلہ مردی اِسْتَبہ کہ چپی جان او وِرْدَش بَہ. ۳ عیسیٰ شریعتی قاضی یون و فریسیون کا دَفْرَسْشہ: «مريضون شفا دوعہ شنبہ روزی کا جایز اِسْتَبہ یا نہ؟» ۴ اَمَّا اُون ساکیت مَندینہ. بَس عیسیٰ اَمْرَدی گِئِشہ شفا دوشہ و رَوونہ گردِشہ. ۵ عیسیٰ اوون نہ واِئِشہ: «شَمَہ کا گمیلہ، اگم چپی زوئہ یا چپی گا مقدس شنبہ روزی کا چا دیلہ کا دَلِکَہ، اَلْبَحَل اَبی برون نِوَرِہ؟» ۶ اُون نِشاسْتِشونہ اِم چيون را جوای پَدَن.

۷ وختی عیسیٰ ویندِشہ کہ میهمونن چنتہ مَجْلِسی گفای نہ سَری اِشْتہ را اِنْتِخاب بَگَرْدِین، اوون را اِم مَثَلی وِرْدِشہ، واِئِشہ: ۸ «وختی کسی تہ دعوت بَگَرِہ ایلہ عروسی یہ مَجْلِس، مَجْلِسی گفا کا مَنِش، چوم مُمکنہ کہ کسی تہ کا سرشناستر دَعوت بیئہ پبو. ۹ اِنْتہ مَجْلِسی صاحب کہ شِمَہ ہر دِ نفری دَعوت گردِشہ، بوئی و تہ نہ بواتی: "اِشْتہ جگا آدہ اِم شخصی." ا موقع، بَسی تہ خِجالتی نہ بَشی مَجْلِسی جیری کا بِنِشی. ۱۰ بَلگم وختی کسی تہ دَعوت بَگَرْدی، بَش و مَجْلِسی جیری کا بِنِش، تا وختی کہ مَجْلِسی صاحب بوئی، تہ نہ پوآجہ: "رَفِق، بفرما گفائر بِنِش." ا موقع گرد کسونی وری کا کہ تہ نہ سفرہ سَری کا نِشْتینہ سَرِیلند بَبیش. ۱۱ چوم ہر کسی اِشْتن یال آگرہ خار بی، و ہر کسی اِشْتن فروتن آگرہ، سَر بِلند بی.»

۱۲ عیسیٰ، ک صاحبی نہ نی واِئِشہ: «وختی کسی سور و ناہاری را دَعوت بَگَرْدِیش و یا میهمونی بَدایش، اِشْتہ رَفِقون، پرا اون و خویشون یا ثروتَمَنَدہ خَمسوعہ اون دَعوت مَگہ؛ نَبادا اُون نی ہتہ تہ دَعوت بَگَرِن و اِنْتہ تہ اِشْتہ کاری عَوَضی ویگری. ۱۳ بَلگم وختی میهمونی بَدایش، فَقیرون، اِفلیجون، شِلون و کورون دَعوت بَکہ ۱۴ کہ تہ بَرکت ویگری؛ چوم اُون نِیَمَشان کہ چپی عَوَضی تہ آدن، و تہ ا روزی کہ صالِحِن زنده آبون، اِشْتہ کاری عَوَضی ویگری.»

یال میهمونی مَثَل

۱۵ ایلہ گسونی کا کہ عیسیٰ نہ سفرہ سَری کا نِشْت بَہ وختی اِم چییون

دَرِسْشَه، وَاِشَه: «حَسَه بَبُو اَكْسِي كَه خِدا پَاتَشَايِي كَا نُون بَرَه.»^{۱۶} عِيسِي جَوَاو دُوشَه: «اَيْلَه مِرْدِي يَال مِيهِمُونِي دُوشَه وَ وِر كَسُون دَعُوتِ گِرْدِشَه.»^{۱۷} سُورِي وَخْت، اِشْتَن نُوگَرِي وَيَسَا اَكْرَدِشَه تَا دَعُوتِيُون نَه بُوآجَه، ”بَايَه چُوم كَه حِسَه هَمَه چِي حَاضِرِ اِسْتَه.“^{۱۸} اَمَّا اَوْن هَر كَمِيلَه بَهُونَه اِي وَرْدِشُونَه. اَوَّلِي وَاِشَه: ”اَز، اَيْلَه مَزْرَعَه خِرِيْمَه كَه بَسِي بِشُوم اِي بُوِينِم. خَوَاهِيشْت بَكْرَدِيم مِّن مَعْذُور بِدَا.“^{۱۹} اَ اَيْلَه وَاِشَه: ”اَز، پِينَج چِفْت كَا خِرِيْمَه، وَ كَارَا بَشِيم اَوُون اِمْتِحَان بَكْرِم. خَوَاهِيشْت بَكْرَدِيم مِّن مَعْذُور بِدَا.“^{۲۰} اَ اَيْلَه نِي وَاِشَه: ”اَز، تَازَه رِزْن بَرْدَمَه، اِمِي وَاِسِي نِيْمَشَام بَام.“^{۲۱} بَس اَنُوگَر اَكْرَدِشْتَه وَ مَاجِرَا اِشْتَن اَرِيَابِي رَا وَاِشَه. كَ اَرِيَاب عَصْبَانِي اَبَه وَ اِشْتَن نُوگَرِي نَه وَاِشَه: ”اَلْبَحَل بِش شَهْرِي كُوجَه بَازَارُون رَا وَ فُقَيْرُون وَ اِفْلِيجُون وَ كُورُون وَ شِلُون بُوَعَه.“^{۲۲} اَ نُوگَر وَاِشَه: ”اَقَا، اِشْتَه دَسْتُورِي اَنجَام دُومَه، اَمَّا حَلَا نِي جِگَا اِسْتَه.“^{۲۳} اَرِيَاب اَ نُوگَرِي نَه وَاِشَه: ”بِش كُوجَه خِيَابُونُون رَا وَ اِصْرَارِي نَه مِرْدَمِي بُوِيَه چِمَن مِيهِمُونِي رَا تَا چِمَن كَ پُور اَبُو.“^{۲۴} چُوم شِمَه نَه بَوَاتِيم كَه هِيچ گِلَه اَدْعُوتِي اَوْن كَا، چِمَن سُورِي مَرَه نِچِشَن.“»

شَاگِرْد بِيِيَه بَهَا

^{۲۵} وَرَه جَمَاعَتِي عِيسِي هَمْرَاه بِيِنَه. عِيسِي اَكْرَدِشْتَه چَوُون طَرْفِي رَا وَ وَاِشَه: ^{۲۶} «هَر كَسِي بَا چِمَن وَر وَ اِشْتَن دَدَه نَنَه، رِزْن وَ خِرْدَن، پَرَا وَ خَالَا وَ حَتِي اِشْتَن جَانِي كَا دَس مَبِگِرَه، نِيْمَشَا چِمَن شَاگِرْد بَبُو.»^{۲۷} كَسِي كَه اِشْتَن عَذَابِي صَلْبِي مَبِگِرَه وَ چِمَن دُومَلَه مَا، نِيْمَشَا چِمَن شَاگِرْد بَبُو.^{۲۸} اَكَم كَسِي شِمَه كَا اَيْلَه بُرْجِي وَج اَكْرَدَه فَيَكْرِي كَا بَبُو، مَكَم اَوَّل نِنِشَه وَ چِي خَرْجِي حَسَاب كِيْتَاب نِگْرَه كَه بُوِينَه اِم كَارِي تَمُون اَكْرَدَه تَوَانِي هَسْتِشَه يَا نَه؟^{۲۹} چُوم اَكَم چِي پَاكَارِي بَنَه وَ دُومَلَه مَشَا اِي تَمُون اَكْرَه، هَر كَسِي كَه اِي بُوِينَه اِي رِيَشْخَنْد بَكْرَدِي،^{۳۰} وَ بَوَاتِي: ”اِم مِرْد اَيْلَه كَ اِي وَج اَكْرَدَه شُرُوع كَرْدِشَه، وَلِي نِشَاَسْتِشَه اِي تَمُون اَكْرَه.“^{۳۱} وَ يَا كَمِيلَه پَاتَشَايِي اِسْتَه كَه دِيِيَر پَاتَشَايِي جَنْگِي رَا بِشُو، بِي اِم كَه اَوَّل بِنِشَه وَ فَيَكْر بَكْرَه كَه بُوِينَه، اَيَا اَيْلَه دَه هَزَار نَفْرِي يَه لَشَكْرِي نَه بَشَاي اَيْلَه بِيَسْت هَزَار نَفْرِي يَه لَشَكْرِي نَه جَنْگ بَكْرَه؟^{۳۲} وَ اَكَم مَشَا، حَلَا كَه دِشْمِنِي لَشَكْر دُور اِسْتَه، اِشْتَن نَمَايِنْدَه وَيَسَا اَكْرَه كَه دَقْرِسَه چَنْتَه بِيِي صُلْح بَكْرَه.^{۳۳} اِنْتَه نِي، اَكَم هِيچ گِلَه شِمَه كَا، گِرْد اِشْتَن دَارِيَابِي كَا دَس مَبِگِرَه، نِيْمَشَا چِمَن شَاگِرْد بَبُو.

«^{۳۴} نیمک چاک، اما اگم نیمک ایشان مزه از دس بده، چنته بی هنی آبی سور آگرده؟^{۳۵} آ، د، نه خاکی را به درد بردی و نه کودی را؛ بلکه آبی فر آدن. هر کس دزسه گوش هستشه، دزسه!»

ژون آبه گوسندی مئل

۱) باجگیرن و گناهکارن گرد بومین عیسی ور تا چپی گفون دزسن.^۲ فریسی فرقه علما و توراتی معلین غرغر بگردین، بواتین: «ام مرد گناهکارون قبول بگردی و اوون نه غذا بردی.»^۳ بس عیسی ام مئلی اوون را وردشه و واتشه: «اگم ای نفر شمه کا صد گله گوسند بداره و ایله اوون کا ژون آگره، بگم آنود و نو گله گوسندی دشتی کا نییزه و آ، ایله ژون آبه گوسندی دومله نشو تا آبی بتلفه؟^۴ و وختی آژون آبه گوسندی بتلفه، آبی گلدوش بگتی و شادی بگردی. وختی بومی ک، ایشان رفقون و خمسوعه اون جمع آگره و بواتی: "منه شادی بگره، چوم چمین ژون آبه گوسندی تلفتمه."^۷ شمه نه بواتیم، هته نی، ایله گناه کاری واسی که توبه بگردی، آسمونی کا ورتن شادی برپا بیی تا نود و نو گله صالح آدمی واسی که توبه لازم نیشونه.

ژون آبه سکه مئل

«^۸ ویا اگم ایله ژنی ده گله نفره سکه بداره و ایله آسکه اون کا ژون آگره، بگم چرایی روشون اینگره و ک گزه نژنه و تا وختی که آبی متلفه دقتی نه چپی دومله نگرده؟^۹ وختی آبی تلفتشه، ایشان رفقون و خمسوعه اون جمع آگره و بواتی: "منه شادی بگره، چوم چمین ژون آبه سکه تلفتمه."^{۱۰} شمه نه بواتیم، هته نی، ایله گناهکاری توبه گرده را، خدا ملائیکه اون دیله کا، شادی برپا بیی.»

ژون آبه زوئه مئل

۱۱) دومله عیسی واتشه: «ایله مردی به که د گله زوئه اش استبه.^{۱۲} روک زوئه ایشان دده نه واتشه: "دده، چمین سهمی که اشته أموالی کا به من آرسته، جسّه به من آده." بس دده ایشان أموالی آ د گله زوئه میانه کا تقسیم گردشه. ۱۳ چن روزه پیش، روک زوئه هر چش استبه جمع آگرده و دوره مملکتی را

راپی به و او آکا اِشْتَن دارایی عیاشی نَه به و دوشه. ^{۱۴} وختی همه چیی خرج گردِشه، بَرک قحطی اَمملکتی گِئِشه و اَزوئه تییّه دَس آبه. ^{۱۵} بَس زوئه شَه و اَمملیکتی ایله آدَمون نوگر به. آ آدَم آپی ویسا آگردِشه اِشْتَن زمینی سَر تا خو اون غذا بَدَه. ^{۱۶} زوئه ناچش اِستبه که اِشْتَن اِشگمی خو اون غذا نه سیر آگره، ولی هیچکس ییی چیی آندی. ^{۱۷} ولی وختی سَر حساب به و اِتشه: ”چَدَه چِمِن دَدَه کاریگرن، اِضافی یه غذا نی هِستِشونه، ولی آز اییا کا کارا وِشی کا بَمردیم. ^{۱۸} پِرزم و بَشیم چِمِن دَدَه وَر و آپی نه بَوَاتیم: ’دَدَه، آز به خِدا و به تَه گناه گِردمه. ^{۱۹} دِ لایق نیمه که مَنه اِشْتَه زوئه بو آچن. مَنه اِشْتَه ایله کاریگرون شیوار رَفْتار بَگَه. “ ^{۲۰} بَس پَرشته و دَدَه کَ را راپی به. اَمّا حَلا دور به که چیی دَدَه آپی ویندِشه و دِلیش آپی را سیسته. دَدَه وِریته، آپی گَشَه آگِئِشه و ماچ گردِشه. ^{۲۱} زوئه و اِتشه: ”دَدَه، آز به خِدا و به تَه گناه گِردمه. دِ لایق نیمه که مَنه اِشْتَه زوئه بو آچن. “ ^{۲۲} اَمّا دَدَه اِشْتَن نوگرون نه و اِتشه: ”بَتیلَه! چاکترین حَلا بو آره و ییی دَکَرَه. چیی اَنگِشتی کا اَنگِشتر دَکَرَه و چیی پااون کا کفش دَکَرَه. ^{۲۳} کوگَه موندَه ایی بو آره و سَر آبرَه تا بَرَم و جَشَن بَگِرم. ^{۲۴} چوم چِمِن اِم زوئه مَرده به، هَنی زنده آبه؛ ژون آبه به، پیدا به!“ بَس دَمَندینه شادی گِردَه.

^{۲۵} آ موقع یال زوئه مزرعه کا اِستبه. وختی او مَه و کَ نِزْدیک آبه دَرَسْشه که آواز خونین و وِشْتَن بَگردین. ^{۲۶} ایله نوگرون کا دَخوندِشه و دَفَرَسْشه که چه خَوْرَه. ^{۲۷} نوگر ییی نه و اِتشه: ”اِشْتَه برا او مَه و اِشْتَه دَدَه چوم آپی سَق و سلامت ویندِشه، اِمی واسی کوگَه موندَه ای سَر آبرَدَشه. “ ^{۲۸} اَمّا یال زوئه عصبانی آبه و نِپِیسْتِشه با کَ دیله. چیی دَدَه او مَه بَرون و ییی مَنّت گردِشه. ^{۲۹} اَمّا یال زوئه اِشْتَن دَدَه جَوای کا و اِتشه: ”دِیس، وَرَه سالونی اِسته که آز اِشْتَه نوگری گِردمه و هرگز اِشْتَه دَسْتورون کا سَر پیچی گِردَه نیمه. اَمّا تَه هرگز حتی ایله پَرَه و چَه نی مَن آدوعَه نِزَه تا چِمِن رَفْقون نه جَشَن بَگِرم. ^{۳۰} اَمّا حِسه که اِشْتَه اِم زوئه او مَه، آ زوئه ای که اِشْتَه تِرَوْتی فاییشه اون نه به و اِشْتَه، تَه آپی را کوگَه موندَه ایی سَر آبرَدَرَه!“ ^{۳۱} دَدَه آپی نه و اِتشه: ”زوئه، تَه همیشه مَنه اِستیش، و آز هر چیی که هِستِمَه اِشْتَه شَنه. ^{۳۲} اَمّا حِسه اَمَه بَسی جَشَن بَگِرم و شادی بَگِرم، چوم اِشْتَه اِم برا مَرده به، زنده آبه؛ ژون آبه به، پیدا به!“

حُقَه بَارَه مِترِی مَثَل

اِهنته نی عیسی اِشْتَن شاگردون نه واټشه: «ایله ټیروتمنده مردی ایله مِتریشی اِستبِه. اِ مردی را خَوَر آرسټه که اِ مِتر چِی اموالی به وا بدای. ۲ مِتری دَخونِدشه و دَفَرسشه: ”اِ مِ گفن چینه که دربارِه اِشته دَرَسِم؟ اِشته حسابون پَس آده که دِ نِیمشای چِمِن مِترِی پی.“

۳ اِ مِتر اِشْتَن نه فِیکر گَرْدشه: ”حِسَه که چِمِن اَرَباب پِیسټشه مِن کاری کا بَرکنار بَگرِه از چه بَگرم؟ اَز که نه تاو هِسْتِمه خیلِیک بَزْنِم و گدایِی کا نی عار هِسْتِمه. ۴ ها، بَزْنِم چه بَگرم که وختی مِن مِتر بییه کا بَرکنار بَگرِه، کسونی بَبون که مِن اِشْتَن کَ اُون کا راه بَدَن.“ ۵ بَس، اِشْتَن اَرَبابی قرض دارون گِلَه به گِلَه دَخونِدشه. اُولی کا دَفَرسشه: ”چَدَه چِمِن اَرَبابی قرض داریش؟“ ۶ جَواو دوشه: ”صَد گِلَه خُمَرَه زیتون روئِن.“ مِتر واټشه: ”اِشته صورت حسابی ویگه، و اَلتَحَل بِنش و بینویس، پینجا خُمَرَه!“ ۷ دومله مِتر اِ ایله کا دَفَرسشه: ”تِه چَدَه قرض داریش؟“ : اِ واټشه: ”صَد خَرَوار گَنْدِم.“ مِتر واټشه: ”اِشته صورت حسابی ویگه و بینویس هَشْتاد خَرَوار!“

۸ اَرَباب، حُقَه بَارَه مِترِی عَقْلَمَنْدی کا تعریف گَرْدشه؛ چوم که بی ایمان مردم اِشْتَن رابطه و کارون کا خَلکی نه، خِدا سِناس اَدَمون کا عَقْلَمَنْدتری نه. ۹ شِمَه نه بَوَاتیم اِم فاسده دنیا مالی، رَفَقون پَیدا کرده را مصرف بَگرِه که وختی شِمَه مال تَمون آبه، شِمَه اَبَدی یِه کَ اُون کا راه بَدَن.

۱۰ «کسی که وِزه روک کارون کا امانتدار ببو، یال کارون کا نی امانتدار بی، و کسی که وِزه روک کارون کا امانتدار مَبو، یال کارون کا نی امانتدار نیب. ۱۱ بَس اگم شِمَه اِم فاسده دنیا مالی کا امانتدار مَبییه، کی اِ حَقِیقِی یِه تِرَوْتِی شِمَه دَسپاره؟ ۱۲ و اگم شِمَه خَلکی مالی کا امانتدار مَبییه، کی شِمَه اِشْتَن مالی آده شِمَه؟ ۱۳ هیچ نوگری نِیمشای دِ گِلَه اَرَبابی خدمت بَگرِه، چوم یا ایله کا متنفر بی و اِ ایله نه خِش بی، یا ایله دیل دَوْنِدِه و اِ ایله خار و خفیف بَزْنی. شِمَه نِیمشایه هم خِدا خدمت بَگرِه و هم پولی خدمت بَگرِه.»

۱۴ فَرِیسِیِن که پولدوست بینه، وختی گِرْدِه اِم گَفون دَرَسشونه، عیسی رِیْشَخَنْد گَرْدشونه. ۱۵ عیسی اَوون نه واټشه: «شِمَه کسونی اِسترونه که مردمی وری کا اِشْتَن درستکار نیشون بَدایرون، اَمّا خِدا شِمَه دِلی کا خَوَرِش اِسته. چوم اِ چِی که مردمی نَظری کا وِر اِرِزِش هِسْتِشه، خِدا نظری کا مِرْدال اِسته!

۱۶ «تا یحیی موقع، تورات و پیغمبرون نیویشته اِن شِمَه راهنما بینه. چِی پَش

خدا پائشاپي شاده خورِ اعلام يبي و گرد پيستيشونه زوري نه چي ديله دشون.
۱۷ اما راحتتره آسمون و زمين از بين بشون تا ام که ايله نقطه ای توراتی کا بی اعتبار ببو!

« ۱۸ هر کسی اِشْتَن رُني طلاق بده و ديير رُني بیره، زنا کرده، و هر کسی نی طلاق ويگته رُني بیره، زنا کرده.»

آرباب و فقيره ايلعازر

« ۱۹ اِثروتمنده مردی به که گرون ارغوانی يه خلا، نرمه کتان پارچه کا دگری و هر روز خوشگذرونی نه زندگی بگردی. ۲۰ چي ک بری پيشی کا، ايله فقيره مردی خسی که چي نوم ايلعازر به و چي جان گرد زخمی به. ۲۱ ايلعازر آرزو داری که اِثروتمنده مردی سفره پس منده چيون نه اِشْتَن اِشگمی سير آگره. حتی اِسبه ان نی بومين و چي زخمون آلیسين. ۲۲ آ فقير، مرده و ملائیکه ان آبي بردشونه ابراهيم پیغمبری ور. اِثروتمنده مرد نی مرده و آبي دفن گردشونه. ۲۳ اِثروتمنده مرد هته که جهندی تونی کا کارا عذاب گشی، دييشته و دوری نه ابراهيم پیغمبری ويندشه و ايلعازری نی ويندشنه که ابراهيمی وری کا به. ۲۴ بس بلند سسی نه وايشه: ”ای دده ابراهيم، به من رحم بگه. ايلعازری ويسا آگه که اِشْتَن اَنگشتی تکی آوی کا بژنه و چمن زوونی خُنک آگره، چوم از ام آتشی ديله کا عذاب گشم.“ ۲۵ اما ابراهيم پیغمبري ني وايشه: ”بله، وير بوغه که ته وختی زنده بيش، چاک چين اشته نصيب بينه و بده چين ايلعازری نصيب بينه. اما حسه آيا کا آسایشی کايه و ته عذابی کا ايش. ۲۶ چمی غيراز، چمه و شمه میانه کا یال پرتگاهی اِسته؛ تا کسونی که پيستيشونه ايپانه بان شمه ور مشان، و کسونی که اوآکيپنه مشان بان چمه ور.“ ۲۷ اِثروتمنده مرد جواو دوشه: ”بس ای دده، ته منت بگردیم ايلعازری ويسا آگه چمن دده ک، چوم از پينج گله برا هستمه. آبي ويسا آگه تا چمن برا اون هشدار بده، نبادا اون نی بان ام عذاب جگا.“ ۲۹ اما ابراهيم وايشه: ”اون موسی تورات و پیغمبرون نيويشته اون هستيشونه، چوون گفی گوش آگرن.“ ۳۰ آ مرد وايشه: ”نه، ای دده ابراهيم، بلگم آگم کسی مرده اون وری نه بشو چوون ور، اون توبه بگردین.“ ۳۱ ابراهيم جواو دوشه: ”آگم اون موسی و پیغمبرون گفی گوش مدن، حتی آگم کسی مرده پش نی زنده آبو، اون قانع نبون.“»

بَخِشِش، ايمان، وظيفه

۱ عیسیٰ اِشْتَن شَاگِرْدُون نِه وَايشَه: «اِم وَسوسه كه اِنسان گناه بَگَرِه حتماً بوئی، اَمّا وای به حال آ كسی كه وسوسه چپی واسطه نه بوئی. ۲ آبی را چاكتر به كه ایلَه آسیا سنگی چپی گردنی كا دَوَسِن و آبی دریا كا دَرَقِن تا اِم كه باعِثِ بَبو ایلَه اِم روكون كا گناه بَگَرِن. ۳ شِمَه، اِشْتَن ویرا بَبیته. اگم اِشْتَه برا گناه بَگَرِه آبی را زَرَه بَگِه، و اگم توبه گَرْدِشَه، آبی بَبخَش. ۴ اگم آبی روزی كا هف گَرَه اِشْتَه حقی كا گناه بَگَرِه، و هف گَرَه با اِشْتَه وَر و بوآجَه ”توبه بَگَرِیم،“ تِه بَسی آبی بَبخشی.»

۵ حَواریون عیسیٰ خِداوندی نِه وَايشونه: «چَمَه ايماني ور آگَه!» ۶ عیسیٰ خِداوند جَواو دوشه: «اگم ایلَه روک خَرْدَل دونه ای قَدَر ايمان بَداریون، بَشایرون اِم تویَه داری نِه بوآجَه: ”بِنه كا بَرَا و دریا كا كاشْتَه بَبو،“ و دار شِمَه كا اِطاعت بَگَرِی.»

۷ شِمَه دیله كا كسی اِسته كه ایلَه نوگَر بَداره كه زمینی شوم زَنه یا گوسندون بَبَرِدی چرا و وختی آنوگَر زمینی سَری كا آگَرِده، آبی نِه بوآجَه: ”اَلْبَحَل پَری، بِنِش سِفَرَه سَری كا“؟ ۸ مگم آبی نِه، نِواجَه: ”چَمِن سوری حاضیر آگَه، اِشْتَه گَمَری دَوِنْد و مِین خدمت بَگِه تا بَرِیم و بِنِجَم، دومله تِه به و بِنِج“؟ ۹ مگم آنوگَری كا اِمی واسی كه چپی دَسْتورون اَنجام دوعَشَه تَشْكَر بَگَرِدی؟ ۱۰ بَس، شِمَه نِی وختی گِرْد دَسْتورونی كه شِمَه دوعَه بَبیته، اَنجام دورونه، بوآجَه: ”اَمَه ناچیزه نوگَرِیمونه. فقط چَمَه وظيفه اَنجام دوعَمونه.“

دَه گِلَه جُدایِ شِفا

۱۱ عیسیٰ اورشلیمی راه كا، سامِرَه منطقه و جَلیلی ولایتی مرزی میانه كا دوپِری. ۱۲ وختی كارا دَهی دیله دَشی، دَه گِلَه جُدایِ ویندِشَه كه دور مَنْدَه بینه ۱۳ اَوِن بَلَنْدَه سَسی نِه وَايشونه: «عیسیٰ، اِی اُسْتاد، بَمون رَحْم بَگَه!» ۱۴ وختی عیسیٰ اَوون ویندِشَه، وَايشَه: «بَشَه و اِشْتَن كا هنی نِشون بَدیته.» اَوِن هَتَه كه كارا بَشین جُدایِ كا شِفا گِشونه. ۱۵ ایلَه اَوون كا وَختی ویندِشَه شِفا گِشَه، هَتَه كه بَلَنْدَه سَسی نِه خِدا ستایش بَگَرِدی، آگَرِدِستَه ۱۶ و عیسیٰ پا دَلْكَه و آبی كا تَشْكَر گَرْدِشَه. اِم شَخْص اَهْل سامِرَه به. ۱۷ عیسیٰ وَايشَه: «مگم كسونی كه شِفا گِشونه دَه نَفَر نِیبینه؟ بَس اَنه نَفَر كِیاری نِه؟ ۱۸ اِم خَلْکی غِراز، كسی نِبَه كه آگَرِده و خِدا ستایش بَگَرِه؟» ۱۹ دومله عیسیٰ اَمَرْدی نِه وَايشَه: «پَرِز و

بش، اِشْتِه ايمان تِه شفا دوعشه.»

خدا پأتشاپي اومه

٢٠ آفریسیون فرقه علما عیسی کا دَفَرَسِشونَه که خِدا پأتشاپي گینی بوئی. عیسی چوون جَوَوی کا واتشه: «خِدا پأتشاپي اومه جوری نییه که ببو آپی وینده،^{٢١} و کسی نِواجِه، ”دیس آ اییا کا یه“ یا ”اوآکا یه“، چوم خِدا پأتشاپي شِمَه دیله کا اِسته.»

٢٢ دومله عیسی، شاگردون نه واتشه: «روزونی بوئی که شِمَه آرزو بگردیرون که انسانی زوئه ایله روزون پوینه، اما نُوینه. ٢٣ مردم شِمَه نه بواتین: ”دیس آ اییا کا یه“، یا ”دیس آ اوآکا یه.“ شِمَه مَشییه و اوون کا پیروی مَکَرَه. ٢٤ چوم هته که گرخونه شفق زنه و اِسمونی اِنَسَر تا ا سَری روشن آگره، انسانی زوئه نی اِشْتَن روزی کا هته بی. ٢٥ اما ا اوّل بسی وره رنج و عذاب بگشه و اِم نَسلی مردم آپی رد آگرِن. ٢٦ انسانی زوئه دَوَرَه، نوح پیغمبری دَوَرَه شیوار بی. ٢٧ مردم، هَرین و هِنجین، ژن بَردین و شو بگردین تا ا روزی که نوح دَشه کشتی دیله. ا موقع سیل اومه گرد اوون نابود گردشه. ٢٨ لوطی دَوَرَه کا نی هته به. مردم هَرین و هِنجین، خرید و فروش بگردین، کِشت و کار بگردین و کَ وَج آگرِن. ٢٩ اما ا روزی که لوط سُدومی شهری کا برون اومه، آتش و گوگرد اِسمونی نه بوارستی و گرد اوون نابود گردشه. ٣٠ روزی که انسانی زوئه ظهور بگره نی هِنته بی. ٣١ ا روزی کا، کسی که اِشْتَن کَ بومی سَری کا اِسته و چپی اِساس کَ دیله کا، اِساسون پِگته را ما جیر. و ا کسی که مزرعه کا اِسته نی اَمگرده به ک. ٣٢ لوطی ژنی ویر بواره! ٣٣ هر کسی پیستشه اِشْتَن جانی حفظ بگره، آپی از دَس بدای، اما هر کسی اِشْتَن جانی فیدا بگره، آپی غم بردی. ٣٤ شِمَه نه بواتیم، ا شوی کا دِ نفری کا که ایله چگا کا ختینه، اپی نفری بَردین و ا ایله بَمندی. ٣٥ و دِ گله ژنی کا که یندی نه دَس اِسیا بگردین، ایله بَردین و ا ایله بَمندی. ٣٦ دِ گله مردی کا که مزرعه کا اِستینه، اپی نفری بَردین و ا ایله بَمندی.»

٣٧ اون عیسی کا دَفَرَسِشونَه: «کییا کا، ای آقا؟» عیسی واتشه: «هر چگا کا لاشه ای ببو، لاشخورن اوآکا جَمع آبون.»

۱ عیسیٰ اِشْتَن شَاگِرْدُون را مَثَلی وَرْدِشَه که نیشون پِده بَسی هَمیشَه دِعا بِگِرِن و هرگز دِیلِسرِد مَبُون. ۲ عیسیٰ وَاِشَه: «ایله شَهْری کا قاضی اِسْتَبَه که نِه خِدا کا تَرسی و نِه مَرْدَمی اَهْمیت بَدای. ۳ هَه شَهْری کا ایلَه و یوه رُنی بَه که هِی بومِی آ قاضی وَر و بَواتی: "چِمِن حَقی چِمِن دِشْمِنی کا وِیگَه". ۴ قاضی چِنْدی وخت آبی اِعتنا نِگِرْدِشَه. اَمّا آخِر اِشْتَن نِه وَاِشَه: "هَر چِن که آز نِه خِدا کا تَرَسِم و نِه مَرْدَمی اَهْمیت بَدایم، ۵ اَمّا چوم اِم و یوه رُن مَن وازِیْدَه گِرْدِشَه، چِی حَقی وِیگِرِم، تا اِشْتَن اِم هِی اومِه شَه نِه مَن نور اَمگِرِه!" ۶ آ یا خِدا اِشْتَن بَرگَزِیْدَه اون دادی اِنْرِسَه که شَو اَنْدَه روز آبی دَخونِن؟ آ یا چوون کَمک گِرِده را عَری اَگِرِه؟ ۸ شِمَه نِه بَوَاتیم که اَلْبَحَل چوون دادی اَرَسْتِه. اَمّا وختی اِنسانی زوئَه بومِی، آ یا زمینی کا ایمانی کا اَثری پِیدا بگِرْدی؟»

فریسی و باجگیری مَثَل

۹ اَمّا موقِع عیسیٰ کَسونی را که اِشْتَن صَالِح بَییه کا خاطر جَمع بینه و بقیه تحقیر بگِرْدین، اِم مَثَلی وَرْدِشَه و وَاِشَه: ۱۰ «دِ نَفَر شینه مَعْبَد که دِعا بِگِرِن، ایلَه فریسیون فِرَقَه عُلما کا بَه و ا ایلَه باجگیر بَه. ۱۱ ا فریسی مَنْدَه و اِشْتَن نِه اِنْتَه دِعا گِرْدِشَه و وَاِشَه: "خِدا، تِه شُکور بگِرْدیم که دِیتر مَرْدَمی شیوار دِزد نیمَه، بی اِنصاف نیمَه و زِناکار نیمَه، یا حتی اِم باجگیری شیوار نیمَه. ۱۲ هَفْتَه ای دِ گِرَه روزَه گِرِم، و توراتی دَه یک اَدبِیَه حَکمی، هَر چِی را که بَه دَس بَوآرْدیم، اِنجام بَدایم." ۱۳ اَمّا ا باجگیر دُور مَنْدَه بَه و حتی اَسْمونی، نی نِدیسی، بَلکَم اِشْتَن سینه کوی و بَواتی: "خِدا، بَه مَن گناه کار رَحْم بگِه." ۱۴ شِمَه نِه بَوَاتیم که اِم مَرْد صَالِح حَساب بَه و شَه اِشْتَن کَ، نِه ا فریسی. چوم هَر کِسی اِشْتَن یال اَگِرِه خَار بَی و هَر کِسی اِشْتَن فروتن اَگِرِه سَر بَلَنْد بَی.»

عیسی خِرْدَنون را خیره دِعا بگِرْدی

۱۵ مَرْدَم حَتی تَرَه خِرْدَنون نی بَوآرْدین عیسی وَر که اِشْتَن دَسی چوون سَر پَنه. شَاگِرْدِن وختی اِمی ویندِشونه، مَرْدَمی را زَرَه گِشَوْنَه. ۱۶ اَمّا عیسی اَوون دَخونْدِشَه اِشْتَن وَر و وَاِشَه: «بِدازه خِرْدِن بَان چِمِن وَر؛ چوون ناری مَگِرِه، چوم خِدا پَاتَشایی اِنْتَه رَه کَسونی شِن اِسْتَه. ۱۷ حَقِیْقَتاً شِمَه نِه بَوَاتیم، هَر کِسی خِدا پَاتَشایی ایلَه خِرْدَنی شیوار قَبول مَگِرِه، هَرگَز چِی دِیلَه نِدِشَو.»

ثروت‌منده رئیس

^{۱۸} یهودیون ایله رئیس، عیسی کا دَفَرِسْشه: «ای چاک اُستاد، آز بسی چه بَگَرِم تا اَبَدی یه زندگی وارث بوم؟» ^{۱۹} عیسی آبی نه واٹشه: «چیرا منه چاک بواتیش؟ هیچ کس خدا غیراز چاک نییه. ^{۲۰} احکامی بزنیش: زنا مَگه، قَتل مَگه، دزدی مَگه، دوروغه شهادت مَدَه، اِشته دَدَه و ننه حُرمت بَگه.» ^{۲۱} اَ مرد جَواو دوشه: «آز جَوونی کا اِم کارون گِردی انجام دوغمه.» ^{۲۲} عیسی وختی اِمی دَرِسْشه، اَ مردی نه واٹشه: «حَلا اِی چی گم داری؛ هَر چه هِسْتِرِه بَخَرَش و چِی پولی فقیرون دیله کا تقسیم بَگه، که اَسْمونی کا گنج داری. دومله پری و به مَن کا پیروی بَگه.» ^{۲۳} اَما وختی اَ مرد اِم چییون دَرِسْشه، وِر ناراحت آبه، چوم وِر ثروتش اِستَبَه. ^{۲۴} وختی عیسی ویندشه اَ مرد ناراحت آبه واٹشه: «چه چتینه ثروت‌مندن خدا پاتشایی دیله دَشون! ^{۲۵} دَوَه دَوِپَرده دَرزنی خِله کا راحتَره تا اِم که ایله ثروت‌منده اَدَم، دَشو خدا پاتشایی دیله.»

^{۲۶} کسونی که اِمی دَرِسْشونه، دَفَرِسْشونه: «بَس کی بَشای نجات پیدا بَگَره؟» ^{۲۷} اَما عیسی جَواو دوشه: «اَ چِی که اِنسانی را غِیر مَمکِن اِسته، خدا را مُمکِنه.»

^{۲۸} پطرس واٹشه: «دَیس، اَمه، چَمه کَ ول اَگَرَدَمونه و اومیمونه اِشته دومله!» ^{۲۹} عیسی آوون نه واٹشه: «حقیقتا شِمَه نه بواتیم، هیچ کسی نییه که خدا پاتشایی و اِستی، اِشتن کَ کا وِرْنی کا یا اِشتن پرا اون کا یا اِشتن دَدَه ننه کا یا اِشتن خَرْدَنون کا دَس بَگَره، ^{۳۰} و اِم دنیا کا چندی برابر به دَس مَوْرَه و اَ دنیا کا اَبَدی یه زندگی به دَس مَوْرَه.»

عیسی سومین پیشگوی درباره اِشتن مَرگ و زنده آبییه

^{۳۱} عیسی اِشتن دونزه گِله شاگردی بَرْدشه کناری را و آوون نه واٹشه: «دَیسَه، اَمه کارا بَشیمون اورشلیم. اوآکا هر چِی که پیغمبرن، اِنسانی زوئه درباره، نیویشتشونه اِتفاق دَلِکه. ^{۳۲} چوم اِنسانی زوئه اَدَن اَجَنبِیون دَس. اَوَن آبی مَسخره بَگَرْدین و آبی نه بَدرفتاری بَگَرْدین و چِی سَری کا چاف ویگرن، ^{۳۳} و شلاق رُنْدَه پَش آبی کِشَن و اَ، سَومین روزی کا زنده آبو.» ^{۳۴} اَما شاگردن هیچ گِله اِم چییون درک نَگَرْدشونه. عیسی گفی مَعنی آوون کا نین به و نِزونیشونه عیسی درباره چه چی گَف رُنَه.

کوزه گدایی شفا

۳۵ وختی عیسی آرسټه آریحا شہری نزدیکی، ایله کورہ مردی راه گناری کا نِشت بہ و گدایي بگردی. ۳۶ وختی آ جماعتی سسی دَرَسِشہ کہ اوآکا دویپرن، «دَفَرَسِشہ کہ چہ خَوَرہ؟» ۳۷ آپی نہ واتشونہ: «عیسای ناصری کارا دویپرہ.» ۳۸ آ کورہ مرد خِلیع ژندِشہ: «ای عیسی، داوود پاتشاه زوئہ، بہ مِن رَحْم بَگہ!» ۳۹ کسونی کہ جماعتی ناری کا بینہ، آپی را زَرہ گِتشونہ و آپی نہ واتشونہ کہ ساکت آبو. اما آ کورہ مرد وِرتر خِلیع بگردی، بواتی: «ای داوود پاتشاه زوئہ، بہ مِن رَحْم بَگہ!» ۴۰ عیسی مندہ و دستور دوشہ آ مردی بوآن چپی وِر. وختی اومہ نزدیک، عیسی یی کا دَفَرَسِشہ: ۴۱ «پیسترہ بہ تِرا چہ بَگرم؟» آ مرد جَواو دوشہ: «آقا، پیستِمہ ہتی بوینم.» ۴۲ عیسی یی نہ واتشہ: «بوین! اِشْتہ ایمان تہ شفا دوعشہ.» ۴۳ ہ لحظہ آ کوری چمن ہتی سو اومینہ و ہتہ کہ خدا شُکور بگردی، شہ عیسی دوملہ. وختی مردم اِمی ویندشونہ گرد، خدا شُکور گردشونہ.

۱۹

عیسی و باجگیرہ زگای

۱ عیسی شہ آریحا شہری دیلہ و شہری دیلہ نہ کارا دویپری. ۲ اوآکا مردی بہ کہ چپی نوم زگا بہ، زگا باجگیرون سر دَستہ بہ و ثِرَوَتَمند بہ. ۳ آ، پیستِشہ بوینی عیسی کیئہ، ولی چوم جماعت وِر بینہ نیمشای عیسی بوینی، چوم کہ زگا پاچ بہ. ۴ بس نارتر ویریتہ و ایلہ چنارہ داری کا پشہ گفا تا عیسی بوینہ، چوم قرار بہ کہ عیسی آراہ نہ دویپری. ۵ وختی عیسی آرسټہ آ جگا، گفا دیبِشہ و آپی نہ واتشہ: «زگا، بَمَج بری جیر، چوم بسی اوری اِشْتہ ک کا بومونم.» ۶ بس زگا اَلْبَحَل اومہ جیر و شادی نہ عیسی بردشہ اِشْتَن ک. ۷ وختی مردم اِمی ویندشونہ، گرد غُرُغُر بگردین بواتین: «عیسی شہ ایلہ گناہ کاری ک میہمونی.» ۸ زگا پَرِشْتہ و عیسای خِداوندی نہ واتشہ: «آقا دِیس، چمن دارایی نِصَبی آدَم فقیرون. و اگم کسی کا چپی ناحق ویگتَمہ، چار برابر یی آگاردنم.» ۹ عیسی یی نہ واتشہ: «اوری نِجات اومہ بہ اِم ک، چوم کہ اِم مردی نِ ابراهیم پیغمبری اولاد اِستہ. ۱۰ چوم اِنسانی زوئہ اومہ تا ژون آبہ دوملہ بگردہ و آپی نِجات بَدہ.»

پاتشاه و دہ گلہ نوکری مٹل

۱۱ هَتَّه که اَوْنِ اِمِ گفون گوش بَداین، عیسی اِشتن گفی دومله کا ایله مَثَلی وِرْدِشَه، چوم اورشلمی نِزْدیکی کا بَه و مردم خِیال بَگَرْدین خِدا پَاتشاپی هَ موقع آشکار بَی. ۱۲ بَس عیسی واِشَه: «ایله نَجیب زاده ای شَه دورَه مَمْلِکتی را که اِشْترَا پَاتشاپی مَقامی وِیگرَه و دومله آگَرْدَه. ۱۳ بَس دَه نفر اِشتن نوگرون کا دَخونْدِشَه و هَر نفری ایله طِلا سِکَه آدوْشَه که ایله کاریگری سَه مانگی دستمزد بَه و واِشَه: "تا چِمِن آگَرْدِستَه موقع اِمی نه تِجارت بَگَرَه." ۱۴ اَمّا مردمی که قرار بَه اوون سلطنت بَگَرَه، اِپی کا بیزار بینه؛ مردم چِپی دومله قاصِدونی وِیسا آگَرْدِشونه که بو اِچِن: "اَمَه نِپِیستِمونَه اِمِ مَرْد بَر اَمَه حکومت بَگَرَه." ۱۵ وختی که اِ مَرْد پَاتشاپی مَقامی وِیگِشَه، آگَرْدِستَه و دستور دوشَه تا نوگرونی که اوون سِکَه آدوْغَش بَه دَخونِن تا بوینه که هَر گمیلَه چَدَه سود گَرْدِشونه. ۱۶ اَوّلی اومَه و واِشَه: "اَقّا، اِشْتَه سِکَه دَه گِلَه سِکَه دِیبر سود گَرْدِشَه." ۱۷ پَاتشا اِپی نه واِشَه: "اَحْسَنَت، اِی چاک نوگر! چوم ایله روکَ کاری کا امانتدار بیش، دَه گِلَه شَهری حکومتی بَه تِن دَسپارِم." ۱۸ دَوّی اومَه و واِشَه: "اَقّا، اِشْتَه سِکَه پینج گِلَه سِکَه دِیبر سود گَرْدِشَه." ۱۹ پَاتشا اِپی نه نی واِشَه: "تَه نی پینج گِلَه شَهری حکمرانی بَگَه." ۲۰ دومله سومی اومَه و واِشَه: "اَقّا، بفرما، اِمِ اِشْتَه سِکَه! اِپی دَسمالی کا دِپِیچِستِمَه، غم هَرْدَمَه. ۲۱ چوم تَه کا تَرسیم، چوم که تَه سختگیرَه مَرْدی اِستیش. اِ چِپی که نوعَه نِزَه، بَگری و اِ چِپی که کاشْتَه نِزَه دِرو بَگَرْدیش." ۲۲ پَاتشا اِپی نه واِشَه: "اِی بَدکارَه نوگر، تَه اِشْتَه گفون نه محکوم بَگَرْدیم. تَه که بَزنیش از سختگیرَه مَرْدی اِستیمَه، اِ چِپی که نوعَه نِیمَه، بَگَرِم و اِ چِپی که کاشْتَه نِیمَه دِرو بَگَرْدیم، ۲۳ بَس چِیرا چِمِن پولی صَرافون آدوْغَه نِزَه که وختی آگَرْدِستیمَه، اِپی چِپی سودی نه وِیگَرِم؟" ۲۴ بَس پَاتشاه، کسونی نه که او آکا مَنْدَه بینه، واِشَه: "سِکَه اِپی کا وِیگرَه و اِدِیته اِ کسی که دَه گِلَه سِکَه هِستِشَه." ۲۵ اَوْن پَاتشاه نه واِشونه: "اَقّا، اِ که دَه گِلَه سِکَه هِستِشَه!" ۲۶ پَاتشاه واِشَه: "شِمَه نه بَوَاتیم، هَر کسی هِستِشَه، وِرْتَر بَی آدوْغَه بَی؛ اَمّا اِ کسی که نِشَه، حَتّی اِ چِپی که هِستِشَه نی اِپی کا وِیگَتَه بَی. ۲۷ حَسَه چِمِن اِ دِشَمَنون که نِپِیستِشونه از اوون سلطنت بَگَرِم، بو اَرَه اییا و چِمِن پِیشی کا سَر اَبَرَه."

عیسی ایله شاهي شیوار دَشو اورشلمی دیله

۲۸ وختی عیسی اِمِ چِیون واِشَه، چوون نارناره راه دَلْکَه اورشلمی را. ۲۹ وختی عیسی نِزْدیک اَبَه بَه بیت فاجی و بیت عَنیا دِه اَوْن، که زیتون کوه کا

بینہ، دِ گلہ اِشْتَن شَاگِرْدُون کا ویسا آگِرْدِشہ و واٹِشہ: ^{۳۰} «بِشَہ آدِہی کہ شِمَہ رو بہ رو کا اِستہ. وختی دِہ دیلہ دَشیرونہ، ایلہ اَلَاغْ گُره ای اوآکا دَوسْتہ پیدَا بَگِرْدِیرون کہ حَلا کسی اِپی دَنِشْتہ نِیْتہ. اِپی آگِرہ و بوآرہ اییا. ^{۳۱} اگم کسی شِمَہ کا دَفرِشَہ: «چیرا اِپی آگِرہ؟» بوآجَہ: «خِداوند اِپی لَازِم دَارِہ.» ^{۳۲} بَس آدِ نَفَر شینہ و ہمہ چی ہتہ کہ عیسی واٹش بہ ویندِشونہ. ^{۳۳} وختی اَلَاغْ گُره آگِرین، چپی صَاحِبِین اوون نہ واٹشونہ: «چیرا اَلَاغْ گُره آگِرہ؟» ^{۳۴} اُون جَوَاو دوشونہ: «خِداوند اِپی لَازِم دَارِہ.» ^{۳۵} اُون اَلَاغْ گُره وِرْدِشونہ عیسی وِر، و اِشْتَن اَبَا اُون اَلَاغْ گُره سَری کا پَرْدِشونہ و عیسی نِشوندِشونہ چپی سَری کا. ^{۳۶} ہنْتہ کہ عیسی بَشی، مَرْدَم اِشْتَن اَبَا اُون رَاہ سَری کا جِیگِرین. ^{۳۷} وختی عیسی زیتون کوه سَرا جِیری نِزْدِیک آبَہ، چپی شَاگِرْدُون جَماعت گِرْد، شادی نہ گِرْدِ مَعْجَزہ اونی راکہ اِپی کا ویندِشون بہ، بَلَنْدَہ سَسی نہ خِدا شُکُور بَگِرْدِین، ^{۳۸} و بَوَاتِین:

«مُتَوَارِک اِستہ پَاتِشَایِی کہ خِداوندی نومی نہ بوئی!

صَلح و سَلَامتی اَسْمونی کا و جَلال عَرش بَرینی کا ببوا!»

^{۳۹} بعضی فریسیون کا جَماعتی دیلہ نہ عیسی نہ واٹشونہ: «اَسْتاد، اِشْتہ شَاگِرْدُون رَا زَرہ بَگَہ!» ^{۴۰} عیسی جَوَاو دوشہ: «شِمَہ نہ بَوَاتِیم اگم اِمِن سَاکِیت اَبُون، اِم سِنگِن خِلیع بَگِرْدِین!»

^{۴۱} وختی عیسی اورشلمی نِزْدِیک آبَہ و شہری ویندِشہ، اِپی رَا داد گِرْدِشہ ^{۴۲} و واٹشہ: «گَشکی تَہ نی، اِم روزی کا بَفہمِیش کہ چہ چیونی بہ تِرا صَلح و سَلَامتی بوآرْدِین. اَمَّا حِسَہ اِشْتہ چَمون کا نِین اِستہ. ^{۴۳} چوم روزونی بومین کہ اِشْتہ دِشَمِن اِشْتہ دوری کا سَنگَر وِج آگِرین و تَہ مَحاصِرہ بَگِرْدِین، و ہَر طرفی نہ تہ فِشار بوآرْدِین، ^{۴۴} و تَہ خَاکی نہ یِکسان بَگِرْدِین، تَہ و اِشْتہ خِرْدَنون اِشْتہ دیلہ کا. اُون نِیْتِرِزِن سِنگی، سِنگی سَری کا بومونہ؛ چوم اَرْمانی کہ خِدا اِشْتہ کِمکی رَا اوْمَہ زِفہمِستَرہ.»

عیسی معبدی کا

^{۴۵} دوملہ عیسی شَہ معبدی دیلہ و دَمَنْدَہ فروشنْدہ اُون پِرون بَرگِرْدِہ، ^{۴۶} و اوون نہ واٹشہ: «مَقْدَس نِیویشْتہ اُون کا نِیویشْتہ بییہ: «چِمِن کَ عِبَادَت کَ بَی،» اَمَّا شِمَہ اِپی دِزْدون لُونہ' وِج آگِرْدِرونہ.» ^{۴۷} ہر روز عیسی معبدی کا تَعْلیم بَدای. سَران کَاہِنِین و توراتی مَعْلِمِین و قومی رِئِیسِین، اِمی دوملہ بینہ کہ عیسی نابود بَگِرِن، ^{۴۸} اَمَّا کَاری چوون دَسی کا نِترای، چوم مَرْدَم گِرْدِ عیسی

عیسی اختیارات

ای روز وختی که عیسی معبدی کا مردمی تعلیم بدای و خدا پأتشایی شاده خوری آوون را اعلام بگردی، سران کاهین و توراتی معلین، شیخون همراه اومینه چپی ور^۲ و واتشونه: «بمون نه بواج، چه حق و اختیاری نه ام کارون بگردیش؟ کی ام اختیاری ته آدوعشه؟»^۳ عیسی جواو دوشه: «آز نی شمه کا سوالی دفرسیم؛ منه بواجه،^۴ غسل تعمیدی که یحیی بدای خدا طرفی کا به یا انسانی طرفی کا؟»^۵ اون یندی نه مشورت گردشونه، واتشونه: «اگم بواجم، خدا طرفی کا به»، عیسی بواتی، «بس چیرا آبی ایمان نوردرونه؟»^۶ اما اگم بواجم، انسانی طرفی کا به»، گرد مردم امه سنگسار بگردین، چوم اون قانع بینه که یحیی ایله پیغمبر به. «^۷ بس واتشونه: «امه نیمزنم چی کی طرفی کا استه.»^۸ عیسی آوون نه واتشه: «آز نی شمه نه نواجم چه حق و اختیاری نه ام کارون انجام بدایم.»

شیره باغوونون مثل

^۹ عیسی مردمی را ام مثلی وردشه، واتشه: «ایله مردی ایله انگره باغی وج آگردشه و اجاره دوشه به چن گله باغوونون و اشن وزه مدتی را شه ایله دیتر مملیکتی را. انگره چینی فصل که آرسته، باغ صاحب ایله نوگر، ویسا آگردشه باغوونون ور تا تلی باغی میوه کا یی آدن. اما باغوونن آ نوگری ژندشونه و تی یه دس ویسا آگردشونه. ^{۱۱} باغ صاحب ایله دیتر نوگری ویسا آگردشه. اما باغوونن آبی نی ژندشونه و آبی نه بد رفتاری گردشونه و تی یه دس ویسا آگردشونه. ^{۱۲} بس سومین گره ایله نوگری ویسا آگردشه. اما ام ایله نی زخمی گردشونه و بگردشونه. ^{۱۳} بس باغ صاحب واتشه: «چه بگرم؟ چمن عزیزه زوئه ویسا آگرم؛ بلگم آبی حرمت بگرن.» ^{۱۴} اما وختی باغوونن زوئه ویندشونه، یندی نه واتشونه: «وارث امه. بایه آبی بکشم تا ارث امه آرسته.» ^{۱۵} بس آزوئه انگره باغی کا بگردشونه و کشتشونه.

«حسه باغی صاحب آوون نه چه بگردی؟ ^{۱۶} باغ صاحب بوئی و آ باغوونون نابود بگردی و انگره باغی دسپاره دیتر گسون.» وختی مردم امی

دَرَسِشُونَه، وَاِتِشُونَه: «خِدا مَكْرِه!»^{۱۷} اَمَّا عِيسَى اَوون زول رَنْدِشَه و وَاِتِشَه:
 «بَس مَقْدَس نِيوِيشْتَه اون اِم بَخْشِي مَعْنِي چَه كِه بَوَاتِي:
 ”اَسِنْگِي كِه بَنَّا اِن اَبِي رَدْگَرْدِشُونَه،
 حَسَه بِيِنَا اَصْلِيَه سِنْگ بِيِيَه“ ؟

^{۱۸} هَر كِيسِي اَسِنْگِي سَر بَرِگْنَه خِرْد بِيِي، و وِخْتِي كِه اَسِنْگ كِيسِي سَر بَرِگْنَه، اَبِي لِه
 بَكْرَدِي.»^{۱۹} توراتِي مَعْلِمِن و سَران كَاهِنِن چَمِي دَوْمَلَه بِيِنَه كِه هَه سَاعَتِي كَا اَبِي
 دَسْتَكِر بَكْرِن چوم زونِستِشُونَه كِه اَمَثَلِي دَرِبَارَه چَوون بَوَاتِي، اَمَّا مَرْدَمِي كَا
 تَرَسِين.

سوال درباره خراج آدوعه

^{۲۰} اَبَس اَوْن عِيسَى زِير نَظَر گِتْشُونَه و جاسوسونِي وِيسَا اَكْرَدِشُونَه كِه اِشْتَن
 صاف و صَادِق نِيشون بَدَاين تَا عِيسَى گَفون كَا بَهونَه اِي پيدا بَكْرِن، كِه عِيسَى
 پَكْشُونِن فَرْمَانْدَارِي مَحْكَمَه رَا.^{۲۱} اَبَس جاسوسِن عِيسَى كَا دَفْرَسِشُونَه: «اَسْتاد،
 اَمَه بَزْنِيمون كِه تِه هَر چِي كِه بَوَاتِيش و تَعْلِيم بَدَايش دَرَسْت اِسْتَه و هِيچ
 كِيسِي كَا طَرَفْدَارِي نِگَرِي، بَلْگَم خِدا رَاه، دَرَسْتِي نَه تَعْلِيم بَدَايش.^{۲۲} اَيَا اَمَه رَا
 جَايز اِسْتَه كِه رومي اِمپْرَاطُورِي خَرَاج اَدِيْتِم يَا نِه؟»^{۲۳} اَمَّا عِيسَى چَوون حِيَلَه
 زونِستِشَه، و اَوون نَه وَاِتِشَه:^{۲۴} «اَبِي دِينار بَه مِ نِيشون بَدِيِيَه. چِيكِي دِيم و
 چِيكِي نَوْم سَكِه سَرِي كَا اِسْتَه؟ جَوَاو دوشونَه: «رومي اِمپْرَاطُورِي شَن.»
^{۲۵} عِيسَى اَوون نَه وَاِتِشَه: «بَس اَ چِيُونِي كِه اِمپْرَاطُورِي شَنَه اَدِيِيَه بَه اِمپْرَاطُور
 اَ چِيُونِي كِه خِدا شَنَه اَدِيِيَه بَه خِدا!»^{۲۶} اِنْتَه، اَوْن نِشَاستِشُونَه كِه مَرْدَمِي پِيشِي
 كَا عِيسَى چِي اِشْتَن گَفون نَه تَلَه كَا دَرَفِنِن، بَلْگَم هَتَه كِه چِي جَوَاوِي كَا خِيرون
 بِيِنَه، سَاكِيْت مَنْدِينَه.

سوال دَفْرَسَه درباره قيامت روز

^{۲۷} چَن نَفَر صَدُوقِيون فِرْقَه عُلْمَا كَا اومينه عِيسَى وَر. صَدُوقِيين قَبول نِدارين
 كِه مَرْدَه اِن زَنْدَه اَبون.^{۲۸} اَوْن عِيسَى كَا سَوَالِي دَفْرَسِشُونَه و وَاِتِشُونَه: «اَسْتاد،
 مَوْسِي پِيغْمَبَر اَمَه رَا نِيوِيشْتِشَه كِه اَكَم اِيلَه مَرْدِي پَرَا بِيْمَرَه، وَا مَرْدَه رُن بَدَارَه اَمَّا
 خِرْدَن مَدَارَه، اَمِرْد بَسِي اَوِيَوَه رُنِي پَرَه كِه اِشْتَن پَرَا رَا نَسَلِي بَنَه.^{۲۹} حَسَه هَفْت
 گِلَه پَرَا بِيِنَه. اَوَلِين پَرَا اِيلَه رُنِي بَرْدِشَه و بِيْدون اِم كِه خِرْدَنِي بَدَارَه مَرْدَه.
^{۳۰} دَوْمَلَه دَوْمِين پَرَا^{۳۱} و سَوْمِي پَرَا اَرُنِي بَرْدِشُونَه و هِنْتَه هَر هَف گِلَه پَرَا مَرْدِينَه،
 بِي اِم كِه خِرْدَنِي بَدَارِن.^{۳۲} اَخِرْسَر اَرُنِي نِي مَرْدَه.^{۳۳} حَسَه، رُوْزِي كَا كِه مَرْدَه اِن

زنده آبون، آ ژن چوون گمیله ژن بی؟ چوم هر هف گله برا آینه ازدواج گردشونه.»

^{۳۴} عیسی آوون نه وايشه: «ام دنیا مردم ژن ببردین و شو بگردین. ^{۳۵} اما گسونی که لیاقت دارن آرستین به آ دنیا و مرده پش زنده آبون، نه ژن ببردین و نه شو بگردین، ^{۳۶} چوم آون د نیمشان بمرن چوم که آون ملائیکه اون نه برابری نه. آون خدا خردنی نه، چوم که قیامتی خردنی نه. ^{۳۷} اما ام حقیقتی که مرده ان زنده آبون، چپی استه که حتی موسی پیغمبر نی، وش گتته بوته ماجرا تعریف کرده موقع، آپی آشکار آگره. اوآ که خداوندی نه، ابراهیمی خدا و اسحاقی خدا و یعقوبی خدا بواتی. ^{۳۸} خدا، مرده اون خدا نییه، بلگم زنده اون خدایه؛ چوم چپی وری کا گرد زنده اینه.» ^{۳۹} آ موقع بعضی توراتی معلمین وايشونه: «استاد، چاک وا تره!» ^{۴۰} و د هیچکس جرأت نگرديشه عیسی کا سوالی دفرسی.

مسیح چیکی زونه استه؟

^{۴۱} دومله عیسی آوون نه وايشه: «چنته یه که بواتین مسیح داوود پاتشاه زونه استه؟ ^{۴۲} چوم داوود ایشن، زبوره کیتابی کا بواتی: «خداوند چمن خداوندی نه وايشه:

چمن راست دسی کا بنش

^{۴۳} تا وختی که اشته دشمنون اشته پا جیری کا درفیم.»

^{۴۴} آگم، داوود آپی نه 'خداوند' بواتی، بس چنته بی که مسیح داوودی زونه ببو؟»

^{۴۵} هته که مردم گرد گوش بداین، عیسی ایشن شاگردون نه وايشه: ^{۴۶} «توراتی معلمون کا دوری بکره، آون خشینه که بلنده آبا اون نه راه بشون. خشینه که مردم کوچه بازارون کا آوون را سلام بگرن و عبادتگاه اون کا چاکترین جگا اون بدارن و میهمونیون کا مجلسی گفای نه سری کا بنش. ^{۴۷} آون، آپی وری نه ویوه ژنکون ک آون غارت بگردین و آ وری نه، ایشن چاک نیشون دوعه واسی، طولانی دعا بگردین. چوون مکافات برک چتین تر بی.»

فقیره ویوه ژنی هدیه

^۱ عیسی اطرافی دیبشته و ویندشه که ثروتمندین ایشن هدیه اون درفین

معبدی صندوقی کا۔^۲ ایلہ فقیرہ ویوہ ژنی، نی ویندیشہ کہ دِ قِران دَرَفَنَدِشہ صندوقی کا۔^۳ عیسیٰ وائشہ: «حقیقتاً شِمہ نہ بواتیم، اِم فَقیرہ ویوہ ژنِ گِردِ آوون کا وِرتر پول دَرَفَنَدِشہ۔^۴ چوم آونِ گِرد، اِشتنِ داراییِ اِضافی کا آدوشونہ، اَمّا آژنِ اِشتنِ فقیری نہ، گِرد چیی کہ داریستہ، آدوشہ.»

آخِرِ زمانی نیشونہ اِن

°وختی کہ چن نفر دربارہ معبدِ گَف ژنِین و بواتین کہ چنتہ خاصہ سنگون و ہدیہ اون نہ بَرکِ بییہ، عیسیٰ وائشہ:^۱ «روزونی بومی کہ اِم چییونی کا کہ بَونِدیرون، دِ اییا کا سِنگی، سِنگی سَرِ باقی نِمونہ بَلگمِ گِرد وِبیون.»
 ۱۲ آونِ عیسیٰ کا دَرَفَسشونہ: «اُستاد، گینی اِم چیینِ اِتِفاقِ دَلکِن و چوونِ نَزْدیکِ آبِیہ نیشونہ چہ؟»^۸ عیسیٰ وائشہ: «ویرا ببییہ کہ گمراہ مَبییہ؛ چوم وِر گسِن چِمِنِ نومی نہ بومِین و بواتین: ”آز آ، اِستیمہ“ و ”زمان موعود آرسَتہ.“
 چوونِ دوملہ مَشِییہ.

۹ وختی جَنگون و آشوبونِ خَوَری دَرَسہ، مَرسہ. چومِ اوّلِ بَسیِ اِم چیینِ اِتِفاقِ دَلکِن، ولی اَلْبَحَلِ دنیا بہ آخِرِ آرزِستہ.»^{۱۰} دوملہ عیسیٰ آوون نہ وائشہ: «مِیلَّتِی دِیترِ مِیلَّتِی ضِد و حَکومتِی دِیترِ حَکومتِی ضِد، پَرژن. ۱۱ یالِ زلزله اِن بومِین و جور بہ جورہ چگا اون کا قحطی و طاعون بومی. تَرسناکِ چیینِ اِتِفاقِ دَلکِن و اَسْمونی کا یالِ نیشونہ اِن ویندہ بَیین. ۱۲ اَمّا گِردِ اِم چییونِ اِتِفاقِ دَلکِہ پیش، شِمہ دَسْتِگیرِ بَگردین و اذیتِ آزارِ بَگردین. شِمہ عبادتگاہِ اون و زندانونِ تحویلِ بَداین. و چِمِنِ نومی و اسی، شِمہ بَبردین پاتشا اون و فرماندارون وِر. ۱۳ اِم شِمہ را فرصتی بَیی تا شہادتِ بَدییہ. ۱۴ بَس اِمی چاکِ شِمہ یادی کا بَدارہ کہ نارنارہ فیکرِ مَگرہ کہ چنتہ بَسیِ جواوِ بَدییہ. ۱۵ چومِ آز، بہ شِمہ اِنتہ قدرتِ گَف ژندہ و حکمتی بَدایم کہ ہیچِ گلہ شِمہ دِشمنون کا نِیمِشانِ اَپی نہ مقاومتِ یا مخالفتِ بَگرن. ۱۶ حَتّی شِمہ دَدہ نَنہ و شِمہ برا اِن و شِمہ خویشِن و رَفِقِن، شِمہ تسلیمِ دِشمنِ بَگردین و بعضی شِمہ کا نی کِشِن. ۱۷ گِردِ مردمِ چِمِنِ نومی و اسی شِمہ کا بیزارِ بَیین. ۱۸ اَمّا ایلہ تارِ مونی شِمہ سَری کا گمِ نِیب. ۱۹ شِمہ صبر و تحملی نہ، شِمہ جانی نجاتِ بَدایرون.

۲۰ «اَمّا وختی ویندرونہ اورشلیمی شہر، لَشگرون نہ محاصرہ بییہ، بَزونہ کہ چیی ویرونہ بییہ نَزْدیکہ. ۲۱ آ موقع، کسونی کہ ولایتِ یهودیہ کا مَندینہ دَوَرنِ کوهِ اون را و کسونی کہ شہری دیلہ کا مَندینہ شہری کا بَرونِ بَرشون، و کسونی

که دشت و صحرا کا اینہ شہری دیلہ مَدَشون۔^{۲۲} چوم آ روزن، مکافات روز استینہ کہ آون کا، مقدس نیویشتہ ان گرد اِنفاق دَلِکِن۔^{۲۳} وای بہ حال ژنکونی کہ آ روزن کا حامیلہ اینہ و ژنکونی کہ خردن شت بداین! چوم بَرک مصیبتی ام سرزمینی دامنگیر بی و ام قوم غَضب الہی گرفتار ببین۔^{۲۴} آون شمشیری دم دَلِکِن و گرد قومون آسیر ببین، و تا اجنبیون سلطنتی دوران بہ آخر آرستہ، اجنبی ان اورشلمی پایمال بگردین۔

«^{۲۵} آفتاو و مانگ و ستارہ اون کا علامتونی بی۔ زمینی کا، میلتن دریا و موجون جوش و خروشی کا پریشون و تشویش ببین۔^{۲۶} مردم ترسی کا و ام فکری کا کہ دنیا سر چہ بلاپی کارا بوئی بیهوش ببین، چوم اقدرتی کہ آسمونون محکم عم بردین، لرزن۔^{۲۷} آ موقع انسانی زوئہ بویندین کہ قدرت و برک جلالی نہ ایلہ خری نہ بوئی۔^{۲۸} وختی ام چیون اِنفاق دَلِکہ شروع بہ، راست بومونہ و شَمہ سرون گفا بگرہ، چوم شَمہ آزادی نزدیکہ!»

^{۲۹} عیسی آون را ام مَثلی وَرِدشہ و وايشہ: «انجيل دار و گرد دارون ديسہ۔^{۳۰} ہنتہ کہ لیو بوآردین، بشایرون بوینہ و بزونہ کہ تاووستون نزدیکہ۔^{۳۱} ہنتہ نی، وختی بوینہ ام چین اِنفاق دَلِکِن، بزونہ کہ خدا پأتشایی نزدیک استہ۔^{۳۲} حقیقتاً شَمہ نہ بوآتیم، تا گرد ام چین اِنفاق مَدَلِکِن، ام نسل از بین نیشون۔^{۳۳} آسمون و زمین از بین بشین، اما چمن گفن از بین نیشون۔

«^{۳۴} ویرا ببیئہ، نبادا، عیش و نوش و مستی و زندگی نگرانی ان شَمہ دیلی سنگین آگرن، و آ روز ایلہ تلہ ای شیوار ای دفعہ شَمہ گیر دَرَفَنہ۔^{۳۵} چوم ام اِنفاق گرد مردمی سر، دنیا سرتاسری کا بوئی۔^{۳۶} بس ہمیشہ ویرا ببیئہ و دعا بگرہ کہ قدرت بدارہ تا گرد ام چییون کا کہ ہم زودیون پیش بومین، بشایہ دَوَزہ و انسانی زوئہ حضوری کا بومونہ.»

^{۳۷} عیسی ہر روز معبدی کا تعلیم بدای ولی ہر شو شہری کا برون بشی و زیتون کوه کا شوی صب آگری۔^{۳۸} صب دم گرد مردم عیسی گفون دَرَسہ را بومین معبد چپی ور۔

۲۲

یہودا خیانت

اَقَطِرہ عید کہ آیینہ پسخ عید بوآتین کارا نزدیک آبی،^۲ و سران کاهین و توراتی معلین ایلہ راہی دوملہ گردین کہ عیسی بکشین، چوم مردمی کا ترسین۔

۳ آ موقع شیطان، یهودای معروف به آسخریوطی دیلی کا رخنه گردشه. یهودا ایله آ دونزه گله شاگردون کا به. ۴ یهودا شه سران کاهنون و معبدی نگهبانون فرمانده اون ور و اوون نه درباره ام که چنته عیسی آده چوون دس گف زنده شه. ۵ اون خوشحال آینه و موافقت گردشونه که یی پول آدن. ۶ یهودا نی قبول گردشه و فرصتی دومله گردی که جماعتی نیکی، عیسی آده چوون دس.

آخرین سور

۷ فطیره عیده روز آرتسه که آ روزی کا بسی، پسخ عیدی قریونی به وزه سر آیرین. ۸ بس عیسی، پطرس و یوحنا ویسا آگردشه، و واتشه: «پشه و پسخ عیدی سوری امه را آماده آگزه تا برم.» ۹ اون دفرسشونه: «پسیره کیا کا تدارک بویم؟» ۱۰ عیسی جاوا دوشه: «وختی که شهری دیله دشینه، ایله مردی ایله آوه زره ای نه شمه نه دیمادیس بی. چپی دومله پشه ه گی دیله که آبشی. ۱۱ آ ک صاحبی نه بوآجه: "استاد بواتی: 'میهمون خونه کیاره تا پسخ عیدی سوری چمن شاگردون نه برم؟" ۱۲ آ، ایله یال بالا خونه ای که فرش بیته شمه نشون بدای. اوآکا تدارک بوینه.» ۱۳ اون شینه و همه چی هته ویندشونه که عیسی اوون نه واتش به و پسخ عیدی سوری آماده آگردشونه. ۱۴ وختی که ساعت مقرر آرتسه عیسی، حواریون نه سفره سری کا نشته. ۱۵ عیسی اوون نه واتشه: «چده مشتاق بیمه چمن عذاب گشه پیش، ام پسخ عیدی سوری شمه نه برم. ۱۶ چوم شمه نه بواتیم که د آبی کا نیبرم تا آ زمان که خدا پاتشاپی کا انجام ببو.» ۱۷ دومله قدره پگتسه و شکور کرده پش واتشه: «امی بگره و شمه میانه کا تقسیم بگره. ۱۸ چوم شمه نه بواتیم که حسه نه تا خدا پاتشاپی اومه موقع از د آنگره رزی محصولی کا نچم.» ۱۹ دومله نونی پگتسه و شکور کرده پش آبی پله گردشه و آدوشه اوون و واتشه: «ام چمن بدن استه که شمه را آدوغه بی؛ ام کاری چمن یاد ورده را انجام بدیه.» ۲۰ هنته نی، سوره پش قدره پگتسه و واتشه: «ام قدره چمن خون استه که ام تازه عهدی، آبی نه مهر بگردیم و چمن خون شمه واسی ویبو. ۲۱ اما آ کسی که به من خیانت بگردی، چپی دس چمن دسی نه سفره دیله کا استه. ۲۲ چوم انسانی زوئه، هته که آبی را مقدر استه، بشی، اما وای به حال آ کسی که آبی تسلیم دشمن بگره.» ۲۳ اون دمندینه یندی کا دفرسین گمیله اوون کا بشای کسی ببو که اینته کاری بگردی.

۲۴ شاگردون دیله کا نی بَحْثی دَلْکَه که گمیلَه آوون کا گِردی کا یالْتَرَه. ۲۵ عیسی آوون نه واتِشه: «دِیِر قومون پاتشاپین و حاکمین آوون را حکمرانی بگردین؛ ولی مردم هنی آوون نه خیرخواه بواتین. ۲۶ اَمَّا شِمَه اِنْتَه مَبِیَّه. یالْتَرین شِمَه دیله کا بَسی روکه گله شیوار ببو و رئیس بَسی نوگری شیوار ببو. ۲۷ چوم گمیلَه یالْتَرَه، آ کسی که سِفره سَری کا نِشَه یا آ کسی که نوگری بگردی؟ بگم آ کسی که سِفره سَری کا نِشَه یالْتَر نِیَه؟ ولی آز شِمَه دیله کا آ کسی شیوار اِستیمَه که نوگری بگردی.

۲۸ «شِمَه گسونی اِستِرونه که چِمین آزمایشون کا مِنه مند بیرونه. ۲۹ بَس هَتَه که چِمین دَدَه، سَلطنتی مِین آدوَعشه، آز نی آپی آدَم بَه شِمَه، ۳۰ تا شِمَه نی چِمین پاتشاپی کا چِمین سِفره سَری کا، بَرَه و بِنَجَه و تَخْتون سَری کا بِنِشَه و اِسرائیلی دونزه گله قبیلَه داوری بگرَه.

۳۱ «ای شَمعون، ای شَمعون، دَیس شیطان پیستِشه تَه اِشته را جِدا آگرَه هَتَه که گندِمی چپی پوشه کا جِدا آگرِن. ۳۲ اَمَّا آز بَه تِرا دِعا گِردِمَه تا اِشته ایمان آز بین مَشو. وختی هنی آگرِدِستِیش اِشته پِرا اون قَوْت بَدَه.» ۳۳ پطرس جِواو دوشه: «آقا، آز حاضریمه هَم تِنَه زیندون دَلْکِم و هَم تِنَه بِمِرم.» ۳۴ عیسی جِواو دوشه: «پطرس، تِنَه بواتیم که اوری، سوکی خَنَدِه پیش، تَه سِه گَرَه هاشا بگردیش که مِین آزونی.»

۳۵ دومله عیسی آوون نه واتِشه: «وختی که بیدون پوَل کیسه، کوله بار و گفش، شِمَه وِیسا آگرِدِمَه، بگم چپی محتاج بیرونه؟» اُون جِواو دوشونه: «نِه، هیچ چی.» ۳۶ عیسی آوون نه واتِشه: «اَمَّا حِسَه هَر کسی پوَل کیسه یا کوله بار هِستِشه، آپی بگرَه و آ کسی که قَمَه نِشَه اِشْتَن آبا بخرِشه، قَمَه بخرِه. ۳۷ چوم شِمَه نه بواتیم که مقدَس نیویشته اون اِم پیشگویی درباره چِمین بَسی اِتِّفاق دَلْکَه که بواتی: "آ، تقصیر کارون دَسته کا حساب بَه،" ها، چپی که درباره چِمین نیویشته بیته، کارا اِتِّفاق دَلْکَه.» ۳۸ شاگردِن واتِشونه: «آقا، دَیس، اییا کا دِ گله قَمَه هِستِمونَه.» اَمَّا عیسی جِواو دوشه: «اِم گِفن دِ وِستینه.»

دعا زیتون کوه کا

۳۹ دومله عیسی شَه برون و طبق عادت، شَه زیتون کوه را و چپی شاگردِن نی چپی دومله شینه. ۴۰ وختی عیسی آرسْتَه آجگا، آوون نه واتِشه: «دعا بگرَه که آزمایش مَبِیَّه.» ۴۱ دومله عیسی ایله سِنگی فِر آدوَعَه مسافتی قَدَر، آوون کا

فاصله گیتشه و زنگ زَندیشه، دعا گَردِشه ^{۴۲} و ایتشه: «ای دده، اگم اشته اراده اشته، اِم عَذابی قَدَره بَه مین کا دور آگه، اَمّا حَلَا نِی آ چپی که از پیستِمه مَبو، بَلگم آ چپی که تِه پیستِرِه اَنجام بَبو.» ^{۴۳} آ موقع ایلَه مَلائیکه آسَمونی کا بَیی آشکار آبه و اَی قَوّت دوشه. ^{۴۴} عیسی آ رنج و عَذابی کا که گشی، ورتَر دعا گَردِشه و چپی عَرَق، یالَ خَوَنَ چله اون شیوار زمینی کا ویی. ^{۴۵} وختی عیسی دعا سَری کا پَرتشه و آگَردِسته شاگِردون وَر، اوون ویندِشه که غَم و غُرصه کا خواو آشینَه. ^{۴۶} اوون نه و ایتشه: «چیرا خَیرونه؟ پِرزه و دعا بَگَره که آزمایش مَبییه.»

عیسی دستگیر بییه

^{۴۷} عیسی حَلَا کارا گَف رَنی که ایلَه جماعتی راه نه آرستینه. یهودا که ایلَه آ دوزنه گلَه شاگِردون کا بَه، اوون هدایت بَگردی. یهودا اوَمه عیسی وَر تا اَی ماچ بَگَره، ^{۴۸} اَمّا عیسی بَیی نَه و ایتشه: «ای یهودا، اِنسانی زوئه ایلَه ماچی نه تسلیم بَگردیش؟» ^{۴۹} وختی عیسی دور و بَری اِن ویندِشونه که چِه اِتفاقی کارا دَلکَه، و ایتشونه: «آقا، چَمه قَمّه اون اِستفاده بَگَرَم؟» ^{۵۰} و ایلَه اوون کا، کاهن اعظمی نوگری قَمّه نه زَندیشه و چپی راست گُوشی دَوردِشه. ^{۵۱} اَمّا عیسی و ایتشه: «اِم کاری مَگَره!» و اَمردی گُوشی دَس آسوشَه و شَفا دوشه. ^{۵۲} دومله عیسی سَران کاهنون و معبدی نگهبانون فرمانده اون و شیخون نه که چپی دستگیر گَردِه را اوَمه بینَه، و ایتشه: «بَگم از راهزَنیمه که چماقون و قَمّه اون نه اوَمیرونه مین بَگَره؟» ^{۵۳} آ موقع که از هَر روز معبدی کا شِمَه نه بیمه، شِمَه مین دَس نَزُندِرونه. اَمّا حِسَه شِمَه وخت اِسته، تاریکی قدرتی وخت.»

پطرس، عیسی هاشا بَگردی

^{۵۴} دومله اوَن عیسی گیتشونه و بَردِشونه کاهن اعظمی ک. پطرس دوری نه چوون دومله بَشی. ^{۵۵} ک سِرا وسطی کا، آتش روشون بَه و چَن نفر آتشی دوری کا نِشت بینَه. پطرس نی چوون دیله کا نِشته. ^{۵۶} اِم موقع، ایلَه خائک، پطرسی ویندِشه که آتشی روشونی کا نِشت بَه، بَیی زول زَندیشه و ایتشه: «اِم مرد نی عیسی نه بَه.» ^{۵۷} اَمّا پطرس هاشا زَندیشه و ایتشه: «ای ژن، از اَی اَنزونِم.» ^{۵۸} تَلی پِش اَی نفر دَییر پطرسی ویندِشه و ایتشه: «تِه نی ایلَه اوون کا اِستیش.» اَمّا پطرس جَواو دوشه: «ای مرد، از اوون کا نیمه.» ^{۵۹} اَی ساعت دَویپَردِه و اَی نفر دَییر تَأکیدِی نه و ایتشه: «تَیقین دارِم که اِم مرد نی بَیی نه بَه، چوم که اِم نی

آهل جليل استه.»^{۶۰} اما پطرس واتشه: «ای مرد، از نیم‌زمن ته چه بواتیش.» پطرس خلا گف رُنی که ه لحظه سوک خندشه.^{۶۱} عیسی خداوند آگردسته و پطرسی دییشته. پطرس عیسی خداوندی گفی ویر وردشه که چنته یی نه واتش به: «اوری، سوکی خنده پیش ته سه گره من هاشا بگردیش.»^{۶۲} پطرس شه برون، و های های دادش کرده.

عیسی ریشخند بگردین

کسونی که عیسی کا نگهبانی بگردین، آپی مسخره گرین و ژنین.^{۶۴} آون عیسی چمون دَوستشون به و هی آپی کا دَفرسین: «حسه غیبی نه بوآج کی ته ژنه؟»^{۶۵} آون عیسی نه ور بد و بیرا بواتین و فَش بداین.

عیسی محاکمه یهودیون شورا پیشی کا

وختی صبح آبه، قومی شیخن، یعنی سران کاهین و توراتی معلمین، جمع آینه اپی جگا و واتشونه که عیسی بوآرن چوون ور. آون عیسی نه واتشونه:^{۶۷} «آگم ته مسیح موعود استیش، بمون نه بوآج.» ولی عیسی واتشه: «آگم بوآجم، چمن گفی باور نگره،^{۶۸} و آگم شمه کا دَفرسم، چمن جواوی ندیه. ^{۶۹} اما چمی پیش، انسانی زوئه خدا قدرتی راست دسی کا بنشتی.»^{۷۰} آون گرد واتشونه: «بس ته خدا زوئه ایش؟» عیسی جواو دوشه: «شمه بواتیرون که استیمه.»^{۷۱} بس آون واتشونه: «د شاهدمون چیرایه؟ آمه امی، چپی اشن زوونی کا دَرسونه.»

۲۳

عیسی محاکمه پیلاتس و هیرودیسی وری کا

دومله شورا اعضا گرد پرشتینه و عیسی بردشونه پیلاتسی ور که رومی فرماندار به.^۱ آون دَمندینه عیسی متهم کرده، واتشونه: «آمه ام نتیجه آرتیمونه که ام مرد چمه میلی راه کا برگره و آمه قَدغن بگردی که رومی امپراطوری خراج آمدیم و ادعا بگردی که اشن مسیح و پاتشا استه.»^۳ بس پیلاتس عیسی کا دَفرسشه: «آیا ته یهودیون پاتشایش؟» عیسی جواو دوشه: «ته اِنته واتره!»^۴ دومله پیلاتس، سران کاهنون و جماعتی نه واتشه: «آز هیچ تقصیری ام مردی محکوم کرده را نوینیم.»^۵ اما آون اصرار بگردین، بواتین: «آ

اِشْتَنِ تَعْلِيمُونِ نَهْ گِرْدِ يَهُودِيَهْ كَا مَرْدَمِي جَوكو زَنَهْ كِهْ اَشُوبِ بِيگَرِن. جَلِيلِي وِلايَتِي كَا شَرُوعِ گَرْدِشَهْ وَ حَتِي تَا اَيَا نِي اَرَسْتَهْ.»

^۱ وختي پيلاٽس اِمي دَرَسِشَهْ، دَفَرَسِشَهْ بَزُونَهْ كِهْ اَيَا اِمِ مَرْدِ اَهْلِ جَلِيلِ اِسْتَهْ. ^۷ وختي زونِسْتِشَهْ عيسي، هيروديس حاكِمِي قَلَمَرُوي سِنِ اِسْتَهْ، ابي ويسا آگَرْدِشَهْ هيروديسي وَر، چوم اَمَ مَوقِعِ هيروديس اورشليمي شهري كَا اِسْتَبَهْ. ^۸ وختي هيروديس، عيسي ويندِشَهْ، بَرَكِ شَادِ اَبَهْ، چوم خَلي زَمَانِ بَهْ پيسْتِشَهْ كِهْ عيسي بويي. چوم كِهْ دَرِبَارَهْ عيسي دَرَسِشَ بَهْ وَ اَمِيدِ دَارِيسْتَهْ چَنِ گِلَهْ مَعْجَزَهْ اَبِي كَا بويي. ^۹ بَسِ وَرِ سِوَالُونِي عيسي كَا دَفَرَسِشَهْ، اَمَا عيسي يِي جَوَاوِي نِدُوشَهْ. ^{۱۰} سَرَانِ كَاهِينِ وَ تِوَرَاتِي مَعْلِمِنِ كِهْ اِوَاكَا مَنَدِ بِيَنَهْ، بَرَكِ يِي بُخْتُونِ زَنِينِ. ^{۱۱} هيروديس وَ چِي سَرِيَاژِنِ نِي عيسي تَحْقِيرِ گَرْدِشُونَهْ وَ اَبِي مَسْخَرَهْ گَرْدِشُونَهْ. دَوْمَلَهْ زُرُقِ وَ بَرَقِي يَهْ اَبَايِي پَرْدِشُونَهْ چِي دُوشِي سَرِ وَ اَبِي ويسا آگَرْدِشَهْ پيلاٽسِي وَر. ^{۱۲} هَ رُوزِي كَا، هيروديس وَ پيلاٽس يِنْدِي نَهْ رَفَقِي بِيَنَهْ، چوم پيشْتَرِي يِنْدِي نَهْ دِشْمِنِ بِيَنَهْ.

^{۱۳} دَوْمَلَهْ پيلاٽس، سَرَانِ كَاهِنُونِ وَ قُومِي پِيلَهْ تَرُونِ وَ مَرْدَمِي دَخُونْدِشَهْ، ^{۱۴} وَ اَوُونِ نَهْ وَايْتِشَهْ: «شِمَهْ اِمِ مَرْدِي اِمِ اِنَهَامِي نَهْ وَرِدِرُونَهْ چِمِنِ وَرِ كِهْ مَرْدَمِي رَاهِ كَا بَرَكِرَهْ. اَزِ شِمَهْ پيشِي كَا اِمِ مَرْدِي بَازِجُويِ گَرْدِمَهْ وَ اَبِي كَا هِيچِ تَقْصِيرِي نُوينْدِمَهْ كِهْ شِمَهْ بُخْتُونِ ثَابِتِ بَكِرَهْ. ^{۱۵} هيروديسي نَظَرِ نِي اَمَهْ، چوم اَبِي اِگَرْدِنيشَهْ چَمَهْ وَر. دَيِسَهْ اَهْ، كَارِي گَرْدَهْ نِيشَهْ كِهْ مَرگِي مَسْتَحَقِ بَبُو. ^{۱۶} بَسِ اَبِي شِلَاقِ زَنِمِ وَ اَزَادِ اَكْرِمِ.» ^{۱۷} هَرِ عَيْدِي كَا بَسِي پيلاٽس، ايلَهْ زَنْدَانِي اَوُونِ رَا اَزَادِ اَكْرِي.

^{۱۸} اَمَا اَوْنِ گِرْدِ يِنْدِي نَهْ خَلِجِ زَنْدِشُونَهْ كِهْ: «اِمِ مَرْدِي بِيكش، بَارَابَاسِي اَمَهْ رَا اَزَادِ اَكَه!» ^{۱۹} بَارَابَاسِ كَسِي بَهْ كِهْ شَهْرِي كَا اَشُوبِ گَرْدَهْ وَاسِي وَ اَدَمَهْ كِشِي وَاسِي زَنْدَانِي كَا بَهْ. ^{۲۰} پيلاٽس كِهْ پيسْتِشَهْ عيسي اَزَادِ اَكْرِي، اَبِي دَفْعَهْ دِيَتَرِ نِي مَرْدَمِي نَهْ گَفِ زَنْدِشَهْ. ^{۲۱} اَمَا اَوْنِ هَتَهْ هِي خَلِجِ بَكْرَدِينِ كِهْ: «اَبِي صَلِيبي سَرِي كَا بِيكش! اَبِي صَلِيبي سَرِي كَا بِيكش!» ^{۲۲} سَوْمِينِ گَرَهْ اَوُونِ نَهْ وَايْتِشَهْ: «چيرا؟ چَهْ بَدِي گَرْدِشَهْ؟ اَزِ هِيچِ تَقْصِيرِي اَبِي كَا نُوينْدِمَهْ كِهْ مَرگِي مَسْتَحَقِ بَبُو. بَسِ اَبِي شِلَاقِ زَنِمِ وَ اَزَادِ اَكْرِمِ.» ^{۲۳} اَمَا اَوْنِ بِلَنْدَهْ سَسِي نَهْ خَلِجِ بَكْرَدِينِ وَ اِصْرَارِ بَكْرَدِينِ كِهْ اَبَسِي مَصْلُوبِ بَبُو. اَخِرِ چَوُونِ خَلِجِ گَرْدَهْ پِيروزِ بَهْ. ^{۲۴} بَسِ پيلاٽس، تَصْمِيمِ گِيشَهْ حَكْمِي كِهْ اَوْنِ پيسْتِشُونَهْ صَادِرِ بَكِرَهْ. ^{۲۵} پيلاٽس اَهْ، مَرْدِي كِهْ اَشُوبِي وَاسِي وَ اَدَمَهْ كِشِي وَاسِي زَنْدَانِي كَا دَلَكَهْ بَهْ وَ جَمَاعَتِ چِي اَزَادِي پيسْتِشُونَهْ، اَزَادِ اَكْرَدِشَهْ وِلي عيسي اَدُوشَهْ چَوُونِ دَسِ تَا هَرِ كَارِي پيسْتِشُونَهْ اَبِي نَهْ بِيگَرِن.

عیسی، صلیبی سَری کا

۲۶ وختی عیسی بَردین، ایله مِردی که چپی نوم شمعون بہ و قیروانی آہالی بہ، مزرعه نہ کارا بوئی شهری را. اُون شمعونی گِشونہ و صلیبی چپی گَندوشی سَر نوشونہ تا آبی پَترہ عیسی دوملہ. ۲۷ وِزہ گروهی مردمی کا و ژِیکنی که عیسی واسی سینہ کو بَگردین و شیون بَگردین، چپی دوملہ راه دَلکینہ. ۲۸ اَمّا عیسی اِشتن دیمی آگار دَنیشہ چوون طرف و واتِشہ: «ای اورشلیمی کِلہ اِن، بہ مِرا داد مَگرہ؛ بَلکم شِمہ را و شِمہ خِرَدَنون را داد بَگرہ. ۲۹ چوم روزونی بومین که بَوَاتین: "خَسہ ببو غِسرہ ژِیکون و اِشگمونی که هرگز خِرَدَن وِردہ نیشونہ و سینہ اونی که هرگز شِت دوغہ نیشونہ!" ۳۰ آ موقع، کوه اون نہ بَوَاتین: "چَمہ سَر بَرگنہ!" و کولون نہ نی بَوَاتین: "اَمہ بوپوشونہ!" ۳۱ چوم اگم تَرہ لسی نہ اِنتہ بَگردین، خِشک لسی سَر چه بوئی؟»

۳۲ دِ گلہ دِیتر مِرد نی که هَر دِ جنایتکار بینہ، کارا بَردین تا عیسی نہ بَکِشِن. ۳۳ وختی آرستینہ بہ چگاپی که چپی نوم جُمجُمہ بہ، عیسی اَدِ گلہ جنایتکاری نہ صلیبی سَری کا مِخ کو گردِشونہ، ایله عیسی راست طرفی کا و آیلہ نی چپی چَپ طرفی کا. ۳۴ عیسی واتِشہ: «ای دَدہ، اِمون بَبخش، چوم نیمزَن چہ بَگردین.» اُون عیسی خَلاون را قُرعه دَرَفَنِدِشونہ که اِشتن میانہ کا تَقسیم بَگرن. ۳۵ مردم مَند بینہ و تَماشا بَگردین و قومی پیلہ تَرِن نی عیسی ریشخند بَگردین و بَوَاتین: «بقیہ نجات دوشہ! اگم اِم مِرد خِدا مَسِیح اِستہ یعنی هَ اِنْتَخاب بییہ اِستہ، حَسہ اِشتن نجات بَدہ.» ۳۶ سَریازن نی آبی مَسخرہ بَگردین. اُون بہ عیسی نَزَدِیک آبینہ، تَرِشَسہ سَراوی اَدَن یی ۳۷ و بَوَاتین: «اگم تہ یهودیون پاتشایش، اِشتن نجات بَدہ.» ۳۸ عیسی سَری گفا کا نی اِم نیویشتہ وَصَل گردِشونہ که اَمہ یهودیون پاتشاه.

۳۹ ایله اِجنایت کارون کا که مصلوب بہ بینہ، بَد و بیراہ نہ عیسی نہ بَوَاتی: «بَگم تہ مَسِیح نبیش؟ اَمہ و اِشتن نجات بَدہ!» ۴۰ اَمّا آیلہ آبی را زَرہ گِشہ و واتِشہ: «تہ خِدا کا نِرسی؟ تہ نی هِم جَزَا محکوم بییش! ۴۱ چَمہ مکافات حق اِستہ، چوم چَمہ کارون جَزَا اِستہ. اَمّا اِم مِرد هِیچ خَطایی گِردہ نیشہ.» ۴۲ دوملہ واتِشہ: «ای عیسی، وختی اِشتہ پاتشایی آرستیش، من نی یاد بوغہ.» ۴۳ عیسی جَواو دوشہ: «حقیقتا تَنہ بَوَاتیم، اوری مَنہ بَہشتی کا بَبیش.»

عیسی مرگ

^{۴۴}تقریباً ساعت دوازده نهار به که تاریکی گرد آسزمینی گتیشه و تا ساعت سه بعد از نهار ادامه داریسته. ^{۴۵}چوم آفتاوی نور دِ نِتاوی. معبدی پرده میانه کا دِ پله به. ^{۴۶}آ موقع عیسی بلنده سسی نه خلع رُندیشه و واتشه: «ای دده، چمن روح اشته دسون تسلیم بگردیم.» ای واتشه و جان دوشه. ^{۴۷}وختی که سربازون فرمانده ویندشه که چه اِتفاقی دلکه، خدا ستایش گردشه و واتشه: «واقعا که ام مرد بی گناه به.» ^{۴۸}گرد مردمی که تماشا کرده را جمع آبه بینه وختی ویندشونه که چه اِتفاقی دلکه، سینه کو آگردستینه اِشَن کِ اون را. ^{۴۹}گرد عیسی اِشَنین و ژنکونی که جلیلی ولایتی نه چپی دومله اوّمه بینه، دور منده بینه و ام چپیون دپسین.

عیسی دفن کرده

^{۵۰}اوآکا مردی به که چپی نوم یوسف به. یوسف رامه شهری آهالی به که یهودیون ایله شهرن کا اِستبه. آ مردی چاک و صالح به. با ام که یوسف شورا عضو به، ^{۵۱}اما چوون رأی و تصمیمی نه موافق نبه. یوسف خدا پاتشایی را چم به را به. ^{۵۲}ام مرد شه پیلانسی ور و عیسی جنازه پیستشه. ^{۵۳}دومله عیسی جنازه صلیبی کا جیر وردشه و کتانه گفنی کا دپچستشه و مقبره ای کا نوشه که ایله صخره دیله کا تراشته بیبه به و تا حسه کسی چپی دیله کا نوعشون نبه. ^{۵۴}آ روز، آماده آبیبه روز به که آ روزی کا یهودیین اِشَن آماده آگرین پسخ عیدی را و چپی منده نبه که مقدس شنبه شروع ببو. ^{۵۵}ژنکنی که جلیلی نه عیسی دومله اوّمه بینه، شینه یوسفی دومله. اون مقبره ویندشونه و هم ویندشونه که چنته عیسی جنازه اوآکا نوشه. ^{۵۶}دومله آگردستینه ک، آدویه و عطری یه روغن آماده آگردشونه. اون مطابق شریعتی حکم، مقدس شنبه روزی کا استراحت گردشونه.

۲۴

عیسی زنده آبیبه

اهفته اولین روزی کا، صبی سر ژنکین آدویه اونی که آماده شون کرده به پگتیشونه و شینه مقبره را. ^۲اون ویندشونه آسنگی که مقبره دهنه پوشوندش به مقبره پیشی کا کنار رنده بیبه. ^۳وختی شینه مقبره دیله، عیسی خداوندی جنازه نویندشونه. ^۴اون ام اِتفاقی کا مات بینه که ای دفعه دِ گله مرد خلا اونی

نه که شفق زُنين چوون گناری کا مندینه. ۰ هنته که ژنکن ترسه بينه و اِشْتَن سَری جیر وِردشون به؛ ا دِ گله مرد آوون نه واتشونه: «چیرا مرده اون دیله کا، زنده دومله گرده؟ ۱ آ اییا کا نییه، بلگم زنده آبیته! ویر بوآزه وختی که حلا جلیلی ولایتی کا به، چنته شمه نه واتشه که ۷ انسانی زوئه بسی گناه کارون دسی نه تسلیم ببو، مصلوب ببو و سِومین روزی کا زنده آبو.» ۸ ا موقع ژنکن عیسی گفون ویر وِردشونه. ۹ وختی مقبره کا آگردستینه، گِردِه اِم چوون آ یازده گله خواری را و بقیه را نی واتشونه. ۱۰ ا ژنکنی که اِم چوون خواریون را واتشونه، اِمِن بینه، مریم مجدلیه، یوانا، یعقوبی ننه مریم و دیر ژنکنی که چوون همراهِ بینه. ۱۱ اما خواری اِن، انته بزین که ژنکن هذیان بوآتین و چوون گفی باور نگردهشونه. ۱۲ ولی پطرس پرشته ویریته مقبره طرف؛ شت آبه مقبره دیله دیدشته، اما گفئی غیراز چپی نویندشه. آ هته که اِم اِتفاقی کا خیرون به، آگردسته ک را.

عمائوسی راه کا

۱۳ ه روزی کا، دِ نفر شاگردون کا، کارا بشین دپی طرف که آده نوم عمائوس به و تقریباً اورشلمی دِ فرسخی کا به. ۱۴ اون درباره گِردِه اِم چوونی که اِتفاق دلکه به، یندی نه گف زُنین. ۱۵ هنته که یندی نه گف زُنین و بحث بگردین، عیسی اِشْتَن اومه چوون وِر و آوون نه همرا به. ۱۶ اما اِم قدرت که ا لحظه کا عیسی آزون اِوون کا ویگته به. ۱۷ عیسی آوون کا دفرسشه: «راه دیله کا، درباره چه چی یندی نه گف زُنه؟» اون ناراحت قیافه اون نه، ساکیت مندینه. ۱۸ دومله ایله آوون کا که چپی نوم کلئوپاس به جواو دوشه: «مگم اورشلمی کا تنخا مسافر ته اِستیش که آ چوونی کا که اِم روزون کا اوآکا اِتفاق دلکه بیخبریش؟» ۱۹ عیسی دفرسشه: «گم چیین؟» جواو دوشونه: «آ چپی که عیسای ناصری سر اومه! آ، پیغمبری به که خِدا پیشی کا و گرد مردمی پیشی کا، هم گف زنده کا و هم انجام دوعه کا قوی به. ۲۰ چمه سران کاهین و قومی پيله ترن، آپی تسلیم گردهشونه که محکوم به مرگ ببو و آپی ضلیمی سَری کا کِشْتشونه. ۲۱ اما اومه امید داریمون آ، ه کسی ببو که بسی اسرائیلی آزاد آگره. اِمِن گرد هیچ، حسه سومین روز اِسته اِم چیین اِتفاق دلکه ای نه. ۲۲ چمی غیراز بعضی ژنکن نی که اومه نه اِستینه، اومه مات و مبهوت گردهشونه. اون اوری صبی سر شینه مقبره سر، ۲۳ وختی نشاستشونه عیسی جنازه بتلفن، آگردستینه و اومه

نه واټشونه که حتی رویا کا ملائیکه اونی ویندشونه که آوون نه واټشونه عیسی زنده یه. ^{۲۴} بعضی کسونی کا که چمه همراه بینه، شینه مقبره و اوضاع هته ویندشونه که ژنکن واټشون به، اما عیسی نویندشونه. ^{۲۵} «دومله عیسی آوون نه واټشه: «ای نادوننی که هندی عری گرد چیونی که پیغمبرن واټشونه باور بگردیرون! ^{۲۶} بگم نبی مسیح ام درد و رنجون بکشه و دومله ایشن جلالی آرسته؟» ^{۲۷} دومله موسی توراتی کا و گرد پیغمبرون نیویشته اون کا شروع گردشه و آچیونی که گرد مقدس نیویشته اون کا درباره چیی نیویشته بییه به چوون را توضیح دوشه. ^{۲۸} وختی اون نزدیک آینه به دهی که چوون مقصد به، عیسی وانمود گردشه که پیستشه ایشن راه ادامه بده. ^{۲۹} اما اون ور اصرار گردشونه و واټشونه: «چمه وری کا بومون، چوم روز کارا تمون أبو و شو نزدیکه.» بس عیسی دشه دیله تا چوون وری کا بومونه. ^{۳۰} وختی آوون نه سفره سری کا نشت به، نونی پگتسه و شکور گردشه، پله گردشه و آدوشه آوون. ^{۳۱} ه موقع، چوون چمن آینه و عیسی آزونستشونه، ولی اَلْبَحَل عیسی چوون چمی پیشی کا غیب آبه. ^{۳۲} اون یندی نه واټشونه: «ویندره وختی راه کا آمه نه گف زنی و مقدس نیویشته اون آمه را توضیح بدای، چنته چمه دیل چمه سینه کا کارا بروری!» ^{۳۳} بس اون ه لحظه پرشتینه و آگردستینه اورشلیم. او آکا ویندشونه آیزده گله شاگرد و کسونی که چوون همراه بینه، یندی دور جمع آیینه، ^{۳۴} و بواتین: «عیسای خداوند واقعا زنده آبییه و به شمعون ظاهر آبییه.» ^{۳۵} دومله، آد نفر نی واټشونه که راه کا چه بییه، و چنته نونی پله گرده موقع، عیسی آزونستشونه.

عیسی به شاگردون آشکار آبه

^{۳۶} هته که درباره ام چیون کارا گف ژنین عیسی ایشن چوون میانه کا منده و آوون نه واټشه: «سلام بر شمه!» ^{۳۷} اما اون ترسی نه و وحشت گردشونه و خیال گردشونه که روح بویندین. ^{۳۸} عیسی آوون نه واټشه: «چیرا انته آشفته ایرونه؟ چیرا شمه دیلی کا شک دلکه؟ ^{۳۹} چمن دس و پا دپسه. از ایشننیمه. من دس بزنه و بوینه؛ چوم روح، گوشت و آسته نیشه، اما هنته که بویندیرون از هستمه.» ^{۴۰} امی واټشه و ایشن دس و پا آوون نشون دوشه. ^{۴۱} هته که اون شادی و حیرتی کا خلا نیمشاین چیونی که بویندین باور بکرین، عیسی آوون نه واټشه: «اییا کا چیی هرده را هسترونه؟» ^{۴۲} اون ای پله بریون مای آدوشونه

عیسی. ^{۴۳} عیسی اِی پِگِئِشَه چَوون چَمی پِیشی کا هَر دِشَه.
^{۴۴} دَوْمَلَه اَوون نَه وائِشَه: «اِم هَه چِی اِسْتَه کَه وختی حَلا شِمَه نَه بِيَمَه
 بَوَاتِیْم. شِمَه نَه وائِمَه هَر چِی کَه موسی توراتی کا، پیغمبرون نیویشته اُون کا و
 داوودی زَبُوری کا، دِبارَه چِمِن نیویشته بِيَه بَسی اِتْفاق دَلِکَه.» ^{۴۵} دَوْمَلَه
 چَوون ذَهنی آگَر دِشَه تا بَشان مَقَدَس نیویشته اُون درک بَکَرِن. ^{۴۶} و اَوون نَه
 وائِشَه: «نیویشته بِيَه کَه مَسِیح، بَسی رنج و عَذاب پِگِشَه و سَوْمِن روزی کا
 مَرده اُون دِیلَه کا زنده آبو، ^{۴۷} و چِی نومی نَه گِرِدَه مِیلتون را توبه و گناه اُون
 بَخِشِستَه اِعلام بِيی، چَمی بِنَا نِی اورشَلِیْمی نَه اِسْتَه. ^{۴۸} شِمَه اِم چِیون
 شاه دِیرونه. ^{۴۹} اَز اِچِی کَه چِمِن اَسْمونِی یَه دَدَه و عَدَه دوعَشَه شِمَه را وِیسا
 آگَرِم؛ اَمّا تا وختی کَه خِدا قَدْرَت اَسْمونِی کا شِمَه پور آگَرَه، اِم شَهْرِی کا
 بومونه.»

عیسی بَشی اَسْمون

^{۵۰} دَوْمَلَه اَوون بَر دِشَه شَهْرِی کا پَرُون تا بَیت عَنیا دِه نِزْدِیْکِی و اِشْتَن دَسون
 پَلَنَد آگَر دِشَه و چَوون را خِیرَه دِعا گِر دِشَه؛ ^{۵۱} و هَتَه کِه چَوون را دِعا بَگَر دِی،
 اَوون کا چِدا آبَه اَسْمونِی را بَر دِه بَه. ^{۵۲} اَوون عیسی پَر سَتَش گِر دِشونَه و دَوْمَلَه وِر
 شادی نَه آگَر دِستینه اورشَلِیْم. ^{۵۳} اَوون دَائِم مَعْبَدِی کا بِنَه و خِدا حَمْد و سَتائِش
 بَگَر دِیْن.